

**NATIONAL ASSEMBLY OF  
SEYCHELLES**

*Wednesday 17th May, 2023*

*The Assembly met at 9am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour tou Manm Onorab e *comme* labitid nou zofisyé Lasanble ki pe akonpanyi nou e manm piblik osi ki swiv nou. Byenveni pou nou travay ozordi. Fotespere zot in retourn *fresh* e for.

Pou komanse, mon pou donn laparol *Leader* Lopoziyon, Onorab Sebastian Pillay pou en mo omaz pou defen Mrs Geva Rene ki ti en personnalite enportan dan lasosyete e dan lavi piblik nasyonal. Onorab Pillay ou annan laparol.

**HON SEBASTIEN PILLAY**

Mersi Mr Speaker e bonzour Mr Speaker e bonzour tou koleg Onorab e byensir bonzour tou dimoun i a lekout.

Mr Speaker i avek en pe latristes, me osi i en loner pou mwan ganny loportinite pou

eksprim mon senpati avek depar enn bann personnalite tre enportan dan nou sosyete, ki'n fer bokou sirtou an sa ki konsern proteksyon drwa zanfan. E son travay ki in fer pandan plizyer lannen ki relye avek zanfan e sirtou bann ki rapel son devouman pou NCC. E sa se Mrs Geva Rene.

In deservi nou pei koman Premye Dame, me in osi en personnalite enportan ki'n ede dan lasosyete pandan plizyer lannen e lo non mwan menm e lo non tou Manm *United Seychelles* dan Lasanble - e annefe lo non tou dimoun, mon oule eksprim mon senser kondoleans avek son fanmir, son bann zanfan, son bann pros.

E mon swete ki bann travay ki in fer i ava ganny kontinyen, sirtou par lefe ki pandan lazournen yer, nou tou nou'n tann bann nouvel ase tris otour en lensidan ki fek evolue;- lefe ki i annan bann lenvestigasyon ki pe arive otour sa lensidan, mon pa pou koz lo la.

Me mon swete ki tou bann lotorite konsernen i fer zot travay pou fer ki nou ganny en larepons lo la. Mon remersi ou Mr Speaker ozordi bomaten, pou donn mwan sa loportinite pou dir sa 2 pti mo lo lapar mon

*Caucus* an senpati avek lafanmir Mrs Rene. Mersi Mr Speaker.

### **MR SPEAKER**

Mersi Onorab Pillay. Mon apresye rekonnèt lakonplisman Mrs Rene dan domenn ledikasyon e dan domenn byennet zanfan. E Onorab Georges ti a kontan azout en parol?

### **HON BERNARD GEORGES**

Mersi Mr Speaker. Bonzour Mr Speaker. Bonzour tou bann Manm Lasanble e tou dimoun ki pe swiv nou. Mon ti a kontan senpleman bomaten, azout mo avek sa ki Onorab *Leader* Lopozisyon fek dir, lo lapar nou *Caucus* dan sa Lasanble.

Mrs Rene ti en dimoun ki mon ti konnen personnelman e mon'n swiv son traze isi Sesel e mon pa bezwen azout a sa ki'n ganny dir. Me lo lapar nou *Caucus* e lo mon par personnel - akoz mon konn son 3 garson Glenney, David e Francis byen, e personnelman anmenn en mo senpati ek kondoleans pou zot dan sa moman ki zot pe viv.

E lo lapar nou *Caucus* mon ti a kontan rekonnèt kontribisyon ki Mrs Rene in fer pou nou sosyete dan domenn ledikasyon e dan domenn

proteksyon nou bann zanfan. Mersi Mr Speaker.

### **MR SPEAKER**

Mon azout mon kondoleans e senpati pou lafanmir Mrs Rene dan zot tristes. Mersi. Mon pou osi pran lokazyon pou pas en mesaz lo lapar Groupman Madanm dan Lasanble e sa lo demann son *Chairperson* Onorab Regina Esparon. Son mesaz i lir koumsa;-

Groupman Madanm dan Lasanble Nasyonal, i oule pas son senpati avek paran e fanmir sa pti fiy 3an sorti La Gogue ki'n perdi son lavi yer apre midi.

Baze lo sa ki'n ganny raporte dan nouvel nou kondann sa lensidan e nou pe demann lotorite konsernen pou tret sa ka avek en irzans, pou etabli egzaktaman ki'n arive ki'n okazyonn lanmor sa pti fiy. Nou osi demann lotorite pou pran aksyon apropiye si i annan ki responsab pou okenn lofans ki'n ganny komet.

Nou pran sa lokazyon pou demann tou paran e bann ki responsab pou en miner, pou fer tou sa ki nou kapab pou protez nou zanfan. E pa ezite pou enform lotorite si zot annan okenn soupson, ki i kapab annan lofans ki pe ganny komet kont en zanfan.

Nou fer resorti ki i responsabilite tou dimoun dan fanmir e dan kominote, pou regard lo sekirite tou zanfan e pran okenn aksyon ki kapab ede prezerv zot lasante, zot sekirite e zot lavi.

Ankor enn fwa nou demann la fanmir pou aksepte nou senpati dan zot douler e nou aport zot nou sipor.

Groupman Madanm dan Lasanble. Mersi.

Onorab Loze ou'n lev lanmen mon annan en lareg ki dir ki si en Manm i anvi adres Lasanble avan Biznes Lasanble i komanse, i bezwen apros mwan avan pou mwan donn li permisyon.

Donk mon pa kapab rekonnet ou a se moman e mon pe demann ou silvouple swiv sa gidans, silvouple, ziska ler ki i annan Biznes Lasanble ki a permet ou lev en *Point of Order* oubyen en *matter of privilege*. Mersi Onorab. Nou a kontinyen avek nou *Order Paper*.

E lo nou *Order Paper* nou rebran Mosyon e nou annan en dezyenm Mosyon ki lo latab e sa i dan nou'n Onorab Andy Labonte. Onorab ou annan laparol pou soumet ou Mosyon.

### **HON ANDY LABONTE**

Mersi Mr Speaker. Bonzour Mr Speaker. Bonzour tou Manm

koleg Onorab. Bonzour tou zabitan La Rivyer Anglez.

Mr Speaker avan ler mon met mon Mosyon permet mwan pou mon remerci mon bann zabitan ki yer ti *attend* sa *meeting* piblik i en *meeting* ki'n vremen prodiktiv e nou vremen apresye zot bann kontribisyon ki zot in fer e i en dyalog ki pou kontinyen e nou osi remerci Biro Prezidan pou la prezan.

Bon, Mr Speaker tou Manm koleg Onorab Mosyon ki pe ganny soumet devan Lasanble i lir koumsa;

Prenon kont bokou konsern lo labi servis *casualty* kot Lopital Sesel, Lasanble pe demann Gouvernman atraver Minister Lasante, pou asire ki sa servis i ganny servi pou bann *emergency* selman e non pa koman en klinik normal.

Mr Speaker mon soumet sa Mosyon devan Lasanble pou laprouvasyon e diskisyon. Mersi.

### **MR SPEAKER**

*(technical issues)*

### **HON ROSIE BISTOQUET**

Mersi Mr Speaker. Bonzour Mr Speaker. Bonzour tou Manm Lasanble. Bonzour tou bann dimoun ki pe ekoute, Mr Speaker mon pe segonn sa

Mosyon ki Onorab Labonte pe anmennen. Mersi.

**MR SPEAKER**

Mersi Onorab. Mon pa konnen ki pe arive ek mon mikro ki i tennyen toultan, fotespere napa personn ki pe tenny mon mikro. *(laughter)* Mersi. Onorab Labonte ou a kapab prezant ou Mosyon prezan.

**HON ANDY LABONTE**

Mersi Mr Speaker. Bondye in kre zonm a son zimaz e i donn zonm lentelizans e pour sa nou rann li glwar e kontinyen demann li pou son benediksyon dan tou sa ki nou fer.

Mosyon ki mon pe anmenn devan Lasanble ozordi bomaten, in vin apre refleksyon ki mon'n fer swivan bokou konsern par piblik ki akse servis *casualty* kot Lopital Sesel. I konsiltasyon avek bann *staff* ki delivre sa servis Mont Fleuri.

Sa landrwa kot tou Seselwa i apel *casualty*, i form parti en *unit* anba lasante ki apel *Accident and Emergency Service*. Sa i en servis ki travay 24erdtan par zour, 365 zour dan en lannen ki vedir i pa fermen e i touzour an operasyonnel e i pe delivre en servis.

*Casualty* parey nou apel li i en landrwa kot i annan bokou mouvman e bann travayer laba i plizoumwen ou laplipar letan travay anba bokou presyon. Akoz i annan bokou trafik e bokou dimoun ki akse sa servis.

E la mon pou pran sa lokazyon Mr Speaker, pou felisit tou travayer kot *casualty* ensi byen ki tou travayer lasante ensi byen ki Minister Lasante e mon pou dir zot kontinyen sa bon travay malgre bann diferan defi ki zot pe rankontre.

Nou konnen tre resan nou'n fer fas avek en pandemik mondyal e zot servis in vreman alaoter. Mon konnen ki pandan sa deba lo sa Mosyon ler bann Manm pou fer zot lentervansyon i annan bokou ki pou ganny dir.

E bi sa Mosyon se i osi pou valoriz zot travay dir ki sa bann endividi pe fer, e regarde ansanm avek bann rekomandasyon ki ava ganny monte dan ki fason nou kapab mye amelyor, lanvironnman travay dan son totalite ki pou byennet Lepep Seselwa en si byen ki amelyor kondisyon travay sa bann endividi.

Priyorite sa Departman *Casualty* se pou pasyan ki lavi i an danze, swa par en blesir aksidan oubyen nenport ki lezot maladi. Me zot asiste tou

pasyan depandan lo gravite zot kondisyon dan en letan rezonnab.

I enportan pou note ki servis *casualty* pa fonksyonn lo en baz *first come first serve*, me plito i fonksyonn lo priyorite dapre kondisyon sa bann endividi ki raport laba.

Tou pasyan ki akse sa servis, i ganny klasifye oubyen ganny *screen* par en zofisyé lasante ler zot vin laba dapre *urgency* zot kondisyon e depandan lo zot degre ki sa servis i bizi ou kantite dimoun ki prezan pou akse sa servis, la zot bezwen espere ler i ariv zot tour pou war Dokter e resevwar en servis.

Sa 5 kategori ki souvandfwa kliyan oubyen bann pasyan zot menm, zot pa vremen konpran oubyen azour avek i kre bokou konfizyon.

Mr Speaker permet mwan donn en bref lo lafason ki sa triyaz i ganny fer. I ganny klasifye an 5 kategori;-

Premyerman i annan premye degre ki ganny klasifye anba son kouler rouz, i ganny gete koman "*immediate*."

E i annan dezyenm kategori ki ganny klasifye anba en kouler oranz ki vin "*very urgent*" e la nou kapab war ki kliyan i kapab pe esper 0 a 10 minit konpare avek premye, ki

koman kliyan i vini ganny akse toudswit.

Nou annan trwazyenm kategori ki ganny klasifye anba en kouler zonn i ganny mete koman "*urgent*" e la ankor enn fwa depandan lo ki mannyer sa servis kantite dimoun i pe akse sa servis i swa 0 a 60 minit.

In annan katriyenm kategori ki 4 i ganny konsidere koman standar ki en kouler rouz e la kliyan i kapab esper 0 a 2erdtan- a 120 minit.

E nou annan en lot kategori ki kategori limero 5 e la i ganny klasifye anba en kouler ble kot kliyan i kapab atann 0 a 240 minit.

Mr Speaker nou osi war ki bokou pasyan ki souvan akse sa servis, i se bann pasyan ki ti kapab akse bann lezot fasilite lasante atraver pei ki sitye dan diferan distrik swa rezyonal swa dan bann distrik partikilye.

I pa vedir ki zot pa bezwen ganny servis lasante, me zot ti kapab ede retir presyon lo servis *casualty*. E sa i montre nou ki i annan en mank ledikasyon de lapar nou popilasyon lo ki vremen rezondet *casualty*.

Les mwan an bref donn en statistik lo bann pasyan ki akse sa tel servis. E mon pou pran

statistik Mr Speaker baze lo lannen 2020.

An 2020 Zanvye partikilyerman 3011 ka in ganny war kot *casualty*. E ladan i annan 228 ki'n ganny klasifye koman vremen bann ka ki merit kot *casualty*. I annan 597 ki'n ganny refer e i annan ladan 353 ki'n ganny ladmisyon toudswit. E sa i montre nou poudir mwens ki lanmwatye, i pa'n vremen bann ka ki ti vremen irzan.

E an Fevriye nou annan 3072 e ladan 252 ki'n ganny klasifye koman vremen bann ka *casualty*. E 684 ki'n ganny *review* e refer e 315 ki'n ganny ladmisyon. I kontinyen;-

An Mars 366, 3660 e ladan 317 koman *casualty*, 815 ki'n ganny refer e 335 ki'n ganny ladmisyon.

E nou pou kontinyen sa lalis ki in plizoumwèn reste ant 3mil a 3500. E ki nou war *on average* ant 3433 pasyan par mwan ki'n akse sa servis, e ladan 8.6poursan total ka in plizoumwèn an Zilyet ou Mars. E an Avril *casualty* in osi rikord en ogmantasyon dan ka *casualty*. Mr Speaker sa i *basically* pou 2022.

E 2023 in napa vremen gran diferans pou sa premye kar lannen ki'n pase. Me i enportan pou note ki apard sa

*unit* aksidan ek *emergency* ki baze Mont Fleuri, i annan 16 lezot fasilite ki a dispozisyon piblik. Ankor i annan en mank ledikasyon e persepsyon, lo ki vremen rezondet bann sant lasante dan distrik e rezondet *casualty*.

Permet mwan nonm enn de sa bann fasilite ki operasyonnel dan bann distrik. I annan en total 16 an tou. E la nou war ki dan sa 16 i annan omwen 4 an total, ki *operate* lo en baz 24 erdtan. E ladan i annan enn ki lo Baie Ste Anne Praslin, enn lo La Digue. E tou sa bann servis i plizoumwèn ouver 8er a 4er.

Mr Speaker Anse Boileau ek Anse Royale i osi en lot landrwa ki ofer servis lasante ki *operate* lo en baz 24erdtan. Nou annan English River li i *operate* lo en baz 8er bomaten a 8er diswar.

E la en statistik par sa bann *health center*, nou war ki Anse Boileau 8er a 4er zot war plizoumwèn 90 pasyan e 4er a 8er zot war apepre 35 pasyan par zour nou pe koz lo la. E 8er diswar ziska 8er bomaten, zot war plizoumwèn 14 pasyan. Konpare avek Anse Royale ki *operate* lo en baz 24erdtan, li i 8er a 4er i war apepre 233 pasyan, me 4er a 8er bomaten i war 52 pasyan.

E ler nou get English River i en lot sant lasante ki baze dan mon distrik ki deservi en bon pe sou distrik, enkli bann lezot distrik ki balizaz avek, i war en mazorite en total 237 pasyan ant 8er bomaten ziska 8er diswar e-( non ant 8er a 4er Mr Speaker i war en total 172 pasyan e 4er a 8er i war en total 65 pasyan)

Ankor enn fwa ki nou war ki menm sa bann sant lasante, zot osi pe war en bon norm pasyan. Me konpare avek bann lezot sant ki parey Port Glaud ki war en total 45 pasyan par zour, Beoliere 40 pasyan par zour, Takamaka 52 pasyan par zour, Baie lazare 53 pasyan par zour, Anse Aux Pins 90 a 100 pasyan par zour, Les Mamelles 110 a 175 pasyan par zour, Mont Fleuri 49 a 60 pasyan par zour, Beau Vallon 65 a 80 e Glacis 35 pasyan par zour. Grand Anse Praslin li i plizoumwèn war 45 pasyan par zour.

Mr Speaker rezon ki mon pas lo sa bann sant lasante, se ki aköz i pou montre nou ki vreman kantite zabitan an total, ki pe akse servis lasante. E sa i anmenn mwan Mr Speaker pou mwan get osi lo kalite servis ki sa bann tel fasilite i pe donner.

Nou war poudir sa 16 fasilite i annan konsiltasyon

dokter, i osi akse avek *emergency*. I annan;-*school health program*, i annan *maternal and childcare service*, *sexual reproductive health, outpatient, pharmaceutical, oral health, occupational health, physiotherapy, environment health* e serten lezot ankor.

Me parkont zot pa *operate* lo en baz 24erdan apard ki sa 4 lezot ki mon'n mansyonnen, enkli *casualty* ki fer 5.

Mr Speaker i osi enportan pou note, ki apard problemn kantite pasyan ki akse servis, *casualty* i osi fer fas avek en problemn mendev an zeneral si nou pou kapab met li koumsa.

Akoz lakantite pasyan ki *casualty* li menm li i war, mon pou zis an bref Mr Speaker donn en previ lo lafason lo kantite *staff* ki plizoumwèn i merit pe ofer sa servis pour ki i kapab *operate* dan en fason *normal*.

Pou le moman nou annan en total 7 Dokter, 18 Ners *fulltime*, 5 *part time*, 8 *Health Assistant*, 1 *Porter*, 3 *Ward Assistant* ki travay kot sa servis. E dan en sitasyon, dan en *shift* normal nou annan 4 a 3 Ners ki pe travay 1 a 2 *Health Care Assistant* par *shift* e en *Nurse reception* ki li i la plizoumwèn pou fer sa *triage*.

Mr Speaker sa i montre nou ki vremen sa servis li menm li, i en servis ki vremen esansyel e enportan me zot rankontre bokou, bokou difikilte.

E Mosyon ki mon pe anmennen ozordi, se ki mon pe demann Minister Lasante pou nou revwar petet la fason ki sa servis pe ganny donnen, an menm tan sey ede pou donn ledikasyon nou piblik, pour ki nou kapab konnen vremen ki rezondet *casualty*. E regarde dan ki fason ki nou kapab anmenn servis lasante a nou popilasyon dan en fason ki adekwa, e ki kapab deservi nou popilasyon a son ekspektasyon a nenport ki moman, vi ki i en servis ki *operate* 24 lo 24.

Mr Speaker i annan bokou lezot keksoz ankor mon kapab dir lo servis *casualty*. Me mon konnen poudir i en keksoz ki konsern popilasyon ann antye.

Tou Onorab an zeneral mon swete ki zot war lenportans en tel Mosyon e zot donn zot kontribisyon pou nou kapab anmenn devan Minister Lasante pou- avek bann rekomandasyon pou nou kapab ede amelyor sa servis.

Avek sa 2 mo Mr Speaker mon pou met sa Mosyon devan Lasanble pou laprouvasyon. Mersi Mr Speaker.

### **MR SPEAKER**

Mersi Onorab. Mon a donn laparol Onorab Rosie Bistoquet ki'n segonn Mosyon.

### **HON ROSIE BISTOQUET**

Mersi Mr Speaker. Mr Speaker avan mon komanse mon ti a kontan felisit tou travayer Minister Lasante anba zot dirizan Minis Peggy Vidot, pou sa bon travay ki zot in fer sirtou pandan sa letan *COVID* vi ki nou pe al koz lo *casualty*.

E mon konnen laplipar bann travayer lasante zot lo fron batay 24 lo 24 - mon felisit zot en kantite. E osi mon pou felisit bann Ners ki le 12 Me ti Lazournen Enternasyonal pou bann Ners pou sa bon travay ki zot in fer e zot pe kontinyen fer e mon pou toultan siport zot. E kontinyen sa bon travay.

Mr Speaker sa Mosyon i lir *comme* swivan;

Prenon kont bokou konsern lo labi servis *casualty* kot Lopital Sesel, Lasanble pe demann Gouvernman atraver Minister Lasante, pou asire ki sa servis i ganny servi pou bann *emergency* selman e non pa koman en klinik normal.

Mr Speaker dapre *WHO*, lasante in ganny dekrir koman en leta fizik, en leta mantal, en leta sosyal, ki tou imen i devret



annan san okenn maladi ou dezabilite. Nou Konstitisyon Lartik 29, i fer provizyon pou drwa tou Seselwa pou annan akse avek sistenm lasante dan Sesel.

Nou Konstitisyon i osi rekonnèt ki tou Seselwa ki annan en drwa proteksyon, pou rezouir son drwa lasante o pli o standar sirtou lasante fizik, lasante mantal pou asir sa drwa, (parey nou dir drwa i vin avek responsabilite) tou dimoun dan Sesel sirtou sitwayen Seselwa, i bezwen pran son responsabilite pou reste an bonn sante.

Mr Speaker, dapre lorganizasyon mondyal pou lasante *WHO* en ka dirzans dan lasante i vèdir en maladi serye, ouswa en *injury*, ouswa sentonm ou kondisyon ki serye kot en dimoun i bezwen rod latansyon medikal o pli vit posib, pou anpes domaz serye e sirtou pou anpes lanmor.

Dirzans dan lalang medikal i vèdir en maladi egi, ouswa *acute*, ouswa *injury*, ki kapab koz plis danze ou menm lanmor. Sa i koman en aksidan lo semen, en tonbe dan lakour ouswa lo pye koko, lo pye mang, lo pye fiyapen.

En aksidan dan travay par egzant sorti lo tol ou tonbe, kot enn ouswa detrwa parti ou

lekor in swa kase sirtou par egzant si i annan kot latet in ganny defonse en kolonn vertebral ki'n kase ou menm ganny tire par egzant nou dir kot i annan bann lipye, lazanm, lebra ki in ganny koupe ouswa in ganny desire.

Annan de fwa osi parey bann dimoun i vin avek bann dirzans, parey letan nou'n ganny aksidan ouswa in tonbe nou bann sistenm entern ki'n sorti deor, kot en dimoun i kapab senny an mor. Sa osi i en ka dirzans.

Ouswa en dimoun i kapab annan douler sever, parey en latak leker menm en vant fermal ki'n vin toudswit e ou pa kapab ni redi lekor avek douler, ouswa en douler ki'n vin souden. Ouswa en ka dirzans osi i kapab en vomisman ki'n vin enkontrolab.

En ka dirzans i kapab osi en toufman, ou lalenn kourt parey *asthma*, dimoun ki ganny *asthma*. Ouswa en ka dirzans i kapab lansentman en madanm ek en baba ki dan detres, ou okenn zanfan ou dimoun aze ki dan detres, sa nou apel en ka dirzans.

Prezan nou konpar en ka dirzans ek bann ka ki par dirzans ouswa bann ka *non-emergency*, sa bann ka i pa ganny konsidere ordinerman en

dimoun ki devret al kot son klinik dan son landrwa dan son distrik.

Par egzanp sa bann sityasyon parey, i par egzanp bann ptipti koupe ki pa sever;- ou'n kapab ou'n foul ou lipye, ouswa ou'n misk in redi, ou'n ganny en latet fermal e osi ou ganny en pti koupe lo ledwa, sa nou apel bann ka ki pa irzan.

Mr Speaker parey dan tou pei, Sesel e i annan 3 sistenm lasante. Enn i lasante primer, kot nou dir kot lasante dan distrik ou swa kot klinik, sa kot ou kapab ale nenport ki ler bomaten i ouver 8er ziska 4er. I annan klinik ki ouver pli tar e sa ou ganny akse avek lasante primer.

Lasante segonder, i bann sant referral parey Lopital La Digue, nou annan Lopital Baie Ste Anne, Sant Royale, sa i *more or less* lasante segonder. En lot sistenm lasante, lasante tersyer, trwazyenm, i swen spesyalize ki ganny delivre dan lopital.

Normalman pou en pasyan akse avek lasante tersyer, zot ganny refer par Dokter ou zofisyè profesyonnel medikal dan klinik, dan ou sant referral.

So sa 3 sistenm i se sa ki form parti nou sistenm lasante. Parey mon dir dan tou lezot pei

i preski parey. *Casualty* ouswa swen dirzans, i tonm dan sa trwazyenm sistenm savedir i tonm dan lasante tersyer, kot nou trouve kot i annan en tim profesyonnel medikal zot spesyalize parey nou annan diferan spesyalis;-

Spesyalis pou leker, spesyalis pou ronnyon, spesyalis pou kanser, spesyalis ki opere, spesyalis pou fer bann madanm ganny laba.

E zot, zot trouve dan sa departman ki tonm anba sa *casualty*, e zot war pasyan ki dan leta kritik non pa pasyan ki pa dan leta kritik. E se pour se la ki *casualty* i reste ouver 24 lo 24, pou tret pasyan ki vreman malad avek kondisyon tre egi ouswa tre kritik.

Me ki nou trouve Mr Speaker? En kantite dimoun i abiz lo sa servis e sa i met sa *unit* anba en kantite presyon. Akoz sa bann profesyonnel lasante i bezwen pran bokou letan pou fer triyaz, pou konnen lekel ki bezwen latansyon priyoriter.

Parey loter sa Mosyon taler ti eksplike Mr Speaker avan ki en pasyan i war dokter *casualty*, i annan 5 sistenm triyaz parey mon pe dir loter Mosyon i pas lo la e mon osi mon pou repas lo la dan en lot fason.

Sa 5 sistenm triyaz e sa osi i asosye avek konbyen letan en pasyan pou war dokter e sa i *comme* swivan;

Alors premye triyaz i rouz, sa i sitan grav, vreman grav parey bann aksidan lo semen, parey latet kase, parey leker ki'n arete, sennyman parey nou dir pe senny an mor. E sa i bezwen ganny latansyon imedya e lo la nou dir 0 minit, deswit fodre sa pasyan i ganny vwar par en Dokter.

Sa lot kouler i oranz limero 2 e sa i ganny kategorize anba triyaz ki grav, par egzanzp maladi leker ki petet en pe letan i la, asma e sa zot ganny latansyon dirzans e i devret pe war en dokter pandan 10 minit ouswa avan 10 minit.

En lot kouler i zonn, sa i bann ka en pti pe en pe serye;- par egzanzp nou dir i pa tro serye selman, *sorry* par egzanzp bann ka kot i annan lemoni, kot kekfwa nou poumon in ganny afekte an lazanm kase, en maladi ronnyon, sa i devret ganny latansyon omwen pandan 1erdtan.

En lot kouler ki ver i mwen serye, sa i par egzanzp bann dimoun ki'n vin avek lestoman fermal, en pti ledwa kase e la i ganny latansyon pandan 120 minit.

Dernyen kouler i kouler ble senkyenm. Sa i plizoumwen bann dimoun ki vin avek bann pti boubou, bann pti deplise lo zenou, kekfwa in tonbe, lipye foule e li i ganny latansyon pandan letan 240 minit.

E sa sanmenm sa ki letan nou dir i fer triyaz, e tou bann pasyon ki vin kot nenport ki sant lasante *casualty* zot bezwen fer sa triyaz pou konnen konbyen letan ki pou kapab sa dimoun i kapab vwar dokter.

Mr Speaker dapre statistik Minister Lasante pou 2022 nou'n war ki i ti annan 41mil203 pasyan ki'n vizit *casualty* e sa letan nou regarde i vin apepre 3433 pasyan par mwan. Mr Speaker ler mon get lo map Sesel mon get lo statistik dan distrik, laplipar distrik i annan apepre 3mil dimoun.

Si laplipar distrik i annan 3mil dimoun e letan nou get statistik lasante 3400 dimoun in al kot *casualty*, i vedir par egzanzp i annan dimoun ki'n al 10 fwa ouswa ki'n al 15 fwa! Par egzanzp mwan mon pa'n zanmen ale, petet i annan en kantite nou la anndan ki pa'n zanmen ale, petet i annan bann ki pe ekoute pa'n zanmen ale.

Savedir i annan en labi kot tro bokou dimoun ki pe al *casualty*. E nou'n trouve pli o kantite pasyan ti ganny war

pandan mon pe koz pou 2022 ant Zen ek Zilyet ki en mwayenn apepre 8.6poursan an plis.

Mr Speaker par egzanp letan mon get lo sa latib ki devan mwan, mon trouve ki laplipar mwan ki'n pase dan 2022 - par egzanp si nou get Zanbye i plis dan 3mil, tousala i dan 3mil an montan, e pli bokou ti an Zen ek Zilyet avek 3758 dimoun ki'n al *casualty* pandan lannen 2022.

Mr Speaker sa i levidans i la kantite dimoun ki *casualty* i trouve i bokou, aköz en tre minorite parey loter Mosyon in dir ki in ganny admet lopital. Tan ki a la mazorite zot pa'n ganny admet lopital e sa i levidans ki lamazorite dimoun ki'n vin *casualty* zot pa bann ka dirzans.

Avek en *minimum staff casualty* i pa fasil pou zot kapab *cope* avek la kantite dimoun ki raport *casualty*. Zot pe fer fas avek diferan defi. Par egzanp la lakantite ka ki raport *casualty* ki pa irzan, sirtou bann letan lazournen kot nou konnen ki laplipar klinik i ouver.

Letan ki dimoun i espere pou war Dokter i bokou aköz zot bezwen fer triyaz pou dimoun ki raporte, sirtou ler i annan bokou ka ki pa irzan. Sa ki mon pe sey eksplike se ki letan

dimoun i vin *casualty* zot dir pou dir zot pa pe war Dokter, zot esper bokou letan i annan Dokter pa vini.

Me se aköz bann Dokter i annan lezot taktik ki zot bezwen fer e an menm tan ler zot fer zot triyaz zot bezwen pas dan sa ban kalite kategori ki mon'n eksplike. E i annan de fwa pasyan lo bann zot en pti pe ankoler zot sekirite. E la kot nou trouve i annan bann labi verbal osi ki vini par bann manm piblik, aköz zot pe esper tro bokou letan.

Sa *unit* osi i en pti pe tro ouver, kot tou dimoun i ganny akse avek *casualty*. E annan de fwa nou trouve parey si en pasyan i vini i vin avek en *relatives* annan de fwa, ou trouv diferan group dimoun osi ki antre e sa i en pti pe konzeste sa landrwa.

Mr Speaker avan mon terminen, sa i bann rekomandasyon ki i pa zis nou ki'n war, me selman bann *staff* zot in trouve poudir i annan petet pou nou kapab fer en pe reform dan sistenm lasante, sa bann rekomandasyon swivan petet i a kapab ede;-

En demann spesyal pou pasyan servi zot distrik apropiye dan zot klinik, kot sirtou zot bann maladi ki pa tro

irzan e zot kapab vwar Nersouswa Dokter;

Klinik La Rivyer Anglez i ouver ziska 8er diswar 24 lo 24;

Klinik Anse Boileau i ouver 24 lo 24, savedir apre nou annan Anse Royale Lopital Anse Royale i osi i ouver 24 lo 24.

Savedir dan tou rezyon lo Mahe e i annan en klinik ki nou kapab en pti pe ganny akse avek. E sa ki nou okouran se ki, laplipar distrik i annan en klinik. E dapre WHO in dir nou poudir Sesel laplipar dimoun i ganny akse avek son klinik akoz i pli pti git ki 5 kilomet *apart* ek kanmarad. I pa lwen, savedir dimoun i kapab ganny akse.

E en lot rekomandasyon, i redwir la kantite dimoun ki sirtou bann pasyan ki pe ganny akse avek *casualty* menm ki zot napa okenn demars pou fer laba.

Mr Speaker avan mon terminen, mon pou zis pas en pti mesaz ki ozordi i Lazournen Ipertansyon. E mon ti a pran sa lokazyon pou mwan demann tou bann dimoun sirtou bann Manm Lasanble, annou al tyek nou tansyon en kou, annou pa al *casualty* selman! Annou al tyek nou tansyon pou fer sir ki nou an bonn sante.

E avek sa Mr Speaker mon pou remersi ou pou latansyon

tou dimoun e an menm tan mon pou siport sa Mosyon ki loter Mosyon Onorab Labonte in anmennen. Mersi Mr Speaker.

### **MR SPEAKER**

Mersi Onorab Bistoquet. Mersi pou sa rapel pou mon al tyek mon tansyon. Mon a pas laparol Onorab Michel Roucou.

### **HON MICHEL ROUCOU**

Mersi Mr Speaker. Bonzour tou mon bann koleg Onorab, bonzour spesyal pou tou zabitan Mont Fleuri e osi tou piblik ki deor pe ekout nou.

Mr Speaker annefe sa Mosyon ki anmennen par Onorab Labonte, en Mosyon ki vremen enportan. E mwan mon pa pou koz bokou letan lo la. Mon annan detrwa pti pwen ki mon'n note ki mon ti anvi mon osi met devan.

Mr Speaker i vre ki sa servis kot *casualty* i vremen enportan, me selman mon poudir se ki i mank ledikasyon. I mank ledikasyon akoz i annan bokou keksoz ki mwan menm mwan mon pa ti o kouran, ozordi ler mon'n ekout loter Mosyon e osi Onorab Bistoquet koze, mon pa ti o kouran bokou keksoz parey ti annan sa bann zafer kot i dir ou koumsa sa bann triyaz kot i annan dan ver, dan rouz, mon pa ti konnen.

E mwan mon en dimoun ki souvandfwa mon'n servi *casualty*, espesyalman lo granmaten oubyen aswar swa pou mon zanfan, swa pou mwan menm mwan, kot vre letan ou ale ou vwar ou pe esper sitan bokou letan. Akoz i depan lo sityasyon ki ou'n vin avek e gravman ki lo la.

E mwan mon panse se ki ti ava enportan ki komansman la parey Minister Lasante e tou dimoun nou'n komans koz lo la, kot i annan plis ledikasyon lo la. Akoz? Sa i pou ede demen kot bann manm piblik ki deservi sa fasilite, i konnen poudir byen boner petet nou devret al kot klinik, fer sir poudir tou keksoz i *ok*.

Me selman Mr Speaker ou pa konnen kwa ki kapab arive dan lannwit oubyen lo granmaten. E souvandfwa ki nou war, i annan bokou dimoun pe marse byen zot, marse byen zis lo granmaten oubyen aswar i zis i pa santi li *ok*.

E parey ou konnen poudir konmela lavi i sitan frazil, zis i desann i dir "mon a desann en kou anvi ki *casualty* i ouver, mwan mon a desann en kou *casualty*, zis pou fer sir poudir mon pa war mwan dan en sityasyon en pti pe pli grav".

E ler ou ariv laba san ekspekte ler i teste ou, i war poudir ou tansyon i o, ou war? Be non, Onorab Rosie pe dir mwan kekfwa i devret al teste pli boner. Ou, ou pa konnen ou dan lazournen ou *ok*, me selman dan milye lannwit ki ou santi poudir ou pa santi ou ki demann pou al fer en pti gete.

Mr Speaker apre osi ler ou pe gete nou bezwen ofer piblik la deor sa opsyon. Ler mon ti pe koz avek mon bann lezot koleg Onorab yer - mon ti pe koz ek Onorab Kelly, i ti pe fer mwan ganny en konpran poudir ovan i annan sa servis ki ganny donnen 24 lo 24.

Parey in ganny dir dan distrik Anse Boileau i enn, apre Anse Royale. Me ler ou pe get lo kote nou sirtou lo kote anvil, lo granmaten oubyen lo aswar la, nou napa lezot opsyon. Sel opsyon se vin *casualty*. Oparavan nou ti kapab al Larivyer Anglez, be pou le moman la Larivyer Anglez i ouver ziska 8er ki aprezan apre 8er zabitan napa lezot swa, se al *casualty*.

E mwan mon krwar poudir Minister Lasante revwar re donn nou sa servis lo kote Larivyer Anglez. Mon konnen zot annan sa problem lo kote *staffing* li menm li, me selman rod en fason ki sa i ava tir sa

presyon lo kote *casualty* li menm li, kot nou ava war kot i annan sa kantite dimoun ki vin deservi sa servis, i ava desann.

E osi Mr Speaker petet lo kote nivo ledikasyon li menm li, ozordi bann sif ki'n donner, se pa sa zafer kouler rouz, ler ou vini i get ou si ou dan ver. Vini eksplik ek Lepep Seselwa. Ler ou vini souvandfwa ler mwan mon *casualty* - mon *casualty* i ariv en lensidan kot mon war tou Ners i taye i al laba nou, nou pa *mind* ek sa nou.

Me selman si i annan sa opsyon ki dimoun i kapab deservi i annan en lot landrwa i kapab ale, sa i pou ed sa fasilite. E *casualty* i tonm dan mon distrik Mont Fleuri, e Mont Fleuri li menm li i baz avek plizyer lezot distrik Bel Air, Les Mamelles, Roche Caiman e lezot ankor ki sa i sanmenm sa ki annan sa *volume* dimoun ki desann laba.

Akoz lo sa kote sa rezyon ki la, si ou en pti pe pli pre avek Cascade, Pointe Larue petet ou kapab tay en pti kou Anse Royale. Be ler ou dan sa rezyon koumsa la, mazin en i annan Beau Vallon, Glacis osi tou, dimoun definitivman i pou vin deservi sa fasilite ki la.

Mr Speaker sa i enn de mon propozisyon ki mwan mon anvi met devan. Mon pou donn

mon sipor sa Mosyon. Mon pou donn mon sipor sa Mosyon aköz i vremen enportan. E osi mon oule servi sa moman la pou mwan dir, mersi.

Mersi bann Ners, Dokter, bann travayer ki travay kot *casualty* ki pe donn sa servis. I malere souvandfwa nou ganny en konpran avek fristrasyon piblik la deor petet ler zot vini. I depan gravman zot sityasyon, ki zot pa ganny sa servis toudswit e souvandfwa ou war e nou, nou donn zot en sipor. Ou kapab mazin enn de.

Dan mon distrik i annan bann Ners, mon menm annan en vwazen Mrs Nathalie Mathiot ki reste o bor mwan ki en Ners.

E osi mon annan lezot ankor, mon annan Mis Bernice, Charlette Volcy ki en *Nurse Manager* lopital ki souvandfwa i osi i vin ede dan letan aswar. Mon oule dir zot mersi, Mr Speaker mwan mon donn mon sipor Mosyon ki anmennen par Onorab Labonte. Mersi.

### **MR SPEAKER**

Mersi Onorab, mon a donn laparol Onorab Bernard Georges.

### **HON BERNARD GEORGES**

Mersi Mr Speaker. Mr Speaker mwan osi mon ti pou neserman koze bomaten, me

mwan krwar ki i esansyel pou nou fer le pwen lo sa Mosyon. Akoz i en Mosyon enportan e son lenportans mon krwar i vin pa dan sa ki i pe demande akoz sa i evidan, me dan sa lenformasyon ki nou bezwen pas avek nou piblik.

Egzakteman parey Onorab Roucou ki'n koz avan mwan, mwan osi bomaten mon'n aprann plizyer keksoz. E menm dan sa laprantisaz, i paret ki i annan serten, serten keksoz ki detrwa nou, nou pe mazin dan en serten fason, me kekfwa i pa koumsa.

Mr Speaker le pwen ki loter Mosyon pe fer i senp, annou silvouple servi *casualty* ki en servis *accident and emergency* parey nou dir dan bann lezot pei, pou *accident and emergency*. Annou pa servi li koman en klinik apre ler.

Mon krwar se sa demann sa Mosyon e pa war ki i annan okenn dimoun ki dan son bon lespri ki pa pou dakor avek sa propozisyon. *Accident and emergency casualty* i bezwen la pou bann *emergency* oubyen pou bann aksidan. Bann lezot dimoun ki annan lezot problem, dan lazournen zot al dan zot klinik e aswar ler zot klinik in fermen, zot al kot enn ant sa 4 klinik rezyonal ki pli obor avek zot e ki pli apropiye.

Si sak ti annan 4 klinik rezyonal Anse Boileau, Anse Royale, Larivyer Angle avek Beau Vallon, Bel Ombre pa ti pou bezwen ler ou annan en problem ki pa en aksidan oubyen en *emergency*, pou ou al *casualty* Mont Fleuri.

Si tou keksoz ti koumsa pa ti pou annan okenn problem, pa ti pou annan okenn nesosite pou sa Mosyon bomaten, apard donn lenformasyon e eksplik avek nou pep *including* nou isi dan sa Lasanble, ki pe aprann ozordi, ki mannyer nou devret pe azir.

Me, me, e la mon demann, mon demann en leksplikasyon. Eski i annan en klinik ki ouver 24 lo 24 dan sa 4 rezyon? Eski – (nou'n ganny dir wi), eski Klinik Larivyer Anglez i ouver 24 lo 24 oubyen i ferm 8er diswar?

Si i ferm 8er diswar napa okenn dimoun ki pou reste dan rezyon lavil ki pou al Anse Royale, Anse Boileau oubyen Beau Vallon, Bel Ombre. *Obviously*, zot pou desann *casualty*, e la kot problem i vini. Me si Klinik Larivyer Angle i ouver 24 lo 24 napa problem.

Sof ki, sof ki parey Onorab Roucou in dir si ou reste Hermitage e *casualty* i 100 met avek ou, ou pou tande pou *slip*



lanmenm la, olye al desann Larivyèr Angle. - I dan natir imen pou ou esey al tap en laport ki pli pre obor ou olye al tap en laport ki pli lwen.

Me si e mon dir si akoz mwan mon pa sir bomaten apre sa ki mon'n tande ki i annan en laklerte dan sa sityasyon.

Si sa 4 klinik i ouver 24 lo 24 dan sak rezyon Sesel, Mahe epi Praslin, La Digue i annan sa ki pou zot, e zot kapab aport en swen a popilasyon sa rezyon ler zot bezwen, dan sa ka *casualty* i kapab ferm son laport avek bann dimoun ki pe zis vin la, pou en rezon ki pa en aksidan *or emergency* e refer bann dimoun - sa bann dimoun avek zot klinik apropriye.

E mon krwar se sa ki nou bezwen fer le pwen ozordi Mr Speaker. E dir avek Gouvernman atraver sa Mosyon, donn en pe plis leksplikasyon. Eksplik avek dimoun egzaktman ki zot devret fer, tel parey sa Mosyon pe fer la bomaten, dan en fason ki tou dimoun ava konnen ki zot bezwen fer. Servi zot klinik.

E la mon profite pou remersye tou bann Dokter avek Ners ek bann lezot travayer klinik Les Mamelles pou sa travay ekselan ki zot fer, mwan mon servi mon klinik dan mon distrik sak fwa ki mon bezwen e

mon resevwar en tretman apropriye e efikas.

E la ozordi apre lapel Onorab Bistoquet, mon pou fer sir ki mon al pez mon tansyon, kek fwa pa ozordi akoz lazournen in komanse e dan Lasanble tansyon annan de fwa i mont en pti git. Me *at least* demen bomaten ler mon azen mon ava al laba, mon ava fer sa. Alor remersye sa bann travayer devoue dan klinik Les Mamelles.

Nou ava donk koman bann zabitan nou distrik oubyen bann zabitan sa *catchment area* ki ganny deservi par en klinik, nou ava al dan nou klinik ler nou annan en problemm lazournen. Nou pa pou al *casualty*.

Me ler problemm i ariv apre ki nou klinik in fermen, nou ava konnen ki *unless* ki i en *accident* oubyen en *emergency*, nou ava al dan nou klinik rezyonal ki ouver 24 lo 24. Si-si keksoz i mars koumsa e si nou ganny sa lenformasyon, e si sa lenformasyon i ganny pase avek tou dimoun Mr Speaker apart tantasyon bann dimoun ki reste o bor *casualty*, pou zot al *casualty* akoz i pli pre avek zot, ki en tantasyon ki nou pa pou kapab anpese, apard avek lenformasyon ek ledikasyon

*over a period of time*, nou pa pou annan problem.

Nou a konnen ki lizour kote nou bezwen ale, nou a konnen apre 4er kote nou devret ale oubyen apre ki klinik dan nou distrik i fermen, kote nou devret ale.

E nou a konnen kote *accident and emergency* sa ki nou apel *casualty* isi i ava la pou son rezon apropiye. Alor Mr Speaker avek sa detrwa mo, mon anvi remersi loter Mosyon avek Onorab Bistoquet ki'n segonn sa Mosyon, pou lefe ki zot in anmenn sa leklersisman devan nou ozordi e ki zot in permet nou pas sa mesaz avek nou popilasyon.

E i reste zis pou demann parey Mosyon i demande avek Minister Lasante, pou fer en sistenm kler, pas sa mesaz, pas ledikasyon, pas lenformasyon pou ki tou dimoun a konnen egzaktaman ki klinik zot bezwen servi a nenport ki moman. Mon remersye ou Mr Speaker.

**(APPLAUSE)**

**MR SPEAKER**

Mersi Onorab, mon a donn laparol Onorab Egbert Aglae. Wi, *oh* ou ti a kontan pran laparol avan? Mon a donn ou

plas Onorab Aglae i a pran ou plas? Onorab Pillay.

**HON SEBASTIEN PILLAY**

Mersi Mr Speaker. Bonzour Mr Speaker mon'n santi ki mon bezwen fer li mon devwar pou entervenir avan, akoz i nesaser pou nou serye dan Lasanble. I nesaser pou nou serye akoz nou bezwen konnen kwa egzaktaman ki nou bezwen koz lo la, e ki nou pe koz lo la?

E mon krwar nou bezwen fer sa lo lapar lo piblik Seselwa, akoz i enportan parey nou'n vwar yer sa *attempt* ki'n ganny fer - sa lesey ki'n ganny fer pou sey kasyet larealite keksoz, ozordi ankor dan Lasanble pe ganny fer.

E i pe ganny fer dan en fason ki pe montre en konfizyon lo lapar parti Gouvernman, lo kwa egzaktaman ki nou sipoze pe diskite dan Lasanble. Mr Speaker premye fwa sa Mosyon ti aparet lo en *Order Paper*, sete lo *Revised Order Paper* le 18 ek le 19 Avril.

Sa ti premye fwa sa Mosyon ti aparet lo *Order Paper* e i fer lapenn pou vwar menm en profesyonnel lasante ozordi, dan plas koz lo bann problem ki arive dan lasante, in fer en matematik ki konpletman fo e ki menm son koleg Onorab

Roucou in koriz li e in montre li ki manner sa matematik i fo.

Ler ou dir en dimoun in vin plis ki 10 fwa *casualty*, me Onorab Roucou i en dimoun ki'n dir ou in al plizyer fwa *casualty*. Si en dimoun i annan 5 zanfan i ganny drwa al 5 fwa. E dan plas koz lo problem kot i ete nou vin blanm piblik e vin koz lo labi.

E se sa ki pe arive bomaten mon pa kapab reste trankil i les sa kontinyen, Mr Speaker sa Mosyon e la mon ti a kontan ki ler sa zournalis *SBC* ki pran son letan pou li fer rapor lo Lasanble Nasyonal, i met larealite devan.

Sa Mosyon ti dir koumsa "Prenan kont bokou konsern lo servis *casualty* kot Lopital Sesel, Lasanble pe demann Minister Lasante pou reform sa servis ki i pa fonksyonnan koman en klinik normal, me ki ganny servi koman bann ka dirzans, prenan kont bokou konsern lo servis *casualty*." Sa ti Mosyon ki ti lo *Order Paper*.

Sa Mosyon in ganny sanze apre pou li dir "prenon kont bokou konsern lo labi servis *casualty*" pou tir responsabilite lo Minister Lasante ek son *leadership* ki pe *fail* pou *deal* ek problem dan servis *casualty*, e met responsabilite servis *casualty* lo manm piblik. Se sa

ki pe arive ozordi bomaten dan Lasanble Mr Speaker.

**(APPLAUSE)**

### **HON SEBASTIEN PILLAY**

E dan plas aksepte sa plizyer defayans ki annan dan sa servis, kot manm piblik ki'n al servi servis *casualty* in ganny letan menm mor dan lopital, nou vini nou vin blanm larestan piblik poudir zot pa bezwen al lopital, pa bezwen isi pa bezwen laba.

E mon kontan, mon kontan *at least* detrwa zot in realize ki napa en klinik *casualty* dan nor. Alors tou pasyan sorti Beau Vallon, Glacis, Bel Ombre, e St Louis e Anse Etoile pou devers lo *casualty* aswar. E mon problem se ki menm bann *meeting* piblik pe montre ki kalite defayans sa Gouvernman i annan, me *still* sa bann *MNA* i kontinyen vin dan sa Lasanble e dir ou tou keksoz i an roz zis parey yer ti annan.

E sa labitid sanz Mosyon in ariv ankor yer. Yer nou pa'n koz e lo sa Mosyon akoz vre lentansyon Onorab ki'n move son Mosyon malgre in enplor lagras Bondye. Sete poudir ki lo tou bann proze ki Gouvernman avan pa'n fer in zis promet, e

son Mosyon ti ganny amande par li menm.

Aprè vin demann nou pou koz lo sa Mosyon. I annan en malonnekte ki pe pase dan Lasanble Nasyonal ki nou pa devret les arive. E nou regard larealite an fas. Larealite yer Vis-Prezidan in vin dan sa Lasanble in donn nou en bann sif, mon osi mon konn fer matematik.

Si nou pran 31 *trip*, 5 zour *allowance* 150 zour *allowance*, R40mil *allowance* i vin R6milyon. Sa i pa'n koz lo la yer e ozordi ler nou koz lo sa ta pasyan ki vin dan servis *casualty*, mwan resaman mon'n al dan servis *casualty*.

Mon zanfan in ganny koupe, mon'n ale mon osi. Problenm i pa avek pasyan ki vin servi *casualty*. Problenm i vin avek *management* sa servis, akoz bann *staff* pa pe ganny *led* dan en fason ki donn zot en direksyon kler lo kwa ki zot sipoze pe fer!

Oubyen lo sipor ki zot bezwen annan, kot sa servis. E nou vin dan Lasanble nou dir labi lo servis *casualty*, me ki mannyer nou pou adres labi si servis li menm i pa alaoter? Ki mannyer nou pou adres labi si servis li menm i pa alaoter, ki mannyer nou kapab krwar zot si kontinyelman si

kontinyelman zot vin dan Lasanble zot kontinyen sey *mislead* dimoun lo sa realite ki pe pase deor?

Mr Speaker lo mon kote latab nou pou koz lo realite sa servis, se sa ki pou arive ozordi bomaten. Mersi.

**(APPLAUSE)**

### **MR SPEAKER**

Mersi Onorab. Mon a donn laparol Onorab Norbert Loizeau.

### **HON NORBERT LOIZEAU**

Mersi Mr Speaker. Bonzour tou Manm, Mr Speaker mersi pou donn mwan sa sans pou mwan entervenir lo Mosyon. Parey nou konnen Mr Speaker servis *casualty* in en servis ki'n la pou en bon pe lannen, i pa en servis ki fek ganny entrodwir 2020 ler *LDS* ti antre dan Gouvernman.

Bann problenm kot *casualty* i en bann problenm ki'n egziste pou en bon pe letan, menm avan ki nou, nou vin dan Gouvernman. E se sa rezon ki nou, nou pe sey rod fason pou sey adres sa bann problenm. Ler mon'n ekout bann lentervansyon Mr Speaker, mon get lakantite pasyan ki bann sant lasante pe resevwar par zour Mr Speaker.

E sirtou pandan lannwit ler mon get sa lakantite ka laplipar di-tan pandan lannwit i bokou plis, i en pti pe plis parfwa ki pandan lazournen - Mr Speaker i montre nou ki pandan bann lannen nou'n devlop en pep ki malad Mr Speaker, e ozordi Lasante pe anmas en bann lenfirmite pou kapab *deal* avek sa bann sityasyon parey.

E servis *casualty* kan ki servis *casualty* i ganny servi plis par dimoun, par bann pasyan. Mr Speaker se pandan lannwit, akoz pandan lannwit? Se sa letan ki dimoun zot enkyet parfwa akoz zot pe al dormi, en dimoun ki annan en pti mo.

Parey mon tantin i kontan dir, tantin Madeleine. Mon annan en pti mo, ler zot annan sa pti mo la pandan lazournen zot pa fer naryen. Pandan lazournen zot fer tou sa ki zot annan pou fer, me pandan lannwit Mr Speaker ki sa lenkyetid i vini.

Akoz? Pandan lannwit ler ou pe *relax* ou lekor i *relax*, petet sirkilasyon i sanz fason. Si ou annan en pti pike lo ou lipye, se sa moman ki ou santi douler, pti lafreser pe komans antre e sa i fer ki tou dimoun alors i tay *casualty* pou zot al war en Dokter.

E konmela Mr Speaker dimoun i per, dimoun konmela koman zot santi en pti keksoz dimoun i tay lopital! Konmela Mr Speaker ou kapab mazine en pti latet fermal, lontan ki en pti latet fermal, lontan ki en pti latet fermal ou bwar 2 panadol, en malad zorey lontan ki malad zorey si konmela i serye Mr Speaker.

En klou lo ou lekor, lontan ki nou ti fer? Nou ti met en fey piman, konmela al met en fey piman lo ou klou ki ou gannyen lo ou lekor, ou *end up* dan 4 plans Mr Speaker! Keksoz in sanze, konmela ler en dimoun i ganny en klou i bezwen al lopital pou al koupe, klou in nepli kas son latet parey lontan ou dir ou pet son latet, i sorti.

Latet pa sorti e dimoun i per, e pandan lazournen ler zot in ganny sa zot, zot pa ale zot. Pandan lannwit ler latet klou i oule sorti la, lanmenm ler ki zot anvi al lopital e sa i met presyon lo nou sistenm *casualty*.

E ozordi Onorab Bistoquet in koz bann ka ki vini, i annan bann letan ki kritik.

Mr Speaker konmela en senp pti keksoz, i kapab met ou dan en leta kritik. La i fer mwan mazin mon annan en zanmi en pe letan mon pa'n war li, akoz ler mon zwenn li i dir mwan "ou

konnen mon madanm in mor?" sanmenm ou pa'n war mwan.

Mon dir wi, mon dir be ki in gannyen? I dir mwan be mon ti pe travay Praslin, mon fiy i *call* mwan i dir mwan madanm in ganny 2 boul kot son likou. Zwer i desann vitman, i pran madanm i anmenn lopital. 2 pti boul kot son likou, ler bannla i analize *pancreas*, kanser *pancreas*, zis 2 pti boul likou in gonfle Mr Speaker.

En pti kou problemm i ariv kot *pancreas* e son madanm in *passed away*, in kit li avek 2 zenn marmay. En pti keksoz in vin en leta kritik! Konmela nou pa vwar en pti keksoz i pa kapab vin kritik. Sanmenm sa ki fer Seselwa per.

Seselwa konmela i per Mr Speaker - dimoun i mor koumsa. Ozordi ou war mwan pe pase, demen ou tande mon'n mor. Se pou sa rezon ki konman mon ganny en pti mo Mr Speaker, nek nou tay lopital Mr Speaker.

E ozordi i annan dimoun - mon konn en zanmi, nou ti dan en fonksyon nou de Onorab Arissol, ti annan en zanmi la pe akont mwan i dyabetik li, i ti ganny zis en pti bouton. Ou konnen ler ou ganny en pti bouton ek en pti zimer devan, zis ou kas li lontan, ou kas li ou

peze ou geri, zwer in ganny en pti bouton zis in grate.

Ler in fer levanter lipye in sa groser, e si i pa ti fer atansyon, i ti'n perdi son kote lipye. En pti sityasyon sa, me selman i kapab vin kritik! Ozordi dan nou pei i annan tou sort kalite maladi Mr Speaker, ki zis devlope, nou pa konnen ki fason pou *deal* avek.

E se sa ki fer dimoun per, ozordi en dimoun in ganny en latet fermal. I leve gran bomaten i deside i santi li i ganny en lanvi al *toilette*, i ale i al lo *toilette* i ganny en sok i mor. Konbyen fwa in arive? I ganny en sok i mor.

Mr Speaker konmela lavi in sanze, e keksoz i vin pli serye ozordi. Onorab Pillay pe koz nou pa serye. Ozordi nou pe koz lo la nou, koman Manm *Caucus LDS*, ti annan en sesyon ki nou ti ganny envite avek Minister Lasante le 5 Me, tou Manm Lasanble ti ganny envite, enkli Clerk, Speaker nou ti vini nou, Madanm Clerk ti la.

Napa en Manm *US* ki ti enterese Mr Speaker pou vini!

**(APPLAUSE)**

**HON NORBERT LOIZEAU**

Pou vini, pou konnen ki problemm lasante pe pas ladan! Me sa Lasante Mr Speaker, sa

Minister Lasante menm dimoun ki ti pe travay anba *US* laplipar zot, zot *still* la!

**(APPLAUSE)**

**HON NORBERT LOIZEAU**

Eski en Minister Lasante ki'n fek la 2020? Fek ne yer 2020 ler Prezidan Ramkalawan in vin o pouvwar aprezan i annan tou sa bann problem? Mr Speaker sa bann problem i bann vye problem, dimoun mor anba klinik lo klinik kot *casualty*, fek mor an 2020?

Pandan tou sa bann lannen ki zot in o pouvwar, konbyen dimoun ki'n *passed away* lo ban lopital Mr Speaker? Konbyen? Kot *casualty*, fek arive la Onorab Pillay atraver ou Mr Speaker? Lontan pe arive!

Annou pa servi sa konmsi en palto fann deryer, konmsi tou sa bann keksoz ki pe arive la se Ramkalawan ek son ladministrasyon, ki pe fer sa arive kan problem lontan i la.

Mr Speaker zot pa'n partisipe, ou ti la, ou rapel? Ou a demanti mwan Mr Speaker. E sa ta lenformasyon ki sa bann profesyonnel dan Lasante, bann profesyonnel ki'n ganny *train* anba zot Gouvernman Mr Speaker ki ozordi i ankor pe travay kot Minister Lasante, e

pe fer en travay ekselan, enkli mon madanm Georges i dir, wi. profesyonnel lasante.

**(APPLAUSE)**

**HON NORBERT LOIZEAU**

Mr Speaker ozordi mwan mon kapab dir mon en Dokter, akoz mon konnen sa bann keksoz ki pase, parfwa Onorab Arissol dan bann konversasyon ek bann dimoun, de koman i ariv en pti *issue* lasante nek mwan mon vini mon sot lo la. Li i dir ek bannla, *eh* be li en Dokter li.

Mr Speaker mon konnen, mon swiv mon war travay ki serten dimoun dan mon *household* i fer mon swiv, mon war, mon konnen.

40mil dimoun dan 1an pe al *casualty* Mr Speaker nou annan en problem. Pou si ou annan 5,6 zanfana, me par kont Mr Speaker i annan dimoun ki li i pe al 5,6 fwa. Mwan mon pa mazine ki dernyen fwa mon ti al *casualty* mwan. Mon pa dir mon 100poursan *fit*, mwan osi mon ganny mon pti mo Mr Speaker, me selman i annan de letan mon tenir. Mon tenir, mon gete ki mannyer i ete, mon rod *advice* avek lezot dimoun.

Mr Speaker an konklizyon, mon anvi demande ki nou anvi war pou Minister Lasante? E se sa ki Minister

Lasante ti fer sa sesyon, ki Manm US pa ti vini ankor enn fwa pou zot kapab donn zot *input*, parey ki Onorab Pillay pe fer.

I pa partisip dan naryen li, ek son tim, selman zis i vini i konplent i vin montre nou manner pou fer. Zot ti ava'n vini. Ou ti ava fer sa matematik pou sa bann profesyonnel lasante, ki ti pe donn nou serten keksoz ou ti ava ed zot.

Ler nou ti al Lasin, nou ti travay ansanm koman en lekip. Nou ti Seselwa, nou ti Seselwa nou ti travay byen ansanm ek li i ti *leader* delegasyon, demann li nou ti travay byen, nou ti fer keksoz ansanm, nou ti siport kanmarad. Me akoz ler nou Sesel nou pa kapab fer sa?

Akoz ler nou Sesel nou pa kapab fer sa? Ki ler nou deor nou travay koman Seselwa? Mon pa pe dir naryen mal Onorab Pillay. Nou ti travay byen ansanm ki vre, nou travay byen ansanm. Me la osi nou bezwen travay ansanm koman Seselwa, Sesel pa pou Ramkalawan, pa pou Prezidan Ramkalawan pa pou LDS - Sesel i pou nou!

Ler nou Minister Lasante i *fail* se Sesel ki tonbe. Si en zour i arive '2000 zanmen' zot antre dan Gouvernman, zot pou anvi en lasante ki'n tonbe? I pa pou

bon pou zot, i pa pou bon pou zot. E zot, zot pa'n aranze Onorab Cosgrow atraver ou Mr Speaker. Zot, zot pa'n aranze.

Zot pe koz nor - dan nor napa en sant *casualty* pou deserv... me tou sa bann letan zot pa'n mete? Zot ti la zot, zot pa'n mete! Ozordi tou sa ki zot pa'n mete, ki zot pa'n fer ozordi zot le nou fer. Me sa i zis vini i fer sa?

Nou fer ler nou kapab fer, parey la nou pe fer Lopital La Digue nou'n ganny en don e nou kapab fer, nou pe fer. An konklizyon Mr Speaker mon anvi war en servis 24 lo 24 dan bann distrik? Ki nou anvi Mr Speaker? Annou ankouraz nou bann zenn pou pran bann profesyon Ners, Dokter bann spesyalis dan diferan domenn.

Ozordi *casualty* i bezwen plen, akoz nou pa kapab ouver sa bann lezot sant 24er i annan. Nou napa ase mendev nou bezwen rod mendev etranze, ki dapre sa sesyon si zot ti vini - mon pa konnen si mon matematik i bon mon pa tro, tro konn konte, mon'n lekol kot Mer Koulev ek Frer Lezar zot a dir mwan si i byen.

Ozordi en profesyonnel etranze, ou konnen konbyen zot pe demande pou vin travay Sesel? \$10mil, *basic* sa ler mon'n miltiplir par 15 i tonm



R150mil. Nou napa Seselwa dan sa domenn, dan sa bann domenn pou nou kapab mete dan sa bann landrwa. Nou napa! Nou bezwen rod etranze. R150mil. Si nou ti annan Seselwa ki anvi ki nou sistenm Lasante i bouz devan vini, pran lasante koman sa seksyon kot zot anvi travay Dokter, Ners, Sirizyen.

Pou nou kapab annan otan dimoun pou nou met dan sa bann landrwa, olye pey en etranze \$10mil, R150mil. Annou pey sa Seselwa R150mil osi, ki en fason i ava reste dan son lanplwa, e nou a fer sir ki nou bann sant lasante nou annan bann Seselwa kalifye ki pou kapab fer sa.

E la Mr Speaker mon anvi dir avek Minister Lasante, parfwa ler nou bann profesyonnel i deside kite, i dekouraze, nou bezwen anmenn li gete ki problem, la ozordi nou annan Dokter. Sel Sirizyen fanm ki nou annan nou tande in kite. In kite i pe ale, mon pa konnen ki son - me nou pa kapab rode? Ki ou problem? Ki arive?

Nou bezwen konpran, akoz nou pa kapab en profesyonnel lasante a en o nivo zis kit Minister Lasante koumsa, e nou, nou les li ale. Nou bezwen ankouraz nou

bann dimoun pou reste dan lasante.

An terminan Mr Speaker mon anvi felisit tou bann travayer lasante, bann Dokter, zot tou ki malgre pti gin resours zot pe fer en travay formidab.

E mon anvi dir zot mwan koman en Manm Lasanble mon pou toultan siport zot Bidze. Mon pou toultan ankouraz zot. Akoz mwan laplipar letan mon pas lopital ler mon al sers mon madanm. Mon zwenn en ta dimoun dan lasante koman mon vini tou dimoun i oule koz ek mwan Mr Speaker.

Zot tou zot annan en keksoz pou dir mwan, mon anvi dir zot mwan mon pou fer sir ki mon pou pase zot problem devan. E mon pou siport zot dan tou keksoz, dan tou zot demars ki zot pe fer, pou fer ki nou lasante i *upgrade* zot nivo e ki Lepep Seselwa ava fyer de zot. Mersi Mr Speaker.

**(APPLAUSE)**

**MR SPEAKER**

Mersi Onorab. Mon a pas laparol Onorab Richard Labrosse.

**HON RICHARD LABROSSE**

Mersi Mr Speaker. Bonzour Mr Speaker, bonzour tou dimoun ki a lekout. Mr Speaker mon pa

pou long lo sa Mosyon, parski tou bann bon pwen in fini preski sorti.

Devan nou ozordi bomaten i annan en Mosyon ki pe koz prenon kont konsern lo servis *casualty* kot Lopital Sesel e Mosyon pe demann Gouvernman atraver Minister Lasante pou asire ki sa servis i ganny servi pou bann *emergency* selman.

Mr Speaker ler nou pe koz lo labi lo servis *casualty* dan Sesel, ler mon pe get sa Mosyon, mon pe get li dan 2 diferan fason, wi Mr Speaker nou merit rekonnèt ki wi i kapab annan labi. Me dan en lot fason ler mon get li parfwa i annan dimoun ki servi sa fasilite, swa zot pa konnen si zot pe vremen fer labi lo sa sistenm.

Kwa ki fer mwan dir sa, mon a donn en legzanp. Mon reste Belvedere, dan 9er diswar mon pa santi, mwan pa byen klinik Mont Fleuri in fini fermen depi 4er, dan mon lespri mon fason pli vit pou mwan ganny lasistans medikal se *casualty*.

Sa i koumsa pou plizyer fason en plizyer dimoun in servi sa fason dan plizyer deseni, plizyer lannen. Kestyon eski nou pe abiz sa sistenm *casualty*? Sa i mon fason panse.

Nou tou nou konn byen kwa en servis *casualty*. Par egzanp legzanp ki mon'n donnèn, en ler fason pli vit fason pli fasil parey bokou entervenàn avan mwan in dir. Pou nou ariv lo en servis ki en pti pe pli pres avek nou.

Parfwa souvandfwa, parfwa souvandfwa ler nou ariv *casualty* li menm li i en, i annan diferan form parti servis ki i ofer. I annan lanbilans osi ki enn ki ganny deservi bokou par bann dimoun ki dan son bezwen. I osi annan bann servis dirzans kot bann Dokter ek Ners ki la pou asiste dan bann ka ki nou apel dirzans swa aksidan ouswa lezot keksoz ki *related* avek.

Wi Mr Speaker nou tou nou konnen ki nou kapab al Larivyer Anglez parey zot in dir ki i sipoze osi en klinik ki 24er, me parey mon'n dir parfwa plizyer swa parey dimoun dan mon rezyon kot mon reste, nou pou plizoumwen servi *casualty* akòz parfwa i pli pres ek nou.

*Casualty* li menm li ler nou pe gete i en servis ki la, ki parey in ganny dir, i sipoze deservi bann ka dirzans. Me kestyon ki bokou dimoun pe demande, eski i annan okenn ledikasyon osi ki'n ganny fer an lepase ouswa konmela, ki pe vremen edik dimoun lo kwa en

servis *casualty*, akoz ki en pasyan i sipoze al servi *casualty*?

Kekfwa bokou dimoun pa konnen, me dan bann resers osi ki mon'n fer atraver sa pou mwan vin koz lo sa Mosyon, servis *casualty* i pa sa servis kot ler ou vini en servis *first come, first serve*. I en servis ki ganny gete lo gravite ou maladi oubyen sa servis ki ou bezwen.

Pandan resers lo sa Mosyon mon'n bat ek en lartik lo Zournal Nasyon date lo 18 Me 2012, kot Dokter ansarz sa letan ki ti pe ansarz *unit casualty* Dokter Henriette ansanm avek Sirentandan Lapolis ti zwenn ansanm Mr Jean-Paul Quatre ti zwenn ansanm pou zot fer en *press conference* ansanm, pou zot donn en pe ki sa letan ti annan en lenkyetid lo ki mannyer sa servis li menm ti pe ganny servi, sa mon pe koz an 2012, en?

Dapre sa, dan sa menm lartik sa letan, sa servis kot *casualty* ti pe ganny ti'n desot kontrol dan en fason kot menm bann dimoun ki ti pe servi, ki ti vin kot *casualty* pou ganny sa servis ti vwar zot pe esper plizyer letan lo ban. Ouswa menm zot pa ti pe ganny larepons parfwa ek bann profesyonnel ki ti la.

Me sa li menm li ti devlop dan diferan fason, kot ti annan form labi verbal ki ti ganny fer bokou e sa ti al desot kontrol parfwa kot i ti ariv i ti vin fizik li menm. E osi dan sa menm lartik osi ler mon'n lir, in fer osi resorti parey mon'n koze taler lo servis lanbilans, ki form parti servis *emergency* kot *casualty*.

Lanbilans par egzanzp nou'n tande menm dan sa *forum* kot nou bann *MNA* nou ti asiste avek Minister Lasante, kot parfwa i pa vreman neserman en dimoun i bezwen servis lanbilans, me parfwa osi nwizans kot zis dimoun ti pran sa limero kot en lanbilans ti ganny deplase pou al lo en *site*, ki pa ti vreman annan en ka ki ti pe arive. E sa dan en sans parfwa i ti met retar lo servis en dimoun ki ti vreman bezwen servis, sa servis lanbilans.

Me ankor enn fwa parey mon pe dir, ler nou ti dan sa konferans ler nou ti pe demann kestyon lo la, eski i annan bann fason Lalwa e kekfwa ki mon vwar i merit vin anfers. Ouswa kekfwa Minister Lasante zot merit vin ek en Polisi en pti pe Polisi pli kler lo lafason ki zot donn servis.

E ler nou pe koz lo Polisi pli kler mon krwar avan nou al lo tousala ankor enn fwa

ledikasyon parey bann lezot Manm in dir pli boner, i merit vin sa pwen kle ler nou pe antre dan sa bann laliny. Parey mon pe dir parfwa en dimoun i vin kot *casualty*, i pa neserman vre i pe vin servi labi, me in vin la aköz i fasilite pli pres o bor li ki arive pou li vin servi li.

Si ou pe koz mwan mon pe reste Plaisance ou pou dir mwan al kot English River, ler nou pe koz transportasyon pou ariv laba. So, ankor enn fwa mon pou al kot *casualty*. E prezan ler mon e vin kot *casualty* mwan, eski la prezan i sa landrwa normal kot mon sipoze vini si ou pe dir mwan English River i sipoze annan en servis 24er?

E ki bann lezot keksoz ankor, ki bann lezot edikasyonnel ankor ki bann dimoun i bezwen konnen avan ler maler i arive.

Akoz ler en keksoz i arive parey nou'n dir, lanmor ek sa vitman konmela, tou dimoun i tay kot sa ki pli pre pou li ganny asiste. So, la ankor enn fwa parey mon pe dir ou, ler nou pe koz lo labi Mr Speaker, nou osi nou bezwen antre en pe dan sa program edikasyonnel. Mon pa konnen vreman si kot Minister Lasante zot annan en departman pou sa, me si i annan mon krwar zot merit en

pti pe pli proaktiv, pou pa zis lo *casualty* me bann lezot servis ankor ki Minister i donnen.

Lo bann lezot kritik ankor ki dimoun kekfwa i annan, aköz parfwa dimoun zot koze zot dir nenport zot dir keksoz ki zot pa pe ganny edike lo la. Sa ki mon santi kekfwa dan epi an zeneral parfwa i annan bann pti *misunderstanding*.

E osi kot *casualty* kekfwa ki bokou dimoun pa konnen parey in ganny dir bomaten, i annan bann triyaz ki ler ou vin kot *casualty* avan ou war Dokter ouswa vwar Ners.

Ankor enn fwa mon pa ni ti konnen si ti annan tousala, mwan ler mon'n vini mon'n malad mon latet kekfwa depi apremidi mon pa'n ganny sans ale kekfwa mon ti pe travay mon pa'n anvi sorti dan mon travay, mon dir mon ava esper 8er sonnen mon ava al kot *casualty*.

Ler mon vini mon pa war personn oubyen mon war 2 dimoun pe asize lo ban, mon vini mon donn mon non. Mon vini 8er mon donn mon non, 10er mon war mon ankor pe asize. Kekfwa la kot fristrasyon i leve mon pa konnen si ler mon vini i annan en sistenm triyaz kot pou dir be si ou ganny asma ou pas avan, ouswa si ou ganny en pe problemm leker eksetera,

bann maladi lo menm laliny ou pas avan.

Mon pa konnen mon asize la mon, ou konpran? Ankor enn fwa mon pe demann mon pe enplor lo la, se ki sistenm ledikasyon sirtou lo kote lasante. Lontan nou ti vwar bann plizyer *spot* lo televizyon, menm dan bann zournal osi nou ti vwar bann *spot* lo diferan metod lasante.

Mon santi ki en pe letan pase sa ou a krwar in diminyen en pe, mon pa konnen vreman kwa ki'n fer sa. E la mon ti a kontan ki Minister Lasante ansanm ek bann partner osi, zot zwenn ansanm, menm pa zis Minister Lasante osi konmela nou annan diferan klinik prive osi ki donn bann servis.

E la ler mon lo sa laliny osi, pou kwa pa bann klinik prive kekfwa Minister Lasante i zwenn avek zot pou gete ki manner zot osi, zot ti a kapab ofer bann servis 24er, 24 *hours* kot dimoun i kapab vin kot zot. Mon konnen ki annan bann klinik prive konmela ki pe fer bann servis loperasyon, e sa i ede kot i donn dimoun ankor en lot swa.

E asiz ansanm e gete kote ki manner mon krwar zot kapab tonm lo en partenarya ansanm, kot ler Minister ou

Gouvernman pa pe kapab zwenn dan bout, zot osi kapab antre dan en lot bout parey zot pe donn en servis an se moman. Me selman parey nou konnen zot pe donn li zis dan bann letan lazournen me pa aswar.

Ler nou pe koz lo servis lasante, mon krwar osi bann kominote bann sant lasante i fer mwan mazin bann sant lasante osi Mr Speaker dan nou bann distrik parey in ganny dir. Dan mon distrik an se moman nou annan 2 sant lasante ki pe deservi nou bann zabitan, sa i sant lasante Les Mamelles e Klinik Mont Fleuri.

Tou lede klinik mon pa pe tro krwar zot donn en servis 24erdtan *or* mon konnen ki apre 4er definitivman ler travay in fini, setaki zot al kot zot. Me la kot apre ler travay ki zafer i komanse, kot sirtou tonm malad dan milye lannwit ouswa i ariv ou keksoz, kot ou bezwen latansyon medikal.

So, la mon ti a kontan osi kekfwa Minister osi zot kapab re ganny en konversasyon ansanm, kekfwa lotorite distrik ek bann dimoun konsernen pou vwar kekfwa ki manner nou kapab reorganiz sa 2 sant. Me selman osi mon bezwen *acknowledge*, par egzantp ankor mon pou refer lo sa konferans ki Minister Lasante ti envit nou

ladan, kot nou santi i annan en problemm mendev osi pou ganny bann profesyonnel.

Kekfwa la ler mon pe demann pou fer Klinik Les Mamelles ek Klinik Mont Fleuri ouver 24erdtan, mon konnen kekfwa la kestyon pou demande, be kote nou pou ganny travayer pou nou met dan sa 2 fasilite? E la ankor en fwa osi mon krwar ki ler nou pe koz lo ankouraz bann travayer, ouswa ankouraz bann zenn pou pran bann profesyon, profesyon dan lasante.

E kekfwa en travay i merit ganny fer kot letid ki *train* nou bann zenn pou antre dan sa domenn, kekfwa revwar en pe zot *syllabus* mon pa konnen zot *curriculum* mannyer i marse laba. E osi en lot form parti lankourazman osi pou bann ki deza dan sa domenn, ki zot a kontinyen donn sa bon servis.

Akoz mon konnen ki kot *casualty* osi nou annan bann profesyonnel vreman kalib laba, la nou pe koz Seselwa koman etranze kekfwa parey mon'n dir o paravan i pa bann sityasyon. I pa bann sityasyon favorab parfwa ki zot pas ladan, parski ler nou, nou'n vin *casualty* nou pe mazin pou nou vini, vini nou a met nou non dan 2 minit nou ganny war antre.

Me nou pa pe mazin sa lot laspe *emergency*, kekfwa ler nou la devan i annan en lanbilans ki pe antre laba deryer ki en dimoun ki pe bezwen lasistans plis sa ki nou, nou pe rode me ankor enn fwa parey in ganny dir parfwa nou pa kapab mezir lasante, akoz taler ou fek war en dimoun pe koze ek ou byen la demen ou tande sa dimoun in tonbe.

Ou pou dir be sa dimoun i fek la pe asiz nou pe koze. E ler nou al lo sa laliny osi kekfwa ler nou pe koz dimoun ki pe mor lo ban osi. En dimoun i vini lo ban byen normal, me selman ankor enn fwa nou pa konnen vreman ki pe pase anndan ladan.

Mr Speaker parey mon'n dir mon pa pou long lo la e vi ki nou lo servis lasante ozordi, ankor enn fwa mon pou sezi sa loportinite osi ankor ler mon annan laparol la, mon remersye bann travayer Klinik Les Mamelles spesyalman Mis Betsy avek son lekip, ki pe donn nou zabitan sa bon servis, me parfwa nou konnen i pa bann keksoz fasil.

E osi mon pou osi remersi bann travayer kot klinik Mont Fleuri osi pou sa bon travay ki zot pe fer e ansanm pou terminen mon ti a kontan osi donn mon sipor pou sa Mosyon. Mersi Mr Speaker.

**MR SPEAKER**

Mersi. Onorab mon pa konpran ki pwen ou pe al entervenir lo la. Me ou'n deza fer ou ladres. Zis dir mwan ki pwen ou pe al entervenir lo la silvouple?

**HON SEBASTIEN PILLAY**

Mersi Mr Speaker. Mr Speaker mon pa'n oule enteronp Onorab ler in komans koze, me entervenans avan li in fer serten komanter ki en *imputation as to* mon karakter koman Dirizan Lopoziyon dan Lasanble Nasyonal e osi an relasyon avek bann Manm lo kote parti US. In fer serten komanter vizavi serten konferans ki'n ganny fer.

E in fer serten analiz oubyen paralel ant mwan mon travay aletranze lo *behalf* Lasanble Nasyonal, e lefe ki nou pa'n vin sa sesyon. Mon santi ki mon bezwen *set the record straight* lo sa size avek ou permisyon. Mon pou dir tou senpleman

Mr Speaker ki mon'n anmenn plizyer kestyon e *PNQ* dan Lasanble ki'n anmenn Minister Lasante devan Lasanble pou aksepte, koz lo bann defayans ki annan dan Minister Lasante.

**MR SPEAKER**

Mersi.

**HON SEBASTIEN PILLAY**

A tou moman Minister Lasante in refize pou aksepte sa bann problem. Mon pa santi ki al koz deryer rido lo bann problem ki pe fer fas avek dan ki pe pase kot Minister Lasante.

*(Interruption)*

**MR SPEAKER**

Eskiz mwan Onorab, mon'n ekout ou silvouple. Terminen, mon pa war naryen ki *out of order* dan sa ki Onorab avan ou in dir. Mon krwar poudir i annan sa bann komanter ki ganny fer tou lede kote, e mon krwar ki sa ki'n arive ant ou ek Minister Lasante, mon krwar i pa afekte sa ki nou pe fer. Mersi.

In ariv ler ki nou kapab pran poz, nou a rebran deba 1105. Mersi.

***(BREAK)***

**MR SPEAKER**

Laparol i aprezan pou Onorab Egbert Aglae.

**HON EGBERT AGLAE**

Mersi Mr Speaker. Bonzour tou Manm Onorab e tou dimoun a lekout e en bonzour spesyal i al pou tou nou bann travayer lasante ki swa ou en

profesyonnel, ouswa ou tonm dan bann lezot *non-essential services*.

Mr Speaker, Mosyon ki la devan nou e demann avek Minister Lasante, gouvènenm atravè Gouvènman pou adresa ki zot pe dir konsèrn labi, kot i konsèrn servis *casualty*. E pou mwan Mr Speaker Minister Lasante i en Minister ki vreman enportan. E en pei i ganny zize lo enn sa pilye, se leta ou fonksyonman ou sistenm Lasante ansanm avek son ledikasyon.

E pou mwan ler mon'n ekout bann entèvenan lo sa Mosyon sirtou lo kote latab Mr Speaker, mon krwar zot in rat sa sans pou zot koz lo vre realite ki nou sistenm Lasante i ladan ozordi. E pou rod bann fason pou nou adrese.

E Mr Speaker, atravè ou Onorab Loizeau in fer en *statement* dan son *speech* ki *US* i pa'n enterese pou *attend* sa sesyon ki Departman Lasante ti organize. Me mon le dir avek Onorab Loizeau atravè ou Mr Speaker, se nou *US* nou'n anmenn plizyer kestyon, in annan *PNQ* kot i konsèrn lavwa Lepep, kot i konsèrn lo sistenm Lasante.

E ozordi si bann medya i deside fer bann senn *interview* avek pep Seselwa pou demann

zot si zot satisfè avek nou sistenm Lasante ozordi, mon pa pou etonan bann parol ouswa rezilta ki zot pou sorti avek.

E an menm tan bann *meeting* piblik ki pe ganny fer dan bann distrik ki'n deza komanse, plizyer kestyon ouswa zot pou rankontre plizyer kestyon kot en endividi pe vin met son konsèrn, kot i konsèrn son lasante e lafason ki sistenm Lasante i ete ozordi. Sa i en fe e sa pou kontinyen e mwan mon krwar sa pou dan tou distrik. Zot pou ganny sa.

Ki fer mwan poz kestyon alors se eski vre i annan en probleman dan Minister Lasante? Akoz portre ki'n ganny penn letan bann Minis in vin devan nou, se ki tou keksoz i byen. I annan zis bann *pti issues*. Napa gro probleman.

E la taler mon'n tann Onorab Loizeau atravè ou Mr Speaker, in dir nou ti ganny envite pou vin ekout bann probleman ki Minister Lasante i annan.

Alors i vre ki i annan probleman. Mon konsèrn e letan mon dir zot in rat sa sans akoz, letan nou, nou pe fer nou travay dan sa Lasanble ki nou ganny peye pou fer e pou koz lo nou bann dimoun ki'n elekte nou lo elektora e sa ki sa pep pe santi, zot war li koman en fason



ki nou pe atak zot dan gouvrenans.

I louvraz en lopoziyon pou kritik bann defi, bann problem ki Gouvrenman e ki nou, nou war i annan nesesite pou zot adrese. Me ki zot fer? Zot deside pou inyor nou. Zot deside pou sey koupe ki nou pa demann zot sitan keston. Zot rod tou fason leskiz, pou sey blanmen pou atak nou, san bliy zot ki dan Gouvrenman e zot ki ti dir nou pe *run border*.

Be letan ou pe *run border*, ou bezwen aksepte ou bann *failures* osi, pa zis laglwar. Yer zot in anmenn en Mosyon laglwar pou glorifye. Ozordi nou war en Mosyon ki penn en portre poudir be i annan defi.

Alor zot annan en responsabilite osi lo lot kote latab, pa pou zis sant laglwar be osi pou aksepte *failures* e ki ler nou, nou *point out* sa bann *failures at least* ekoute.

Pa akoz zot pa kontan *US*. Nou pa pe koz pou zis *US* la nou. Nou pe koz pou pep Seselwa, ki war poudir i annan en kantite problem ozordi dan sa pei.

E bann lendikasyon pe sorti dan sa bann *meeting* piblik. Mon konnen zot pou blanm bokou lo *US*. Be zot ki pe *run border, run things*. Fer li byen. E nou, nou la pou fer sa

*checks and balances* deryer zot. Kan zot mal nou pou dir zot, zot mal.

Alors Mr Speaker, sa *issue casualty* mwan mon'n travay dan Minister Lasante omwen 8an. E mon'n ganny sans travay *casualty* tou, ti annan en *pharmacy* laba ki ti pe *operate* 4er 11er.

E diferan lesey dan lepase in ganny fer pou amelyor servis lasante sirtou *casualty*. Sa ki Mosyon pe demande in annan lesey ki'n arive ki'n ganny fer sa. Be letan nou regard problem dan son totalite se akoz ki dimoun i vin *casualty*? Sa ki keston ki zot bezwen demann zot lekor. Akoz dimoun i prefere vin *casualty*?

Be Minister Lasante li dan plas i ti fer sa konferans avek bann *MNA's*, ki nou bann politisyen, i ti ava zwenn osi avek, i annan bokou profesyonnel Lasante ki'n pran retret, i annan dokter i annan Ners, i annan bann *allied services* ki atase ek Minister Lasante. Bokou sa bann *professional* i kapab vin donn zot pwennvi si zot pare pou ekoute, pou vwar ki mannyer Sistenm Lasante i kapab ganny redrese.

I pa letan pou zot zwe gro lebra zot ki la akoz tou

lendikasyon ler zot pe zwe gro lebra i montre poudir zot pe *fail*.

E ler mon dir koumsa Mr Speaker, sa bann dimoun in kapab lo medya sosyal osi, akoz nou war bokou kritik lo Sistenn Lasante. Paran ki pe met son konsern, zanfan, tantin, tonton ki dir ou in al isi in al laba. Rezilta pa pe pare. Latizann i manke. Servis lanbilans pa efikas.

Tou sa bann problem i la devan zot lizye. Mon pa konnen si Ladministrasyon ki zire par Minis i pa war sa ouswa inyor sa, i bezwen vin fer en *forum* avek Manm Parlman pou dir sa. Be nou konnen sa nou. Be nou'n dir ou i annan sa bann problem, be ou ki'n deside pa ekoute.

Apre ou vin dir nou asize dan en lasal avek ou. Pou vin diskite sa bann menm keksoz ki nou ankor pe dir ou, nou dir ou? Nou annan keksoz enportan osi pou nou fer dan nou distrik, zot bezwen konstat sa.

E zot, zot annan sa responsabilite pou *manage* Minister Lasante. Petet en keksoz mon ava demande, be ki dernyen fwa ki Minis in asize in fer bann konsiltasyon avek tou son bann departman *staff* pou vwar ki zot konsern? Eski sa pe ganny fer?

Ouswa nou war zis zot sak fwa i annan en levennman ki pe komemor en lazournen, vini fer gran, gran *speech* pou selebre sa bann lazournen. Konmsi tou keksoz i byen.

Be pran letan al anba laba ater, al gete ki pe pase. E letan nou tann lo *ward* napa dra, lili i sal, manze ki pa pe vin a ler, pasyan pa pe ganny *attend*, pasyan pe mor akoz mank latansyon.

*These are the things* ki zot bezwen al vwar al gete avan nou vini nou vin reklanm lagwar.

Nou Sistenn Lasante in ganny *rank* lo nivo Lafrik ki i *one of the best*. Be nou bezwen fer sir akoz sa ki'n arive avek rapor ki'n ganny mete lo nou klasman kot i konsern medya, nou'n perdi sa *ranking* kot nou ti ete pou mont pli o.

Be, *be mindful* osi si nou pa fer atansyon ek nou Sistenn Lasante nou riske war nou perdi nou *ranking* lo nivo Lafrik.

Mon pou retour lo Mosyon prezan Mr Speaker ki konsern *casualty*. Enn bann *main* rezon ki bokou dimoun pou dir ou akoz i deside al kot *casualty*, se ki son aksesibilite. E osi i en *gateway* pli fasil pou ou akse bann servis pli spesyalize, akoz zot annan bann spesyalis, apre bokou bann lekipman ki avanse ki ganny trouve kot Lopital

Sesel kot sa *casualty* i baze li menm.

E letan nou pe dir poudir i annan pasyan, dimoun ki vin 8, 9, 10 fwa, mon pa etonnen sa mwan. I kapab annan manman ki'n annan detrwa zanfan, be osi annan en sel endividi ki pe monte desann pe vwar dokter, i pa pe konnen ki i pe gannyen. Zot pa pe kapab donn li en *proper diagnosis*.

Be ki ou le i fer? I pou asiz s li esper son lanmor? Be i bezwen vin akse servis. E i bezwen war spesyalis akoz si sa zeneraliz dan klinik dan son distrik pa'n kapab war son problem, be i pou bezwen ganny en *referral* pou li ale.

E souvan fwa sa bann *referral* i tarde. Ou ganny lapwentman 3 mwan, 4mwan, 5 mwan, 6 mwan. E i annan ki agresiv letan i vin *casualty* ek enn son manm fanmir. E ler i war enn son manm fanmir pe monte, desann pou sey ganny son lasante, ouswa i pe ganny zis ganny donn en preskripsyon, en panadol, e pti antibiyotik. Zot pa pe konn larealite son problem.

E letan ou war en manman i pran son piti i vin fer tapaz ouswa en papa fer tapaz *casualty*, akoz i pe rod son rezon lasante. E i anvi war sa spesyalis pou konnen ki

problemm lasante sa enn manm fanmir ouswa sa endividi pe fer fas avek. Nou pa war li drol sa nou.

E en lot pwen se si nou pa anvi dimoun i vin *casualty*, nou pandan sa 43an nou'n desantraliz bann servis nou lasante. Preski partou nou war en klinik. *Ok?* Mon okouran poudir i annan konsern *staff*, konsern Dokter, konsern Ners mankman.

E letan pei ti pe pran tou bann fason diplomatik avek bann pei zanmi pou sey ganny bann Ners ek Dokter parey *Kenya* nou ti rode, *Cuba* nou'n rode, menm dan Lenn si i annan bann demars pou sey gete. *Sri Lanka*.

Be ti annan en lopoziyon sa letan ki ti kritike letan bann Ners *Kenyan* ti vin Sesel. E zot ti bloke. Zot bliye sa. E pou mwan i montre ou poudir i annan en gran lipokrizi, i annan serten ki'n koz lo sa Mosyon dan sa fason.

E pou nou kapab annan en meyer servis desantralize, byensir nou pou bezwen bann spesyalis osi. E letan nou pe koz kou larzan, e mwan tou kou mon granmoun in dir mwan sa mwan. Lavi en imen ou pa kapab met en pri avek, ou pa kapab met en larzan avek en lavi en imen.

So si nou bezwen pey dimoun plis pou nou ganny sa servis, pou zot donn sa servis sa bann profesyonnel, *be it* nou bezwen fer li annou fer li!

Annou get nou Seselwa byen ki pe travay dan sa bann *post*. I annan ki'n vini, i annan ki double *shift*. I annan ki fer sakrifis son fanmir i pa war, i antre tar dan lannwit. Bann ki bezwen reste on *call*.

Be nou bezwen met resours, met larzan pou pey zot. Eski zot krwar tou *staff* Lasante i satisfè avek son *package* ki i pe gannye ozordi? Eski ou krwar zot napa fristrasyon? Eski zot al ganny sa konversasyon parey mon dir ou *unit* par *unit*? Akoz zot pa travay an izolasyon zot.

Eski Minis i deza inisye sa bann keksoz? Mon pa tro krwar, mon pa'n tande. Ouswa zis i zwenn ek son *head of Unit*. Be al ekout sa ki anba osi laba zot ava konnen ki pe pase *once in a while*.

*This is how effectively leadership is!* Dan plas nou pe war Prezidan vini fer *meeting* piblik ki dan en fason i pe montre poudir son bann departman, son bann Minis i inefikas. Akoz sa bann konsern ki pe monte se sa bann menm dimoun ki dan son *Cabinet* ki

sipoze adrese pa pe ganny adrese.

E nou pa war li drol. Mwan mon pe koz sa akoz nou'n dan Gouvernman, nou'n annan leksperyans sa bann *public meeting* nou, *we know how it works*.

E se sa fason ki nou bann dirizan ti evolue. Ti donn plis responsabilite dimoun pou pran desizyon. Nou ti dir met pep o sant devlopman e nou ti donn bann *Leaders* zot pouwar pou zot pran desizyon.

*(Interruption)*

### **MR SPEAKER**

*Order please!* Silvouple permet Manm fer son lentervansyon. Onorab.

### **HON EGBERT AGLAE**

E zot, menm si zot pou mangonnen Mr Speaker. Si zot ti enterese pou fer keksoz marse dan sa pei zot ti pou fer li.

Me la nou konnen poudir i reste zot ankor preski 2an dan zot manda avan eleksyon, si zot pa *call an early election*, *I do not know*. Zot pe sey taye, zot pe sey taye pou zot al fer bann *quick fix*.

E pou mwan pou zot mon pou dir zot, Minister Lasante ou pa pou kapab fer en *quick fix* avek Minister Lasante. Ou pou

bezwen kapab get tou son bann konponan dan Minister Lasante pou ou adrese.

La nou pa pe koz zis Ners ek Dokter ki bezwen ganny gete la nou. Non, akoz si ou zis get en bout ou bezwen get osi bann lezot servis. Ou bezwen get laboratwar, ou ava bezwen get farmasi, ou ava bezwen get *physiotherapy*, ou a bezwen get kot *psychiatric*.

Ou pou bezwen get osi sa bann *ancillary services*, sa bann dimoun ki travay ki kit lopital prop osi. Zot osi zot annan en bann konponan kle depi son sekirite.

E pou mwan sa i en pwen enportan. E letan nou pe koz desantralizasyon, mon osi mon'n anmenn kestyon dan sa Lasanble. Dan rezyon pou annan parey Beoliere ti ete avan, ouver li 24 lo 24. Si fodre met resours pou pran serten nou bann profesyonnel Lasante ki'n ganny retire sirtou parey dan *weekend* akoz nou konnen poudir dan *weekend* i enn letan kot *casualty* sirtou Vandredi swar, Sanmdi swar e Dimans swar *casualty* i vreman *busy*.

Akoz i annan bann diferan levennman. I annan aktivite e sa i annan bann diferan ensidan ki arive. I sa bann letan ki nou kapab servi nou pep, servi sa bann... zot Seselwa zot.

Zot pare me selman ou bezwen donn, pou vin ede pou fer sa travay, me selman ou bezwen fer sir ki ou *remunerate* zot byen.

Akoz tan ki *casualty* i reste li menm sirtou pou rezyon nor li ki pe ouver 24. Si demen Minis li menm li i deside dir be *ok* nou met en lanons piblik, *casualty* pou resevwar zis *emergency cases*. Zot konnen ki pou arive? Be kote sa bann lezot dimoun ki pou malad dan lannwit ki pa tonm dan sa ka *emergency* pou ale? Ou pou annan dimoun ki lasante pou kontinyen deteryore, pou annan lanmor ki pou arive tou.

So demann sa Mosyon li menm li tousel sa ki i pe demande, i pa pou fer zistis sa bann problem ki i anvi adrese, non. Zot bezwen al dres bann lezot faktor ki asosye ki fer ki *casualty is the only* aswar ki pe *operate*.

Annou get en kou sa bann Klinik Beau Vallon. Revwar en pti gin lafason English River pe *operate*. Dan *weekend* si posib Sanmdi ouver sa bann klinik, kantmenm ou pa ouver li ziskan tar aswar. Parey Beoliere ki fermen. Ouver li kantmenm 8er ziskan 1er ouswa ziskan 2er. Met dokter ladan. I pou ede tir bokou presyon.

Mr Speaker, si mon kontinyen koze lo Minister Lasante, i annan en ta keksoz nou kapab dir. I annan e kantite defayans dan servis. Transportasyon pa adekwa. La yer mon pe desann mon bezwen donn en drayver en pasaz akoz transpor in ganny problem, e i *call*. I sipoze pe al sers dokter pou vin travay li, i dir li napa transpor ankor. Ouswa in dir li, be i annan en loto ou kapab pran pe selman sa loto pa kapab fer montanny.

Nou demann kestyon lo lanbilans, zot dir nou sepa i annan pre 24 lanbilans sepa 26 lanbilans, kan annefe zis 4 lanbilans ki pe marse, pou en pei antye sa. I en realite. Be si nou bezwen *extend* pou ganny led ek sipor, be nou bezwen al rode avek nou bann dimoun ki pare pou ed nou. Nou bann profesyonnel ki pare pou ede.

I annan en madanm i zwenn mwan mon pa pou nonm son non la, i dir mwan pa nonm son non. Li in ede, i ti kit pei al fer son letid aletranze, in tournen in travay bokou lannen dan servis lasante. E ki ler i ti arive i ti *amaze* par sa servis, sa mon pe koz ou dan lannen 80 sa, *by the service. 80s, 90s*.

E ler i retourn ankor la i gete ozordi i sagrinan akoz i war leta. Son lenerzi ki in donner, i

dir mon'n donn li anven. Me mon dir li pa dekouraze madanm, pa dekouraze. Si ou ankor kapab donner, donner ede pou fer sa servis monte.

E nou Mr Speaker koman politisyen, nou swete war en bon servis lasante nou. Me sa *Cabinet* i bezwen ekoute. Letan nou met bann pwen devan, nou pa pe zis dir li akoz nou pa kontan zot nou, non.

Nou pe dir li akoz pep Seselwa in dir nou son konsern e nou pe met devan zot. *This is the forum* kot nou met devan zot. Si zot anvi ekoute, ekoute. Me selman zot bann *failures* pa vin met lo led o *US*. Mersi.

**(APPLAUSE)**

**MR SPEAKER**

Mersi Onorab. Onorab Sandy Arissol ou annan laparol.

**HON SANDY ARISSOL**

Mersi Mr Speaker. Bonzour tou dimoun ki a lekout e tou dimoun ki pe swiv nou. Mr Speaker lopital toultan mwan mon kontan dir, ler nou komanse dan lavi, nou komans lopital avek en kalot lo nou fes ki Ners i donn nou. E nou plere e sa plere ki konfirman poudir ou en baba an bonn sante.

Letan nou fini dan lavi, mazorite nou, nou fini lo en lili

dan lopital, si nou byen sanse nou fini dan lakour kot ou'n batir kot ou'n konstrir lo ou zoli lili *pommière*, lo zoli matla *coucha, coucha* e antoure parmi ou bann zoli fanmir.

Alor sa ki ganny sa sans, i fer son dernyen sour - son dernyen souf lavi dan lakour. Me malerezman i annan plizyer nou, nou fini kot nou ti komanse dan en - lo lili en lopital.

Mr Speaker mon fer li mon devwar koman *MNA* Elekte pour distrik Bel Ombre, sa *MNA* ki annan sa vilen figir la! Mon fer li mon devwar sak fwa mon ganny *recess* pour bann ki pe ekoute, ki ti rode ki mannyer mon ti ganny eleksyon? Lekel ki ti swazir mwan? Lekel ki ti vot pour mwan? Mon ti ganny 1726 vot Bel Ombre, konpare avek bann ki ti annan pli zoli figir ki mwan, dan eleksyon.

Mon fer li mon devwar a sak moman mon ganny en *recess*. Konnen ki mon fer Mr Speaker? Mon vizit lopital. De semenn pase letan mon ti dan *recess* avan Lasanble ti komanse, mon ti vizit de ward *Female Ward* avek *Male Ward*. Kot ou ganny sans vizit bann pasyan, i annan ki sorti dan mon distrik, i annan ki sorti dan lezot distrik. Ou ganny sans koz avek bann travayer

Minister Lasante, tann zot pwennvi, ganny zot lopinyon.

Desanm lannen pase letan nou ti fini avek Lasanble avek Bidze pei, mon ti fer li mon devwar letan tou dimoun sakenn ti aste enn pti kado, pe aranz en lakour, mon ti al vizit North East Point. Mon ti vizit kot *Hospice*, Lopital Zonm kot bann madanm i ete. Mon ti osi fer mon devwar pour mwan vizit sa pti bout kot bann dimoun avek en lasante mantal ti ete. Vizit zot tou, san eksepsyon, enkli bann travayer Minister Lasante ki travay laba.

E sa zour ti enteresan parske ler mon ti pe vizit zot, zot ti pe met zot non-pour zot ganny sans antre dan en *coaster* pour zot al vizit lalimyer dan lavi ki ti'n dekore, parske nou ti dan letan festivite.

Mon'n ganny sans vizit bann dimoun ki reste laba;- bann dimoun parey nou dir ki napa en landrwa reste me ki vwar li pe reste North East Point dan sa bout kot bann dimoun i reste.

Mon'n ganny sans fer sir anmenn de kannson, en triko en pe fri, en limonnad pour bann dimoun ki mon konnen parske sa i mon rol, moral koman sa *MNA* ki annan sa vilen figir, ki fer dimoun bwar vineg ler i vwar ou. Akoz li i anvi

bwar vineg e mon fer li mon responsabilite pour mwan vizit mon bann dimoun ek tou dimoun ki mon konnen.

Akoz mon santi koman en Manm Elekte ki'n ganny Eleksyon avek sa vilen figir, pour mwan vizit bann dimoun ki annan bann zoli figir lopital, zis parey mon kontinyen vizit e koz avek tou bann zoli dimoun dan distrik Bel Ombre.

Mr Speaker mon'n komans koumsa, parske parfwa sipor pa zis koze, sipor i osi annan pou fer al kot sa lenstitisyon, koz ek son travayer e vwar zot sityasyon ki zot ladan. Se pour sa rezon, nou lo kote *LDS* nou ti fer li nou devwar letan Minister Lasante atraver ou lofis, e lofis Madanm Clerk ti envit nou pour sa pti seminar pour nou kapab asiz. Pa asiz zis avek sa Minis ki nou, nou'n apwente. Non-Mr Speaker, nou ti asiz parmi bann profesyonnel lasante.

Ki Parti *US* ki'n peye, ki'n *trained*, ki'n met la. Zot ti met nou asize e pa Minis ki ti koze, Minis ti fer enn pti lentrodiksyon li apre bann profesyonnel lasante ti met nou asize, ti eksplik nou, ti koz ek nou e nou ti ganny sans fer bann propozisyon konkret. Zis parey Onorab Aglae pe dir ek nou la! Bann propozisyon

konkret, parski tou dimoun ozordi i dir ek ou Minister Lasante i annan defi, Minister Lasante i annan problemn.

Nou lo kote *LDS* nou konnen poudir Minister Lasante i annan defi, zanmen nou pa'n dir bann Minister napa defi nou, se pour sa rezon ler Prezidan Ramkalawan ti pran pei ti dir "pei i parey en kales kase". Parske nou ti pran pei avek defi. Prezan si zis nou asize nou koz lo defi, pei pa pour bouze li!

Prezan alor Minister Lasante i dir nou *ok* kantite konplent, kantite kritik, napa dra, napa kwaf zorye parey nou'n tann *US* pe dir, Dokter pa ganny transpor, transpor pa fer montanny, en lepok ti annan en lanbilans ki ti vini ki ti parey en bis *burger*. Tousala in deza annan dan sa pei. Tousala nou'n zwenn dan sa pei nou!

Ozordi mon vwar drol en profesyonnel lasante parey Onorab Egbert Aglae i vini i dir ek nou sa, ou a krwar sa fek vini lo en *container* an 2020 an Oktob! Lontan i la sa! I bann defi ki nou'n zwenn la, prezan nou, nou anvi nou pei bouze. Nou anvi Minister Lasante i bouze, nou zwenn sa Minister pour nou isi, ki reprezant Lepep Seselwa –



E pa bliye i annan plizyer nou ki'n koze ki'n ganny elekte la. Savedir nou reprezant en distrik. E nou ekout nou dimoun, ki'n vot pour nou, e osi bann ki pa'n vot pour nou, pour nou rode ki mannyer nou kapab fer Minister Lasante bouz pli devan.

Me selman sa ki malere se ki letan ou tann en Onorab vini dir ek ou koumsa poudir si *Scheme of Service* pa bon kote servis i ale? Eski si *Scheme of Service* dan Minister Lasante ozordi pa bon, oubyen bann *staff* pa kontan, i vedir ki tou dimoun pour ganny en morfin ler nou al lopital?

Non! Be nou bezwen rode alor ki mannyer ansanm nou soulaz sa *Nurse*. Eski letan nou'n donn en logmantasyon 10poursan eski bann travayer Minister Lasante pa'n benefisyé Mr Speaker?

Eski letan pri elektrisite i desann i redwir lo son bil. Eski sa travayer Minister Lasante pa benefisyé? Letan son zanfán i ganny en *free breakfast* ki nou Gouvernman entrodwir, donn li enn pti dezennen midi. Eski i pa soulaz sa travayer Minister Lasante?

E letan *STC* i fer desann son prodwi eski sa travayer Minister Lasante, ki al fer son Komisyon le mwan kot

*Hypermarket* pa benefisyé? Mon bezwen demann sa kestyon, parske ou a krwar Minister Lasante in ganny kondannen li menm li napa dra i napa Dokter, son transpor pa fer montanny, lanbilans i en bis *burger*, son dimoun, son bann travayer pe soufer.

Me sa pa fek arive 2020 sa an Oktob sa. Lontan i la! Se pour sa rezon nou lo nou kote latab, nou konsernen pour nou zwenn pour nou asize, pa zis demann *PNQ*, pa zis demann kestyon pour met Minis a latab - non! Sa i zis demann kestyon. Be nou bezwen asize ansanm, pour nou atrap lanmen kanmarad pour nou rode ki mannyer nou pei pour bouz de lavan.

Sa kot travay i ete! Sa ki nou, nou krwar ladan!

**(APPLAUSE)**

### **HON SANDY ARISSOL**

Pa zis fer krwar devan medya, demann Minis kestyon alor la nou pe travay pour Lepep Seselwa. Non! I annan sa lot bout ki vin avek. Se sa lot bout ki nou, nou krwar la dan, lo kote LDS. Kolaborasyon avek tou bann Minister pour napa kapab reprezantasyon lo nou kote, pour nou bann dimoun

ki'n met nou la, ki pe ekout nou, ki pe swiv nou.

Alor laba nou ganny asize, nou ganny met devan, nou ganny dir, nou ganny montre, prozeksyon in ganny fer devan, kwa ki nou kapab fer e kote nou koman bann *MNA* nou kapab ede. E sa, in fer avek L'Egzekitiv in fer avek Lezislatif, pa ankor fini sa - Onorab Aglae atraver ou Mr Speaker - pour fer ankor sa bann sesyon avek bann lezot *stakeholders* parey nou pe dir.

Parske nou Gouvernman i krwar dan sa bout pour lekout, zis parey bann defi ki nou'n tande dan *meeting* ki mon'n tann zot koz lo la, *meeting* piblik ki pe fer. *Meeting* piblik avek dimoun, pa nou ti envante sa, nou'n vin zwenn la koman en Gouvernman.

Demen Gouvernman Onorab Aglae pour retourn ankor *comme* dir Onorab Loizeau, '2000 zanmen', zot pour fer ankor *meeting* piblik zot osi. Zot pour fer zot, parske parey in dir ek nou se la kot ti annan progresyon, letan zot ti fer *meeting* piblik. E nou, nou pe fer parske nou pe ekoute.

E letan zot pe dir kalite problem ki pe leve, si nou ekout byen dan bann *meeting* piblik problem ki pe leve, se bann problem ki'n relye plizyer lannen e bann dimoun

pe sey anmenn devan, pour zot ganny en debousman avek nouvo ladministrasyon.

Sa ki mon tande mwan!

**(APPLAUSE)**

**HON SANDY ARISSOL**

Me selman zot in profit dan sa Mosyon pour fer monte *meeting* piblik, napa problem. *Meeting* piblik pe fer dan tou le 26 distrik e tou bann *MNA US* osi in ganny envite. An vi ki zot in refiz partisipasyon Minister Lasante, aköz zot pa konte fer keksoz deryer rido, nou a gete si zot refiz partisipasyon ki pe fer *live on air* Langleter, Lanmerik ou trouve avek zot distrik ek Prezidan Larepiblik avek tou zot Minis. Nou a get si zot pour *boycott* sa enn, nou ava konnen ki zistans zot in arive avek kolaborasyon pour ed pei bouz de lavan.

Mr Speaker, Onorab Andy Labonte anmenn sa Mosyon zisteman parske li i annan en sant lasante dan son distrik. I santi li konsernen. Beau Vallon nou annan en - Bel Ombre nou annan en sant lasante ki deservi Beau Vallon avek Bel Ombre.

Me letan ou ekout bann konversasyon avek bann dimoun ki ou koz avek, i annan en kantite propozisyon ki kapab

ganny fer an relasyon ki mannyer pour amelyor servis - zisteman parey Mosyon Onorab Andy Labonte pe demande. Onorab Andy Labonte pa pe - son Mosyon pa pe dir kennsel *casualty* li, i pa pe dir ferm *casualty*, parey nou'n tann Onorab Aglae pe dir nou, non! I pa'n dir sa li.

Minis - Onorab Aglae in dir ek nou si zanmen en zour en legzanp ki'n donneren poudir si Minis i vini poudir annou fermen ki pou arive pa pou kapab fermen servis *casualty* dan en pei. En pei responsab.

Me sa ki Mosyon pe demande se ki, ki mannyer nou kapab ankouraz nou bann dimoun pour asire ki sa servis pa ganny servi pour bann *emergency* selman, pour ganny servi pour bann *emergency* selman e non-pa koman en klinik normal. Kot si letan ou'n fini bwar, ou bwar en Sanmdi apre midi lo laplenn deryer laba, ou santi ou en pe divage, ou pa tro konpran si ou tansyon ki pe monte, oubyen si ou gines ki pe monte alor ou vin kot *casualty*. Mon le vwar Dokter - non! Sa ki Mosyon pe dir non! ou pa kapab al kot *casualty* akoz ou'n fini bwar de trwa 4 gines.

*Casualty* bezwen ganny rezerve pour en lensidan

*casualty*. Kot ou ganny tou bann fasilite neserer sa lavites ki ou pe rode, Dokter i donn ou tou latansyon *casualty*. Si mwan mon deside lager ek mon madanm dan lakour, gran koute mele, tou vwazen sorti gete, Lapolis vini. Apre finalman mon *end up* ek *casualty*, akoz mon'n ganny 50 pwen zegwir ek enn pti lars lo mon ledò. Be mon pe bar sa dimoun ki pe vin rod sa swen dan en ka *emergency*!

E mwan mon'n fer sa problem dan lakour, prezan mon osi mon'n fer en lot *emergency* pour sa Dokter prezan mon bezwen o bor sa pasyan ki *emergency*. Mwan mon'n rod en *emergency* ki mon'n rod mwan menm. Konpran? Se sa ki nou pe dir. Se sa ki Mosyon pe demande. Pa pe dir aret *emergency* *casualty* non-pa sa ki pe dir.

Me an menm tan Mosyon i vin devan Lasanble Nasyonal parske nou, nou reprezant dimoun dan nou distrik. Prezan dimoun ki ava pe swiv i a dir, be vre *hmm ok*, sa ki zot pe dir i fer sans. Savedir mwan mon bezwen servi sa fasilite ki mon gannyen dan mon distrik, me kit *Casualty* Mont Fleuri pour bann ka serye, pour ki bann Dokter zot ganny zot letan, pour pas avek ou. Bann *Nurse* i kapab *assess* ou byen pour ou

kapab ganny refer kot fodre refer.

Me par kont nou'n tann plizyer propozisyon an relasyon ki mannyer nou kapab amelyor sityasyon *casualty*. Deor ler mon ti pe koze en *staff* i kriy mwan i dir Mr Arissol pa bliye nou osi annan Lopital Lafanmir Perseverance. Eski si ti ouver dan en fason, eski pa ti ava tir en pe presyon lo Sant Lasante La Rivyer Anglez, o osi tir en pe presyon lo *Casualty* Mont Fleuri.

Nou'n tande poudir si kekfw bann lezot sant dan distrik parey nou annan Sant Lasante Beau Vallon, Bel Ombre ti a ouver ziska 11er, oubyen 24 lo 24. Eski pa ti pou tir sa presyon lo *casualty*?

Tousala nou'n tande. Me selman sa ki enportan, nou koman politisyen nou kapab vini demann tou sa ki nou oule. Politisyen nou'n demann 26 klinik, dan 26 distrik. Tou distrik mon krwar i annan en sant lasante oubyen i annan en klinik. Si *MNA* i vini i demann 26 bazar, nou ganny 26 bazar. Selman tou bann *fisherean*, zot vin vann zot pwason dan bazar Sir Selwyn Clark *ok*.

Si bann fermye i demann enn pti bazar pour zot laba pour zot vann zot legim, zot gannyen, *MNA* nou demande, apre zot tou

zot desann ek zot *pickup* 4er bomaten zot vin ranpli bazar Sir Selwyn Clark Lari Benezet partou, kot Kim Koon partou akoz i dir ek ou i bezwen vann son prodwi.

Nou *MNA* nou la pour demann tou sa ki nou anvi nou. Me selman sa ki nou osi bezwen aksepte, letan nou pe demande ki sant i ouver ziska 11er diswar. Par egzanp mon'n tann Onorab Aglae koz lo Sant Beoliere. *Yes!* Me eski nou annan sa mendev pour nou met dan Sant Beoliere? Eski nou annan *Nurse*, ase Dokter ase, latizann, fasilite, masin ki nou bezwen pour nou rann sa servis 24 lo 24? Sa osi nou bezwen pran kont koman en Lasanble. Se pour sa rezon parfw i enportan pour nou asize, pour nou fer sa bann kalkilasyon ansanm koman en pei.

Mon ti kontan letan Onorab Norbert Loizeau ti servi Onorab Pillay koman sa legzanp Mr Speaker, poudir ler nou ti *La Chine* nou ti travay ansanm. *Yes* mon bezwen redir ankor. Onorab Norbert Loizeau sa ki in dir i korek, ler nou ti al *La Chine* wi, nou ti travay byen ansanm avek Onorab Pillay koman nou *Head of the Delegation*.

Sa ki Onorab Loizeau ti pe dir bomaten, nanryen sekre, nanryen an plis. Nou ti travay

byen. Alor - wi Onorab Henrie pe *remind* mwan poudir i ti *smart* dan son palto, sa nou ti vwar, sa i *ok*. Sa napa problemn.

Me sa ki Onorab Loizeau ti pe fer resorti se sa 'travay ansanm.' I enportan sa, parske nou ti pe travay pou pei *ok*? Prezan pour vin Prezidan fodre omwen nou annan en pe, en bon pe dimoun ki annan problemn mantal dan pei, *ok*? Sa nou ava koz avek zot nou a gete ki mannyer nou a kapab fer sa laranzman, selman nou pa fer li la. Annou pa fer li la. Parske la nou lo *casualty* lo bann ka *emergency ok*?

Be Mr Speaker, i annan en kantite propozisyon ki nou kapab fer, oubyen bann propozisyon ki'n monte. Par egzanp letan mon koz en garson dan mon distrik, i dir ek mwan koumsa par egzanp nou, nou Sant Beau Vallon ki nou annan, ki deservi Beau Vallon Bel Ombre. Eski - akoz i ferm sa ler olye ferm pli tar parey ti pe fer avan? Akoz i demann sa kestyon, parski nou Bel Ombre, Beau Vallon nou de distrik ki annan en konsantrasyon bann letablisman touristik. E osi san bliy nou bann zabitan.

Letan en lot propozisyon ki demann mwan, dir mwan dir se ki letan nou annan Sant

Beau Vallon, Bel Ombre akoz nou napa en lanbilans avek nou *paramedic* atase avek nou sant pour ki si zanmen i ariv en evantyalite, nou pa bezwen esper enn sorti santral ki bezwen pas atraver trafik ki nou annan enormeman ozordi, pour li vin ede dan nou distrik si zanmen i annan en evantyalite?

Trwazyenm pwen ki'n fer resorti avek mwan lo nou Sant Beau Vallon, Bel Ombre se an relasyon avek bann tes ki ganny fer. Par egzanp tes disan. Akoz ozordi nou napa bann fasilite dan nou sant lasante distrik, oubyen rezyonnal ki kapab ede ek bann tes disan, ki ou kapab ganny li parey ou ganny li dan bann klinik prive ozordi, dan 15mini, 20minit, 30minit;- oubyen parey i pe fer ozordi tir disan anvoy santral, esper rezilta ou ganny li dan en semenn, de semenn parey in le ka, parey in le ka pour plizyer lannen.

Konmsi pour nou sey met devan sa bann pwen pour ki Minister Lasante atraver tou sa bann konsiltasyon pour zot rode ki mannyer zot fer lavi nou bann dimoun dan distrik pli fasil, pour li pa ganny lanvi desann pour al *casualty*, akoz i santi poudir laba i pour ganny en servis pli efikas, pli vit e pour li rann son lavi pli ere.

Me parkont sa ki nou osi nou bezwen pran kont Mr Speaker se ki kalite servis oubyen lafason ki nou sant lasante dan distrik, sa servis ki rann nou kominote. Eski sa ki fer zot pa anvi al dan Klinik Beau Vallon – dan Sant Beau Vallon, Bel Ombre? Alor i al rann lapel *casualty*. Eski servis ki nou pe ofer laba? Kalite servis ki i gannyen? Sa ki fer li taye pour al *casualty*? Sa osi nou bezwen balanse e pran kont.

Me par kont letan nou pe koz lo bann, letan mon'n tann Onorab Aglae ki'n koz avan mwan in servi en pe bann pour nou mazine - koman sa Manm ki'n koz, sa Manm ki'n koz avan mwan e sa Manm ki'n dir poudir i ti en travayer Minister Lasante pour plizyer lannen. E nou bezwen rekonnet sa. Bann travayer lasante, bann dimoun nob, bann dimoun ki fer bann travay ekselan, parey ou ti fer letan ou ti travay dan lasante mon mazine.

Me i annan en pwen enportan ki ou'n fer resorti. Letan ou'n mansyonnen Mr Speaker atraver ou ki, par egzanp si Sant Beoliere i reouver. Eski nou ganny bann dimoun par egzanp ki'n servi par egzanp ki'n retrete oubyen bann dimoun ki ou kapab apel-

e pour refer tournen. I enportan sa.

E mon asire nou annan plizyer bann Dokter ki nou kapab anmennen pou fer travay anler Beoliere kot ou, mon mazine i annan en non la ki mon kapab donn ou, en Dokter ki nou kapab fer, fer en bon travay kot ou Beoliere, *ok*.

Me par kont i enportan pour nou osi ankouraz nou bann Dokter, nou bann, nou bann Ners ek nou bann Dokter pour fer zot travay byen, sirtou bann ki la Mr Speaker. Nou pa kapab kontinyen ganny bann konplent par egzanp letan ou annan Dokter ki sorti lo ward i kit pasyan i al ekout *State of the Nation Address* dan loto! Sa osi foudre nou veye.

Pour nou apre dir poudir i annan viktimizasyon, zot pa pe fer sa, pe fer sa, konmsi i enportan pour nou asire, *ok* pour nou asire Mr Speaker poudir zot pe fer zot travay byen. Oubyen ou vwar zot pe asize en plakar an deor Lasanble, me selman – (ankor li menm)? Non! les li.

Selman sa ki nou, nou pe rode Mr Speaker, nou pe nou le ki nou travayer lasante zot travay byen, dan tou profesyonnalizm, donn nou sa bon servis e nou swete ki dimoun ki pe ekout nou deor,

zot konpran la vre sans annan en *casualty* lopital, avek sans pour ou kapab servi ou sant lasante ki ou annan lo nivo distrik.

An menm tan i nou responsabilite osi pour nou ankouraz nou dimoun pour viv an bonn sante. Veye kwa ki nou manze, veye kwa ki nou bwar, enn pti legzersis de tanzantan, mon krwar sa osi i ede.

Dezyenmman mon krwar i enportan pour nou osi edik nou dimoun, sirtou bann msye ki tant pou per pour vin devan, letan Onorab Loizeau in servi sa pti mo. Letan ou santi ou annan enn pti mo, pa les sa pti mo vin en gro mo, apre ou pa kapab prononse ou a vwar ou bezwen tay dan tou direksyon.

Ler ou komans ganny enn pti mo, bouz devan rode ki sa pti mo i ete, pour ki sa pti mo pa devlop dan en gro mo - parey Onorab Loizeau in dir Mr Speaker atraver ou. Parske ozordi sa pti boubou ki ou gannyen ki letan ou grate i kapab devlope vin en lot keksoz, ki ou pa pour konnen. Sa klou ki ou ti gannyen lontan ki granmoun ti dir ek ou kraz fey piman, oubyen fey belzanmin met lo la, ozordi i nepli tir son latet deor li. Latet i kapab reste anndan e la kot ou ganny *septicemia*, ou ganny en lot

lezot konplikasyon e ou perdi ou lavi.

Nou tou ki nou annan nou fanmir, nou vwazen, nou zanmi, nou pa pour le personn i mor lo bann klinik, mor dan *casualty*, mor okenn par, napa personn ki anvi mor. Me par kont ler sa bann lensidan i arive la dan *casualty* lo *ward* dan lopital la, nou pa kapab blanm Minister Lasante, nou pa kapab blanm *Nurse*, nou pa kapab blanm Dokter, nou pa kapab blanm personn. Bann *Nurse* ek bann Dokter tou bann travayer enkli sa drayver lanbilans ki vin sers ou dan distrik, enkli sa *porter* i anmenn ou anler dan ou lasanm si ou ganny admit, nou bezwen felisit zot pour sa travay nob, sa travay dir ki zot fer letan zot organiz nou tou ki bezwen retourn lopital pour nou ganny sa servis ki nou pe rode Mr Speaker.

Mwan mon pour donn sipor sa Mosyon, parske mon osi mon santi poudir i enportan ki nou bann dimoun ki pe ekout nou deor zot pa vwar servis *emergency* koman en *fast-track*, zis ou vini ou antre non. I bezwen ganny son vre valer, koman sa ki nou apel li *casualty* pour en ka *emergency*.

Me sey ou mye dan tou fason, pran ou letan vizit osi ou klinik dan ou distrik. Me par

kont aswar i ariv en evantyalite i ariv en ka *emergency* parey nou'n dir si Beoliere pour li i fermen, definitivman i pour bezwen desann kot enn ki pli pre.

Si Onorab Michel Roucou ki reste Foret Noire, i pa pour kapab La Rivyer Anglez me i pour bezwen vin *casualty* parske *casualty* ki pli pre avek li.

Me letan Ners ek Dokter i vwar nou pe vin *casualty*, zot a konnen poudir sa i en ka irzan, oubyen sa dimoun in la pli pre i pli fasil pour li vini. Me zot pa pe get ou avek sa enn ki tou le sanmdi sak fwa i *Barrel* i ouver, sak fwa i annan *fancy fair*, sak fwa i annan *show* Philip Toussaint ou bezwen raporte pour li tir en zekli, en zekli sopin gines dan an kote fron e ou lizye anfle. Non! Pa kapab kontinyen sa Mr Speaker.

Nou bezwen annan en lord, nou bezwen annan ledikasyon e nou bezwen konnen pour nou le i nou responsabilite pour nou kapab edik nou pep pour li kapab viv en lavi an bonn sante. La mwan ziska prezan mon zoli figir, mon vilen figir i ankor parey Mr Speaker mon pa ankor raport *casualty* e mon pa swete, e mon pa anvi.

Me se sa, sa ledikasyon ki enportan pour nou viv byen anmenn byen nou lavi, pour ki parey mon ti komanse, ler nou ti komanse koman pti baba nou ti komans lopital, pour ki letan ariv nou zour, nou zour ki Bondye i pare pour pran nou, nou ava fer li nou dernyen souf lopital, oubyen parey mon'n dir sa ki sanse i ganny sans fer kot li dan son Lakour ki in batir, ki'n pran letan e k lanmour antoure parmi son bann fanmir.

Alor Mr Speaker avek sa detrwa mo mon poudir Onorab Andy Labonte zoli Mosyon, zoli Mosyon Onorab Andy Labonte pa bliye ou annan en, ou annan en sant Minister Lasante dan ou distrik, e zot osi zot ganny bokou difikilte.

Alor mon krwar poudir bann dimoun ki pe ekout nou, lo tou lede kote latap i annan plizyer nide ki'n ganny esanze an relasyon avek *emergency casualty*, pour ki nou bann dimoun i konpran son vre rol, son vre fasilite.

Me an menm tan mon le fini par dir, mon anvi dir avek Minister Lasante Minis Peggy Vidot ek tou son profesyonnel lasante, enkli tou son bann *staff* poudir nou lo kote *LDS* nou pour sipor zot, donn zot *full* sipor e nou pour kontinyen



sey nou mye pour asiz avek zot pour rode ki mannyer ansanm nou pour kapab fer nou sistenm Lasante amelyore pour ki nou dimoun laba deor i ganny sa bon servis, ki i pe rode anba en Sistenm Lasante ki gratwit dan pei ozordi. Avek sa detrwa mo mon ti a kontan remersye ou Mr Speaker.

**(APPLAUSE)**

**MR SPEAKER**

Mersi Onorab. Onorab Herminie ou annan laparol.

**HON WILBERT HERMINIE**

Mersi Mr Speaker. Bonn apre midi Mr Speaker, tou Manm koleg Onorab e tou bann dimoun a lekout, espesyalman bann travayer lasante. Mr Speaker annou retourn lo vre realite, vre realite la deor se ki nou servis lasante pe tonm dan depi anba gouvrenans *LDS*. Si en dimoun i malad, definitivman i pour al kot sa fasilite ki pli pre, sa i dan natir imen. Nou pa kapab dir ki en dimoun pe raport kot *casualty*, sa i en labi. I napa lezot landrwa pour li ale, sel landrwa ki i pour kapab ale dan sa ler aswar, se raport kot *casualty*.

E napa nanryen ki nou kapab fer pour lemoman pour anpes sa. *Unless* sa

Gouvernman i ekoute, ekout bann propozisyon ki nou, nou ti'n mete. Zot bezwen aprann ekoute kantmenm zot pe *run border*. Aprann ekout e fer bann keksoz ki nou'n met an plas. Anbelir li e fer li mars pli byen.

Mr Speaker nou koz lo servis *casualty*, me servis *casualty* i pa zis batiman li. I en servis ki enkli resours imen, latizann eksetera. Mon'n koz avek serten bann travayer lasante ki travay dan sa departman, zot menm zot in dir mwan, nou travay *long hours*, nou *underpaid*, nou sey donn nou mye. Me avek sa bann kalite kondisyon travay, lafatig i fasil pour kapab fer fot.

Nou bann *allowance* in ganny koupe. Nou bann servis nou *long service allowance*, tousala in ganny koupe. Dan distrik nou bann fasilite tel ki *locker room*, *treatment room* tousala napa.

Pourtan Gouvernman avan ti met sa bann fasilite la, zot ti bezwen zis anbelir, zot ti bezwen anbelir sa bann fasilite. Koumsa nou pa ti ava annan en problem ki tou dimoun i raport kot *Casualty* Lopital Mont Fleuri.

Fasilite i la, me zot pa an - zot napa ase resours imen pou fer sa bann travay marse. Ler Prezidan Faure ti rod led avek

etranze zot ti dir koumsa non. Be prezan ki ou ekspekte? Ler napa *staff*, napa travayer, napa latizann kote zot pour raporte, zot bezwen raport laba kot *Casualty* Mont Fleuri. Akoz nou ki'n kree kondisyon. Dokter par grap zot pa'n renouvle kontra.

Nou kree kondisyon pour bann dimoun al kot *casualty* apre nou anmenn en Mosyon, nou blanm sa bann dimoun pour al kot *casualty*. Be zot napa landrwa pour zot ale. Nou fer dimoun aret travay, pa renouvle kontra spesyalis ganny al – dir pour retourn dan zot pei ki'n travay sepa konbyen lannen isi. Epi nou dir koumsa nou annan en problemm avek nou sistenm.

Me ler napa mendev *obviously* pour annan en problemm avek ou sistenm. Akoz zot ti promet pour fer pli byen, parey Onorab Arissol in dir atraver ou Mr Speaker sa bann problemm i en - pa'n vin lo en *container* la an 2020.

Be zot ti promet dan eleksyon ki zot, zot pe vin ek en baton mazik pour fer pli byen zot. Tou keksoz ti pour ganny rezourd, tou keksoz ti pour ganny rezourd. 2an edmi la zot pe dir nou *container*, be rezourd problemm ki zot ti dir zot pour rezourd. Pa vin koz ek nou lo *container!* Ou ganny en

konpran. Zot la pour *vet* sa travay pli byen ki zot ti dir zot pou fer.

Problemm pa pour rezourd si ou kontinyen fer keksoz lanver ki ou ti promet. En zour ou pe dir nou koumsa laz Sekirite Sosyal pour desann, lannmen ou bezwen monte. Donn nou i en kalite leskiz i annan 3 keksoz ki ler ou vin dan Gouvernman ou bezwen fer realite, promes ek ekout profesyonnel. Solman pa sa ki ou ti dir. Ou ganny en konpran? Pa sa ki zot ti dir.

### **MR SPEAKER**

Onorab Larue silvouple. Mon fatigue tann ou koze. Kontinyen.

### **HON WILBERT HERMINIE**

Mon pa konnen si i pa'n pran son medikasyon me solman mwan mon pour kontinyen koz lo Mosyon.

### **MR SPEAKER**

Onorab! *Order please!* Onorab ou a prosede avek ou *speech* silvouple. Esey retourn lo Mosyon.

### **HON WILBERT HERMINIE**

Mersi Mr Speaker. Parey son *Leader* menm in dir si i rode. Nou ti pe koz lo Mosyon nou. Nou bezwen os nivo nou Lasanble avek sa bann

komanter ki pa annan okenn lesplas dan Lasanble.

Bann komanter derogativ ki kontinyen fer sak fwa dimoun lo sa kote latab pe koze. Akoz nou osi nou kapab desann dan rigol parey li nou, nou kapab al dan sa direksyon, be nou pa anvi. Nou anvi koz lo sa Mosyon ki koleg, enn mon koleg...

**MR SPEAKER**

Koz lo Mosyon.

**HON WILBERT HERMINIE**

... Onorab Labonte in anmennen.

**MR SPEAKER**

Wi. Onorab!

**HON WILBERT HERMINIE**

I kontinyen menm.

**MR SPEAKER**

Aret enteronpe silvouple. Aret kriye. Aret kriye.

*(Interruption)*

**MR SPEAKER**

Onorab mon'n envit ou pour retourn lo ou *speech*, retourn lo Mosyon, ou'n al prolong en alter...

*(Interruption)*

**MR SPEAKER**

Onorab Pillay ou kapab les mwan fer mon travay silvouple. Ou pa Speaker Lasanble, ou *Leader* Lopozisyon. Mersi. Onorab retourn lo ou *speech*, retourn lo Mosyon koumsa nou a kapab fer en pe progre silvouple.

**HON WILBERT HERMINIE**

Mersi Mr Speaker. Mon a kontinyen. Mr Speaker an realite ki Onorab Arissol li osi atraver ou, i pa'n le admet ki sa Mosyon in ganny sanze pour zot pa montre lenkonpetans sa Gouvernman ki la. Akoz sa pa sa ki Mosyon ki Onorab Labonte ti'n anmennen.

Zot aranz son Mosyon, pour zot fer mannyer ki problem labi se dimoun ki pe servi servis ki i pe anmennen. Dimoun tou kou pour malad li. Ou pa kapab blanm sa dimoun kote i arive, en lensidan i arive, pti lars gran kouto lensidan i pa averti.

So ler i arive i bezwen raporte. Nou, nou bezwen fer sir ki nou bann servis, nou bann dimoun i bezwen la pe *provide*, pour *cater* ler nou bann dimoun i ariv dan sa landrwa. Akoz zot napa okenn landrwa pour zot ale.

Akoz nou bann fasilite dan distrik zot annan - nou dir 4 klinik *emergency*, 2 i deza lo zil elwanye, enn Anse Royale, enn Anse Boileau. Be napa kalite fasilite pour en dimoun sorti anvil pour li ariv Anse Royale. *Obviously* i pou al kot *casualty*.

So Mosyon ti devret al enn pti pe pli o profon pour montre kwa, kwa ki pe ganny propoze pour rezourd sa *issue* zistans lo louvertir, *staffing*, kondisyon travay sa bann *Nurse* avek bann lezot kad lasante, ki donn sa servis *casualty*.

Sa bann direksyon, bann propozisyon ki mon ti a kontan vwar avek loter Mosyon, poudir nou kwa ki li i pe anmenn lo latab pour kapab rezourd, rezourd sa *issue* ki bokou dimoun i al rann lapel kot *casualty*.

Akoz parey nou konnen, Mosyon li i pa *binding* petet si kekfwa zot ti anmenn sa dan *meeting* piblik kot Prezidan i rezourd tou problem. Zis parey i ti donn tou dimoun lakaz, ou pour ganny en lakaz, lot pour ganny en lakaz, nou tou la anndan nou pou ganny en lakaz. Petet sa *issue* labi lo sistenm *casualty* ti ava ganny rezourd.

Me selman la dan sa Lasanble, kantmenm nou pe koz lo la mon pa pe vwar ki

manner, ki manner sa *issue* pour ganny rezourd. Akoz nou tou nou konnen Mosyon pa *binding*, napa fason pour nou kapab fors Minister Lasante, pour aranz son sistenm fer li pli efikas pour tou bann dimoun kapab servi dan en fason korek.

So nou lo nou kote nou pe dir ki i annan en ta propozisyon ki'n ganny met lo latab, i annan bann propozisyon ki bann Dokter ki ti la avan ki'n *retire*. Bann lezot *staff* lasante ki ti la avan ki'n *retire*. Ki zot ti kapab zwenn ansanm, revwar ki manner sa *network* pour marse, ki manner pour fer li vin pli efikas kot dimoun i ava konnen tre byen kote i pour ale, tel en lensidan kote mon pour ale dan plas vin direk Mont Fleuri e osi rezourd sa *issue* ki aswar kote i pour ale.

Mon'n tann lo kote Lopital Perseverance. Sa ti ava en keksoz ki ti bezwen ganny al en pe pli detay pour gete ki manner i kapab marse. Sa ti pour en bon propozisyon. Me la ki manner i ete nou pe pa vwar ki manner sa Mosyon li menm, pour ede, pou tir sa presyon lo sistenm *casualty*, akoz i napa landrwa pour li ale Mr Speaker.

Kantmenm ou poudir li koumsa ou pe dir li koumsa in ganny en zekli sopin dan son latet, me i napa landrwa kot

pour li ale. I pour bezwen vin lanmenm. Sel landrwa ki ouver e presyon pour kontinyen.

So pour mwan mon vwar ki sa i bezwen ganny revwar dan en fason pli teknik. Annou revwar ek nou bann dimoun ansyen, bann dimoun ki'n *retire*, bann profesyonnel ki dan prive osi. Anmenn zot ansanm pour nou kapab revwar ki manner sa sistenm pour marse e *in the end* nou bann *staff* i ava santi zot *less under pressure*.

Dimoun i ava satisfé avek sa servis ki i pe gannyen. E nou pa ganny dir ki nou problemm ti avek nou, zot in ganny sans 2an edmi pour zot kapab rezourd sa problemm avek zot baton mazik. Mersi Mr Speaker.

### **MR SPEAKER**

Mersi mon a donn laparol Onorab Cosgrow. Onorab Pillay ou'n enteronp. Ou'n aret deba en fwa, e mon krwar ti lo en pwen ki pa ti valab. Mon pe demann ou silvouple respekte nesessite pour nou gard nou lord koze. Ou'n deza fer ou lentervansyon. Ou *still* bezwen koze. Onorab dir mwan ki ou pou dir.

### **HON SEBASTIEN PILLAY**

Mersi Mr Speaker.

### **MR SPEAKER**

Zis dir mwan ou pwen silvouple.

### **HON SEBASTIEN PILLAY**

Mr Speaker mon'n zis lev mon lanmen pour *apologize* ki mon'n fer en *outburst* taler. Mon'n lev mon lanmen pour *apologize* ki mon'n fer en *outburst* taler pandan ki ti pe met lord Lasanble. Mon zis ti a kontan vwar ki parey lord i ganny aplike pour mwan kote, lord osi i ganny aplike lo lot kote.

Depi bomaten sa Onorab ler nou, nou'n reste trankil pandan ki tou dimoun pe koze laba in kontinyelman enteronp tou Manm lo mon kote latatab ki'n koze. Ou'n dir li en fwa ou, ou'n dir li de fwa. Si ti lo mon kote latatab ou ti pou pran serten aksyon. Mon *apologize* pour mon *outburst* ki mon'n fer taler, me mon ti a kontan demann ou pour annou aplik lord pour tou lede kote latatab. Mersi.

### **MR SPEAKER**

Mersi. Onorab Cosgrow ou ladres silvouple.

### **HON WALLACE COSGROW**

Mersi Mr Speaker. Bonzour Mr Speaker. Bonzour tou koleg Onorab. Bonzour tou Manm piblik. Bonzour tou *staff*

lasante si i annan ki pe ekout nou apre midi.

Mr Speaker mon ti pou al komans mon lentervansyon dan en fason. Me mon krwar i enportan ki nou adres serten keksoz, sirtou mwan o komansman ler mon pran laparol.

Mr Speaker Onorab Arissol atraver ou Mr Speaker en ou konnen mon en pe dezapwente avek li. Ozordi nou pe vin diskite lo en Mosyon ki pour mwan i ase serye, me konmsi i pa letan pour nou tir nou fristrasyon, lakoler *meeting* piblik la anndan. Sa ki'n ganny dir dan *meeting* piblik in fini, annou pa bezwen trenn li la anndan. Pa nou ki'n dir vilen figir, pa nou ki'n dir vineg, sa zot bezwen al *deal* avek laba dan distrik kot in ganny dir.

E nou bezwen *deal* avek sa Mosyon ozordi parey i ete la e lefe ki zot in sanz Mosyon. E mon ti ava apresye si i aret *disturb* mwan tou Mr Speaker.

Me Mr Speaker ou konnen in ganny dir, in ganny dir - in ganny dir Mr Speaker boner ki ti annan konsiltasyon ki ti ganny fer avek Minister Lasante ki nou, nou pa'n *attend*, napa ki pa pa'n ganny dir lot kote latab taler par en Manm Onorab sirtou.

Mr Speaker me si zot ti fer rankont, zot ti fer rankont avek Minis Lasante lo bann *issues* lasante, akoz zot pa ti anmenn sa enn ki la dan sa rankont, zot ti ava met devan Minister Lasante, met devan Minis Lasante e dir li i annan en problem ek *casualty*.

Akfer nou bezwen vin anmenn la dan Lasanble koman en Mosyon. Savedir pa'n ganny diskite *otherwise* nou pe fer en legzersis dan *futility* la anndan! So pour mwan, pour mwan pa fer sans. *Unless* akoz zot in sanz sa Mosyon, *unless* akoz zot in sanz sa Mosyon prezan zot enn pti pe kanmi, zot enn pti pe akiz piblik Seselwa konmkwa i pe abiz servis *casualty* apre zot sanz Mosyon zot tir “labi” zot kit zis “servis lasante”.

Me i kler Mr Speaker, lapant diskisyon ozordi - lapant diskisyon, malgre ki Mosyon in ganny sanze e si ki nou pe blanm pep Seselwa pour sa servis *casualty*, ki ozordi i annan serten defi. Nou tou nou bezwen admet.

Me nou pa kapab kontinyen blanm Seselwa pour bann felir Minister Lasante ek Gouvernman LDS Mr Speaker. Nou pa kapab kontinyen blanm Seselwa. Konmsi si en dimoun i santi li malad, i santi li pa byen,

i ganny konmsi Onorab Loizeau “enn pti mo”, li i pa pour vin *casualty* li, akoz i bezwen per, i bezwen deside la si mon desann laba mon pour ganny dispit avek Onorab Labonte avek son Mosyon, mon pa kapab vin *casualty* mon bezwen al rod en landrwa pour mwan ale.

Me non sa dimoun i malad i pe vini. *Onus* i lo ou servis lasante, Minister Lasante pour ou fer sir ou met bann mekanizm kot li ava swiv. E i lo ou sa. E nou Mr Speaker nou'n kontinyelman koz lo bann problem, lo bann felir Minister Lasante. Nou'n kontinyen koz lo la, nou'n toultan koz lo la nou. Nou'n koz lo mankman fasilite, problem dra, zorye, problem fasilite lopital, problem delo so, problem lanbilans nou'n koz lo la nou, nou'n mete devan Mr Speaker.

Problem *staff*, *staff* Seselwa ki pa ganny trete parey *staff* etranze e *staff* i annan ki'n vin vwar nou in koz ek nou. Nou'n fer referans taler lo *staff*, lo *sel*, Sirizyen madanm ki'n kite *or* ki ti pe kite. Mr Speaker akoz? Akoz personn pa ekout *staff*. Ler *staff* i dir ou son problem nou pa *care*, nou pa *deal* avek li, e nou les li ale konmsi nou dir nou ava rod en lot nou ava anmennen. Be se sa ki nou - se sa problem. Se sa

bann pli gro problem ki nou annan dan Minister Lasante nou pa pe ekout dimoun.

Mr Speaker problem dan servis, ozordi mon kapab dir ou konfirm ek ou ki poudir tes *pap smear*, bann ki'n fer depi Oktob lannen pase rezilta pa ankor gannyen. Be kote ki annan problem Mr Speaker? Me problem i laba anndan, problem i laba anndan.

Mr Speaker, Mr Speaker mon pa konnen si ou pa tann lot kote laba, i annan en komanter derogatwar ki'n ganny fer. E se Onorab Larue ki'n dir. E se Onorab Larue ki'n dir.

*(Interruption)*

**MR SPEAKER**

Kontinyen. *Order!*

**HON WALLACE COSGROW**

Mr Speaker, mon ti a kontan.

**MR SPEAKER**

Onorab.

**HON WALLACE COSGROW**

Mon ti a kontan, mon ti a kontan kontinyen san ganny enteronpe avek lot kote lata silvouple.

*(Interruption)*

**MR SPEAKER**

*Order! Order!* Silvouple. Annou sey les sa deba kontinyen dan en serten lord. Bann ki pe kontinyen kriy atraver lasal e sa i annan lo de kote. I pa zis en kote Onorab Pillay, i annan lo de kote. Onorab Cosgrow silvouple, kontinyen.

**HON WALLACE COSGROW**

Wi mon kontinyen Mr Speaker, me selman mon swete ou pran aksyon ek sa bann dimoun silvouple.

**MR SPEAKER**

Kontinyen Onorab!

**HON WALLACE COSGROW**

Mr Speaker si ozordi sa Mosyon lo defayans servis lasante in ganny anmennen, i montre ou ki poudir tou dilon la, nou ti byen sa ki nou ti pe fer nou. Bann pwen ki nou ti devret *point out* ti byen.

E nou'n byen pour nou anmenn sa bann problem devan nou. Me par kont Mr Speaker lot kote latab sak loportinite ki zot gannien, zot vin avek bann Mosyon glorifikasyon, glorifye Gouvernman pour isi, glorifye Gouvernman pour laba, felisit Gouvernman isi, felisit Gouvernman laba.

Menm letan, yer osi nou ti ganny en Mosyon koumsa. Menm letan avan nou ti al *recess* osi, nou ti ganny en Mosyon koumsa, nek nou felisite menm. Me selman problem dan bann landrwa i anta, in bokou e dimoun pe konplent Mr Speaker.

E i pa sirprann mwan, la nou'n ganny ziska prezan 2 *meeting* piblik e nou'n vwar ki kantite problem pe sorti dan sa bann *meeting* piblik. E i pe kontinyen sorti, i pour kontinyen sorti. Fodre pa ki nou ankoler vin dispit avek pep Seselwa dan Lasanble Nasyonal ler bann problem i sorti. I ancor annan, i reste ancor 24 distrik pour ale Mr Speaker.

So nou bezwen Mr Speaker realize ki poudir problem i avek *leadership*. Problem pa avek Ners avek Dokter, avek travayer lasante, avek sa drayver lanbilans avek sa *cleaner* ouswa sa bann *allied health professionals*, problem i avek di..rek..syon!

E ler napa direksyon keksoz i tonbe. Keksoz i tonbe e mwan apre midi Mr Speaker la mon pa'n pran laparol aköz mon krwar mon konn tou dan Minister Lasante mwan. Mon pe zis partaz enn pti pe sa ki mwan mon analiz pour mwan, e mon



sizesyon baze lo bann realite ki nou pe vwar, ki nou pe tandé.

Servis lasante ou *casualty* Mr Speaker i en refleksyon parey mon'n dir. I en refleksyon servis lasante ozordi, mank direksyon. E mon asire ki problemn *casualty* ozordi i pa zis en problemn *casualty* li menm li spesifik, i problemn dan Minister Lasante antye! E se sa ki pe reflekte ozordi lo servis *casualty*.

Mon pour donn en legzanp Mr Speaker, e bokou dimoun in koz lo la anndan la dan Lasanble. Bokou Manm in koz lo la. Bann problemn fondamantal petet ki fer sa problemn agrave kot *casualty*. Nou annan bann *clinic outpatient* bann klinik dan distrik partou. E nou konn egzaktaman keler zot bann ler *operate*, keler zot fermen, keler zot ouver, keler zot fermen.

Bokou fwa pandan sa bann letan i annan en kantite sa bann dimoun, sa bann letan zot pe travay. Zot pe travay, e klinik i ganny akse avek en kantite dimoun ki vini. Me i annan dimoun ki petet pe travay, e si i pe al absante dan son travay, i pour annan en problemn lo li, lo son saler, lo son fanmir, lo tou. E parfwa i deside tenir, sibir e al akse en servis lasante en pe pli tar.

Me ki nou vwar? Servis lasante pli tar pa ouver parey, petet i ti ava dezire pour li kapab al servi. E la kot ou vwar poudir klinik - *casualty* - pardon i ganny bouskile a en serten ler kot bann vre, bann vre *emergency* parfwa i pas avan *ortoultan* i pas avan dapre triyaz. E zot, zot vwar zot dan en sityasyon difisil.

Lot problemn Mr Speaker, Ozordi mankman resours dan bann diferan klinik, i fer ki dimoun e Onorab Aglae mon krwar in tous sa tre byen. E i en dimoun ki'n travay dan lasante i konpran byen. Mankman resours, i fer ki dimoun i tant pour al en landrwa kot i santi li konfortab, ki sa douler sa keksoz ki i pe gannye i kapab ganny en latansyon en pe plis spesyal kot *casualty*.

I annan en masin *x-tray*, i annan *CT scan* i annan *MRI*, i annan Dokter spesyalize, i annan bann masin pli spesyalize. So petet sa dimoun i santi li pli konfortab.

Alors petet i annan nesesite pour nou revwar fasilite dan nou bann klinik, ki ava fer sa dimoun annan plis konfyans, plis konfidans pour li al dan sa bann landrwa kot i a kapab akse en servis pli byen.

So Mr Speaker nou pa kapab ozordi blanm Seselwa,

piblik Seselwa ki akse *casualty* pour felir Minister Lasante, *leadership* Minister Lasante, pour met an plas bann *proper* striktir, bann *proper* striktir pour kapab adres sa problemm kot *casualty*.

I neselit ki bann dimoun ki fer bann plan, ki *devise* bann program ek Minister Lasante, zot adres sa *issue* atraver bann striktir, bann diferan stratezi e non-pa tir *the burden* lo zot e met lo piblik.

Mon krwar sa i kler Mr Speaker, i kler, kler e *leadership* i bezwen ekoute, si zot pa'n tande dan *meeting* ki zot ti fer avek *Caucus LDS*, zot a bezwen tande ozordi. *Leadership* i bezwen pran son responsabilite, e *leadership* i bezwen pran aksyon an sa ki konsern *casualty* e pa met lo led o piblik Seselwa. I osi senp ki sa Mr Speaker.

E Mr Speaker i annan osi en lot pti zafer ki mon anvi touse, avan ki mon termin mon lentervansyon Mr Speaker. E sa se kondisyon petet bann dimoun ki vin akse servis. I annan dimoun, parey nou dir nou, ou santi ou en douler, ou ganny ou en douler, ou pa Dokter ou, ou pa Ners ou pa Dokter.

So ou anvi sa pli bon swen, sa pli bon *care* pour

kapab *diagnose* ou douler. E dimoun i tant pour al sa landrwa parey mon'n dir ki enn pti pe plis spesyalize. E nou pa kapab anpes dimoun vini - nou pa pour kapab anpes dimoun vini. Nou pa pour kapab anpes dimoun vini.

E la mon lapel avan mon terminen Mr Speaker mon lapel se ki Minis Lasante i ekout sa ki nou pe dir e Minis Lasante a en pli kourt dele letan posib, san ki nou vwar nou servis *casualty* e lezot servis Minister Lasante kontinyen degrengole - o pli vit posib Minis i pran bann ka - e sa i en rekomandasyon ozordi ki mwan mon pe donn avek sa Mosyon - pran bann ka pour *improve* sa sistenm, e revir sa *pattern* ki nou vwar pe ale.

E parey Onorab Aglae in dir, si nou pa revir sa bann *pattern*, nou pour vwar nou servis lasante desann lo bann lendeks, parey nou'n vwar an term *Human Development Index* e osi an term lapres, *free* lapres.

So Mr Speaker avek sa mon pour termin la e mon ava ekout bann lezot lentervansyon. Mersi.

### **MR SPEAKER**

Mersi Onorab. Mon krwar nou a pran poz la. E akoz nou annan *meeting* Komite, mon pour

prolong nou poz ziska 2er 15.  
Nou a rezwenn 2er 15. Mersi.

**(BREAK)**

**MR SPEAKER**

Bonn apre midi tou dimoun.  
Nou bann Manm Onorab e nou *staff* Lasanble. Mon annan trwa Manm ki reste lo mon lalis pour entervenir lo deba. Mon ti a kontan konn lezot Manm ki anv'i entervenir, pour mwan kapab *manage* letan byen. Onorab Loze, Onorab William, tre byen i fer mwan 5. Avek 5 mon krwar mon kapab met 20minit maksimonm par Speaker.

So nou a prosed koumsa.  
E apre nou a termin avek sa 5 e loter Mosyon i a pas lo son konklizyon. Onorab Vidot.

**HON AUDREY VIDOT**

Mersi Mr Speaker. Bonn apre midi Mr Speaker, tou Manm Onorab, zabitan Roche Caiman e tou manm piblik ki a lekout. Mr Speaker ki nou ekspekte avek Minister Lasante ki ozordi i ankor pe fonksyonn lo son zenou? Kot bokou travayer, ensi ki bann pasyan pe vwar zot dan bann sikonstans vreman delika e pe rann zot fristre.

Travayer i kontinyelman fer resorti defayans e met bann konsern devan, me problemn i

kontinyelman antre dan en kote zorey e sorti dan en lot. Ler nou Manm lo sa kote latab in anmenn kestyon pour Minister Lasante, avek bi vwar amelyorasyon ek en bon servis nou sistenm Lasante ki nou'n vwar? Dan sa prose, nou'n ganny pa mal rezistans, ki swa par Minis e parfwa menm dan Lasanble Nasyonal pour nou ganny bann lenformasyon ki korek e kredib.

*Leadership*

Ladministrasyon LDS i kontinyelman penn en portre ki tou keksoz i *ok*, kontrerman avek larealite ki piblik e menm travayer lasante pe fer fas avek. Dan plas vin reasir pep Seselwa ki ladministrasyon LDS pe al adres bann defi nou sistenm Lasante, Prezidan Larepiblik ti vin devan nou Lasanble resaman e vin dir avek Lepep Seselwa ki nou pa konn servi sistenm Lasante, e menm ki nou pa konn fer distenksyon ant ka dirzans e ka ki pa irzan.

E la ozordi, enn son Manm Lasanble Nasyonal i vin avek en Mosyon ki koz lo labi servis *casualty* lo Lopital Sesel. E sa ankor i montre endirekteman kot pe ensilte piblik lo - ki tonm malad e ki vwar ki santi i pa kapab esper pour al dan son klinik rezyonal.

Me Mr Speaker ler mon ti fer resorti dan mon Repons lo Ladres Prezidan Larepiblik, lo leta nou sistenm Lasante lo lot kote latab pa ti kontan. E si zot in bliye ki mon ti dir, les mwan fer zot rapel. Mon site, "Dan limesya atraver bann Bidze ki'n ganny vote, kwa ki pe ganny fer pour soulaz kondisyon bann travayer e pasyan nou lopital? Eski Prezidan Larepiblik pe dir avek Lepep Seselwa ki ler zot malad pa vin - pa vin servi *casualty*?"

Si wi Mr Speaker, kote eski sa bann ki tonm malad apre ler i sipoze al rod zot swen lasante? I enportan fer resorti ki mazorite bann klinik rezyonal i frenmen apartir 4er apre midi e - a leksepsyon Klinik Anse Boileau e Klinik Anse Royale ki fonksyonn 24 lo 7 e Klinik La Rivyer Anglez ki ouver ziska 8er diswar. Pour met a latansyon Prezidan Larepiblik dan rezyon nor, santral an desandan distrik Au Cap, tou bann zabitan i sipoze desann kot Lopital Sesel pour ganny en swen medikal.

Ki alternativ eski Gouvernman LDS pe sizer avek Lepep Seselwa an vi ki nou pe ganny dir endirekteman pour aret raport kot *casualty*, ler nou tonm malad si pa ka dirzans?" Fen sitasyon.

Mr Speaker, nou ti'n ganny dir ki en nouvo lopital pe al ganny konstrir. Me i pa ankor kler ki Gouvernman pe vin ouver en lot brans kot Lopital Sesel, ouswa en lot dan rezyon santral pour deservi nou bann piblik.

Me mon ti osi fer resorti dan mon repons lo Ladres Prezidan ki bann - ki dan rezyon nor e santral i annan 2 klinik prensipal. Sa se Klinik La Rivyer Anglez e Klinik Beau Vallon, ki pli pre pour bann pasyan dan sa rezyon servi.

E zisteman pou tret bann tel ka koman tansyon for, tansyon o e tansyon ba, *asthma*, lafyev for, parey in ganny fer resorti par serten entervenans ki'n koze avan mwan, kot sa pasyan i pa santi li kapab esper bomaten ler klinik i ouver.

E i enportan note ki serten sa bann maladi espesyalman pour bann pti zanfan, dimoun ki a laz avek serten maladi kronik, e menm bann madanm ansent, zot lavi a risk si zot pa ganny sa bann swen, tretman vitman.

Mr Speaker, mon ti menm fer resorti, ki nou rekonnet ki i annan en mankman travayer. Me ki mon plis ki sir ki si vreman Gouvernman i responsab e i anvi ede pour

soulaz pep, zot ti pour sey rod tou fason efektif pour fer marse enn ou sinon sa de klinik.

Me ki zot in fer ziska prezan, nanryen. Me malgre tou lesey nou lo sa kote latab pandan sa dernyen 2an, e atraver nou bann kestyon dan Lasanble pour Minis, sityasyon aktyel Lopital Sesel in kontinyelman agrave.

Ozordi plis ki zanmen ler nou lopital i vin pli dan leta deplorab. Dan sa plis ki 2an olye aranz zot akoz zot pa ti kapab fer pli byen ek sa swadizan kales kase ki zot in dir zot i erite? I kler ki zot pa enterese. Me sa ki enteresan Mr Speaker se ki ler mon ti fer sa bann rekomandasyon, e koz lo larealite leta sistenm Lasante, lo lot kote latab pa ti apresye.

E Gouvernman pa'n enterese pour ekoute. Me ozordi la, i enteresan pou vwar ki dan zot bann deliberasyon bomaten, zot in menm fer sorti, sa bann menm keksoz ki mon'n site dan mon prezantasyon repons lo Ladres Prezidan Larepiblik.

Mr Speaker, si pasyan i kontinyen ganny dir ki napa latizann pour bann maladi kronik dan farmasi. Ler pasyan pe ganny demande pour li aste latizann prive, e pli pir Mr Speaker, bann pasyan ki reste lopital zot kontinyelman ganny

demande pour zot anmenn zot tapi, anmenn zot dra tetdorye, kanmenm zot pa kontan lo lot kote latab ler nou repete poudir zot. Be nou annan en problemm. Problem i la.

Mr Speaker - e de lot kote bann pasyan ki kot lakour zot kontinyelman vwar zot dan difikilte, pour zot ganny sa sipor nesaser atraver servis lasante. Ki swa ler zot pour ganny, zot pour ganny fasilite avek travayer napa transpor. Si i annan transpor napa ase travayer ki pe travay lo *duty* kot klinik. Atraver ou Mr Speaker, eski sa bann problemm i 43an pase Onorab Norbert Loizeau? Larepons i non.

Akoz sa bann *post* fristrasyon ki piblik i kontinyelman met lo medya sosyal pa date 43an pase Onorab. In arive anba zot *watch*, zot ladministrasyon.

Mr Speaker, *LDS* ti ganny elekte pour fer pli byen. Mon pa pe kapab konpran akoz ki *LDS* pe konplent parey Onorab Norbert Loizeau atraver ou Mr Speaker, si lo lot kote latab zot pa vwar nou pe asiz akote zot, oubyen pe partisip ek zot.

Mr Speaker, ler Onorab Pillay i fer kler ki zot pa onnet laba lo lot kote latab ek zot Mosyon ki zot amande pour tir responsabilite lo zot

Gouvernman. Aret vin repet menm keksoz ki nou, nou'n dir zot pour zot fer, pour zot servi dan zot bann lentervansyon pour donn kredi zot Mosyon.

Erezman piblik i kapab swiv nou Lasanble Nasyonal ozordi, pour rapel lekel ki koz pour zot, ler lo lot kote latab ti pe flate dan Diskour Larepons Diskour Prezidan Larepiblik. E piblik i konnen lekel ki koz pour zot vremen zot sityasyon e Leta nou Nasyon ozordi.

Mr Speaker, nou'n deza demann keston Minis pour annan letid pour vwar vre e konpran Leta nou Nasyon, lasante nou Nasyon. Akoz sa kantite dimoun espesyalman nou bann zenn ki pe mor a en tre zenn-az. Kantite ka swisid ki nou'n vwar, nou'n rankontre dan nou pei sa dernyen letan la.

Be ki zot in fer ziska prezan? Ankor nanryen. Olye zis monte desann aletranze zis pou fer zot bann fo promes ki zot pa kapab delivre akoz zot pa ti fer parey Onorab Aglae in dir zot. Koz avek nou bann ansyen profesyonnel lasante, e vwar bann osi ki ankor la ki kapab - valoriz zot bann pwennvi, amelyor zot kondisyon travay bann ki la e siport zot dan zot bann travay pour asire ki nou servis lasante i kapab e posib pour li vin pli meyer.

Mr Speaker, dan plas rod leskiz 43an, kan zot in ganny elekte pour travay pour fer pli byen, pour redres nou swen servis lasante, aret dir nou pasyante, esper nouvo lopital. Be dan tou sa bann nouvo lopital ki zot pe koz lo la espesyalman sa enn ki zot koz bokou lo La Digue. Ki zot pour mete ladan? Si la zot pa ankor kapab fer en zefor pour zot kapab ekip e administre sa ki nou'n deza annan ozordi.

Ler zot kontinyen ek zot bann gran, gran plan antretan nou bann pasyan i kontinyen malad. Zot kontinyen pa ganny zot latizann, konplent, mankman lekipman ki resaman menm lekipman ki Vis-Prezidan ti dir nou zot in gannyen dan donasyon, me pa vwar oli.

Ler pasyan i bezwen e nou bann travayer a kontinyen depans dan zot pos pour zot aste swa zot resours, oubyen zot liniform travay. Sa ki kler se ki Ladministrasyon LDS, pa pe vwar Leta nou Nasyon, swa zot vwar, swa zot le fer krwar zot pa anvii vwar. E zot bann dirizan, zot napa nou lasante koman zot priyorite. Zot petet akoz zot ganny zot *allowance*, zot kapab get zot sipor prive oubyen al aletranze.

Me sa ki pa akseptab pour zot kontinyelman met blanm lo

travayer e piblik, zis zot *leadership* dapre zot ki pe fer byen. Mr Speaker mon bezwen dir ki i vreman tris pour vwar *leadership* Ladministrasyon LDS met blanm lo travayer ler i pa kapab delivre lo son responsabilite pour li govern pei.

E la ozordi, en mazorite ankor, ki pep Seselwa in konfyè zot pour met presyon lo zot prop Gouvernman pour fer pli byen, zot vin avek en Mosyon pour ankor enn fwa blanm piblik ouswa blanm pasyan, akiz zot ki zot fer labi lo servis *casualty*.

Olye pran desizyon revwar e valoriz resours ki zot annan, pou tir sa presyon lo sa servis e bann travayer ki pe devoue, pour zot kapab akonplir zot *core* fonksyon, kot sa servis *casualty*.

Ler zot in ganny en manda pour fer pli byen e zot in admet ki zot ki pe *run border*, aret rod leskiz 43an. Menm zot siporter in fatige tann zot pe rod leskiz lo 43an, lo problenm ozordi. Aret konplent aköz US pa enterese pour vin asiz akote zot deryer rido.

E la mon le enform Onorab Sandy Arissol atraver ou Mr Speaker, ki nou lo sa kote latab nou pour kontinyelman fer Gouvernman LDS travay par nou bann kestyon dan Lasanble

Nasyonal. Kontan pa kontan nou bann *PNQ*, nou pour kontinyelman anmennen.

Zis parey zot in kapab al rod sa larzan kot serten Onorab, ti dir, “Kote nou pour gannyen?” Ler nou ti demande ki pour nou bann zanfan, nou bann etidyan lekol i ganny zot bann goute aköz i annan paran pe vwar zot difisil, pour zot kapab siporte zot zanfan.

E nou lo sa kote latab, nou pa bezwen asiz o bor Prezidan dan *meeting* piblik nou pou fer Gouvernman LDS marse. Pa zot ki pe *rule border*? Pa zot ki pe govern pei? 43an nou'n la 2an edmi zot bezwen nou pour asiz o bor zot.

Koman en Manm Elekte, mon'n fer li e mon ankor pe fer li mon devwar, zis parey lezot US lo sa kote latab, pour kontinyelman fer nou vizit, vwar nou bann dimoun, fer letan pour nou koz ek nou bann dimoun.

Nou pa bezwen asize o bor Prezidan Larepiblik pour nou konnen ki mannyer son Gouvernman pe mal fonksyonnen. Par kont mon felisit tou sa bann sitwayen dan tou sa bann distrik, ki'n kouraze pour zot vin an piblik poudir li, poudir avek Prezidan avek son bann Minis ki son ladministrasyon i annan en

kantite travay pour fer, pour amelyor zot servis, pour amelyor sa sanzman ki pep Seselwa ti konfyé dan zot pour zot kapab delivre e fer pli byen ki nou, ki'n la pour 43an.

Mr Speaker, mon pour konklir, mon bezwen agree avek mon koleg Onorab Wallace Cosgrow ler nou annan en ladministrasyon ki pa kapab delivre, kot zot pe travay lo *trial and error*. Se pep Seselwa ki pey lepokase. Nou touzour pare nou lo sa kote latab, pour nou siport nou sistenm Lasante.

Me sa ki nou pa pour fer e sa ki nou pa krwar nou pe fer, se lev nou lanmen, pour nou siport en tel Mosyon, kot blanm ankor enn fwa i ganny mete lo ledò piblik Seselwa. Kan loter Mosyon ki'n ganny elekte par sa bann menm piblik, ti kapab fer bokou pli byen e met presyon lo son Gouvernman, lo son ladministrasyon pour fer pli byen.

Zot in ganny en konfyans, an mazorite pour travay pour sa pep, pour delivre pour sa pep. 2an edmi zot in la travay e delivre dapre manda ki zot in gannyen. Nou dan *United Seychelles*, nou pa kapab vin zot paran, pour vin tyonbo zot lanmen akote zot pour fer li. Sakenn i annan son

responsabilite pour delivre, annou delivre.

Lo sa note Mr Speaker, mon a sezi sa loportinite pour mwan felisit tou bann travayer pe enport bann difikilte ki zot pe fer fas avek, menm si i annan zot ki pran zot risk zot koze pou dir kote kot nou kapab fer pli byen, kote ki mal.

Me malerezman zot bann parol pe tonm dan bann zorey sourd. Mon sizere ki, e mon swete ki sa bann kontrent ki piblik i met a latansyon Prezidan, zot pran li o serye e pa zis fer bann *quick fix* parey Onorab Aglae in dir ki zot abitye vin fer. Non, non, non, non-Seselwa elekte zot pour zot travay, pour delivre, delivre! Mersi Mr Speaker.

### **MR SPEAKER**

Mersi Onorab. Onorab Gill, ou annan laparol.

### **HON CHURCHILL GILL**

Mersi Mr Speaker. Bonn apre midi tou Manm e tou dimoun a lekout. Mr Speaker, loter Mosyon dan son lentrodiksyon in elabor lo tou bann fasilite lasante ki annan dan pei. In menm mansyonn Praslin/La Digue. I montre ki i enportan tou sa bann landrwa i ganny...

Ozordi bann dimoun i kapab konnen ki vreman leta sa



bann landrwa. In donn en pe statistik. Me selman mon konsyan i pa pou kapab donn statistik pou Praslin par egzanp. E mwan, mon, mon a fer sa bout.

E, Mr Speaker, ler mon'n ekout lentervansyon mon bann koleg lo sa Mosyon, mon pli konvenk ki sa problem lasante i reel e serye. E i lo en nivo nasyonal. Rezon ki mon dir i lo en nivo nasyonal, ler mon'n ekout mon bann koleg kote isi, e bann Manm lo kote latab ki'n koz spesifikman lo bann fasilite isi Mahe, e ler mon pou met zot okouran fasilite Praslin ki manner i ete, nou tou nou pou kapab realize ki sa problem i lo en nivo nasyonal.

Tou sa bann problem i vize ver en lenkonpetans serye. I enportan nou konsyan ki lasante imen ki nou pe koz lo la ozordi. Bokou zabitan Praslin in koz ek mwan, e fer sorti zot konsern tre serye. Mwan, mon'n menm *visit* Lopital Baie Ste Anne a plizyer repriz. Ler mon'n vwar sityasyon, mon'n anmenn plizyer kestyon pour Minister Lasante isi dan sa Lasanble, dan lespri pou ganny en solisyon pou bann dimoun ki servi sa bann fasilite.

Me mon kapab dir, la ler mon pe koze ozordi, mon tre dezapwente aköz mon'n dan

*visit* ek Minis. Nou'n fer *meeting* avek bann *staff*, ek kontrakter ki ti sipoze fer epe travay. Me selman ozordi, ler mon pou'n fini koze, dimoun pou'n konpran aköz mon dezapwente, aköz tou sa ki mon pe al dir mon'n anmenn dan Lasanble, e an menm tan nou'n koz lo la dan nou bann *meeting* ki'n ganny fer.

Mr Speaker, Lopital Baie Ste Anne in vremen ganny neglize. La ler nou pe koze, *casualty* parey isi Mahe, *casualty* kot Lopital Baie Ste Anne son twa i koule. Napa desizyon ki'n ganny pran, kan ki pou ganny repare. *Oxygen Plant* i bezwen en *medical cash machine*. *Lab* ki ti sipoze bouze pa ankor ganny bouze pou li kapab ganny ekipe avek bann nouvo lekipman. *Hyperbaric chamber* pa ankor kapab ganny adrese.

E mon dernyen kestyon ki mon ti anmennen avan *recess* ti egzaktaman lo sa. E Minis ti konfirm ek mon ki sa pe al ganny adrese. E la ozordi mon pe konfirmen i pa ankor ganny adrese. *Laundry facilities* i ankor parey. I sipoze travay lo la. Pa ankor ganny travay lo la.

Mr Speaker, sa nivo neglizans ki Lopital Baie Ste Anne in ganny neglize i pa akseptab e i pa zistifye. Mr

Speaker, atraver ou, Onorab Loizeau in dir ki tou sa bann fasilite ti la avan Oktob, 2020. Mon dakor avek li, zot tou zot ti la. Me dan sa Lasanble la, dan sa dernyen 2an, nou'n aprouv Bidze pou Minister Lasante, e i en tre gro Bidze parey nou tou nou konnen.

E si Bidze in ganny donnen i vedir ki *as far* ki larzan i konsernen, i pa sipoze en problem pou adres sa bann size.

E alors i montre nou ki si Lopital Baie Ste Anne i dan sa leta, se sa ki mon dir i pa akseptab aköz Bidze in ganny donnen. Eski tou larzan in ganny depanse zis lo bann fasilite Mahe, e sa i fer ki Praslin pa'n ganny preski ditou alokasyon dan sa Bidze?

Mr Speaker, mon pe demann sa ladministrasyon pou fer en zistis dan sa alokasyon Bidze Minister Lasante pour Lopital Praslin benefisyè avek alokasyon neser, pou kapab adres tou sa bann problem.

E mon pe demande pou ki sa bann defayans dan Lopital Baie Ste Anne i ganny adrese. Nou le vwar en Program *Preventive Maintenance* i ganny met an plas, e sa *tender* pou *general maintenance* lo Lopital Baie Ste Anne ek Klinik Grand

Anse Praslin i ganny fer, imedyatman.

Zabitan Praslin i le vwar benefis bidzeter pei parey tou lezot fasilite medikal dan pei. Mr Speaker, atraver ou, yer Onorab Larue ti mansyonnen ler i ti pe koz lo nouvo por pasaze Baie Ste Anne, konmkwa mon ti devret apresye, konmkwa en nouvo fasilite in ganny fer dan distrik.

Mon a profite petet pou klarifikasyon tou sa bann keksoz ki pe arive, ki'n arive dan distrik Baie Ste Anne, mwan ki'n deryer tou sa bann keksoz. Mon'n negosye ek tou sa bann Minister.

**(APPLAUSE)**

**HON CHURCHILL GILL**

E sa lasose pasaze pou ou lenformasyon, son lasose ti'n fini konplete.

**MR SPEAKER**

Onorab note ki ou pa ditou lo Mosyon, en.

**HON CHURCHILL GILL**

Mon'n koz lo Mosyon mon, me selman i enportan aköz ou pou vwar ki mannyer sa i *link* ek sa Mosyon.

**MR SPEAKER**

Akoz la ou pe koz lo en Mosyon yer.

**HON CHURCHILL GILL**

Non, non. Mon pa pe koz lo Mosyon yer. Mon pe koz lo en komanter ki ti fer yer. En komanter, pa Mosyon. Sa komanter, e lasose ti'n fini fer Oktob, 2020. Rezon ki mon'n fer sa *liaison*, se pou montre poudir lo fasilite ki'n deza fer, ler nou met en bout, nou glorifye nou dir travay pe fer. Lo fasilite ki li in deza la, Bidze in deza donnen, nou war tou sa defayans.

Alors se sa ki mon pe demande ki sa ladministrasyon i fer zistis sa Bidze ki'n donn Minister Lasante, pou ki Lopital Baie Ste Anne Praslin, ek Klinik Grand Anse Praslin i a kapab vin lo en standar ki merite, dan plas nou war nou dan en sityasyon avek bokou fasilite pa pe fonksyonn alaoter parey ki nou ti a bezwen.

E lo sa *note*, mon le remersye tou sa bann travayer dan Lopital Baie Ste Anne, dan Klinik Grand Anse. Menm dan sa tel sityasyon difisil, zot ankor pe kontinyen donn zot sipor pou nou bann pasyan ki vin lopital. E pou sa mon le remersi zot. Mersi Mr Speaker.

**(APPLAUSE)**

**MR SPEAKER**

Mersi. Mersi Onorab Gill. Onorab Uranie, ou annan laparol.

**HON ROCKY URANIE**

Mersi Mr Speaker. Bonn apre midi tou koleg Onorab. Bonn apre midi tou zabitan Zil Pros ki a lekout. Mr Speaker, se bon statistik ki pou demontre ki kantite dimoun ki abiz servis *casualty*. Me vi ki i annan tou sa kouler pou triyaz, sa dan li menm i vedir ki *casualty* i ekspekte tou dimoun ki tonm dan sa bann diferan kategori, i kapab akse servis *casualty*, servis *emergency*, kantmenm i pou esper 240minit. 4erdan.

Mr Speaker, sa *spectrum* kouler rouz ziska ble i donn pasyan sa louvertir pou ariv kot *casualty* e rod zot servis. Si ou get byen sa *spectrum*, dimoun pe servi li parey devret, zot pa pe abize, aköz i annan sa *leeway* ladan. I pran tou kategori. I annan 5. I annan ki tonm dan rouz e ale, i annan ki tonm dan ble. Zot pe servi li. So, mon pa krwar i apel labi.

Mr Speaker, savedir osi ler ou gete, *casualty* i... Ler dimoun i ariv laba, laba ki pou konnen ki kantite irzan ki son ka i irzan atraver triyaz. Sa bann dimoun pa pe fer naryen mal zot. Zot vin

akse servis. Ler zot ariv laba, laba ki zot konnen kantite irzan zot ka i irzan. So, zot pa pe abiz servis ler ou gete. Zot vin rod en servis.

Mr Speaker, sak dimoun ler i malad, i reakte dan en fason, dan en serten fason atraver son maladi, oubyen maladi enn son pros. Sa ki pa en *emergency* pour mwan, sa ki pa *emergency* pou ou, sa ki pa en *emergency* pou en travayer lasante. Me pou sa dimoun ki pe pas atraver sa malad, oubyen sa malez a sa moman, i kapab santi ki son ka i en *emergency*. E alors i pou raport kot *casualty*. Eski sa i vedir i pe abiz sa servis? Sa i en kestyon ki nou bezwen demande.

Mr Speaker, bann pasyan ki pe akse sa servis zot pe mazine ki laba i annan plis spesyalis, bann Ners ek Dokter ki pou kapab ed zot vin pli...Ed zot pli vit. Donn en proksimite kot zot reste, e fasilite zot ekspekte gannyen laba *casualty*. Alor nou pa bezwen akiz Seselwa pou abiz en sistenm ki pou zot, zot pe servi li normal.

Ledikasyon kisisa en *emergency* i osi en keksoz enportan, akoz plizyer dimoun i vwar li dan son fason. I annan dimoun ki malad e i krwar ki i pa *emergency*. E la i al kot

klinik. E se laba ki i ganny refer kot *casualty* koman en *emergency*. Sa bann kalite pasyan, tanperaman i for. Zot pa santi ki zot malad, ti en *emergency*. Sa i ankor levidans ki fer nou vwar ki sak dimoun i vwar *emergency* dan son fason pou akse *casualty*.

Mr Speaker, kot Lopital Sesel i site i pa lwen pou bann dimoun dan distrik santral. Parey Bel Air, St Louis, Mont Buxton, Rivyer Anglez, kantmenm i annan klinik. Perseverans, Mont Fleuri, Plaisance, Roche Caiman, e menm Les Mamelles i osi kantmenm i annan en klinik. Nou pe koz plizyer mil zabitan sorti da tou sa distrik.

Zabitan dan sa bann distrik i fasilman kapab ariv kot *casualty* ki bor zot site. Zot pa fer li akoz zot anv'i abiz sistenm, oubyen sa servis *emergency*. Me zot pe plito rod en servis lasante ki pou ed zot rezourd zot problenm. Annou pa bliye ki lasante i avan tou. Bann ki ganny gro *allowance*, bann ki'n byen aranz zot, parey nou'n tann dir. Zot, zot kapab *afford* al prive oubyen zot al aletranze. Me lekel ki akse *casualty* plizoumw'en? Petet i bann pti malere ki vin la.

Mr Speaker, sa i anmenn mwan lo kote distrik kot tou i

konmanse. Tro bokou problemn dan servis parey mank mendev, parey Ners, Dokter e Spesyalis. Mank resours parey latizann, mank bann keksoz debaz, e osi bann masin neser, pou delivre lo nivo distrik ki fer ki bann travayer lasante i vin fristre. E plis fristrasyon i par bann pasyan ki pa pe ganny sa servis ki zot merite.

Gouvernman fodre i met larzan dan lasante. Fodre i met resours dan klinik pou bann travayer lasante kapab donn servis ki zot devret. Koumsa pasyan i ava satisfè avek servis ki zot pe gannyen, e la zot pa ava bezwen petet al *casualty* koman *emergency*.

Mr Speaker, fer konstruksyon *building* i enportan, e nou'n fer en kantite sa dan Gouvernman avan. En keksoz fodre pa zot bliye, se ki nouvo *building* i bezwen annan bann fasilite, bann resours neser, bann travayer lasante kapab, e ki kapab travay byen, e ki kapab donn pasyan sa bon servis.

Sa i anmenn mwan lo Lopital La Digue. Eski pou annan mendev parey Onorab Vidot boner in dir, in koz en pe lo la i osi...Eski pou annan mendev e tou sa fasilite pou donn sa bon servis? Akoz sa enn pli pti Lopital Logan, nou

vwar bokou mankman. E la enn pli gro, ki prezan mon pe konpran dapre *meeting* piblik ki'n fer yer, ki pou osi deservi Pralinwa. Problemn pou *reverse* prezan. Problemn ki pasyan Digwa i gannyen ler zot ganny refer pou al vwar spesyalis Praslin, se prezan Pralinwa ki pou probableman gannyen ler zot ganny refer La Digue.

Akoz mon dir sa Mr Speaker? Enn; Lannen pase pasyan ti ganny problemn akoz *Cat Cocos* pa ti oule pran zot, akoz peyman par Minister Lasante ti an retar. E la a ler aktyel, mon'n ganny fer konpran ki *Cat Cocos* i pe pran pasyan prezan. Sa problemn ti rezourd. Me i pa pe pran *staff* lasante ki pe al Praslin oubyen Mahe, pou al travay, kantmenm zot annan dokiman ki sorti kot Minister Lasante ki zot prodwi. Ankor problemn.

Lannen pase mon ti bezwen *call*. Eski la mon pou bezwen ankor mwan menm *call* pou Minister kapab rezourd sa problemn, akoz ki bann travayer, bann *staff* lasante, *Cat Cocos* pa pe le pran zot kantmenm zot annan dokiman? Eski i annan pou fer ankor avek peyman? Ankor problemn.

Mr Speaker, Digwa ki desann Praslin oubyen Mahe i pas dernyen. Zot ganny

demande pou vin vwar spesyalis, e zot pas dernyen. Ler zot arive, tou bann pti nimerò in ganny pran, zot war zot pe ganny bann gro nimerò pou vwar spesyalis, e zot bezwen taye pou reganny bato, oubyen zot bezwen reste *overnight* Mahe ki vin avek en lot kou lo sa pasyan.

E sa, Minister i pa kouver. Mon swete ki bann ki responsab i tann mwan e fer en fason rezourd sa bann problem.

Mr Speaker, Gouvernman i bezwen seryezman met larzan kot i devret. Rod spesyalis si napa. La *ENT* spesyalis La Digue zot pa pe vini, zis *backlog* in akimile. Prezan ki pasyan i akimile. I annan enn ki pe fer zis loperasyon kot Lopital Sesel, me i pa pe vin dan distrik.

Anviron 10 zour pase dan koridor Lopital Sesel ti plen, e mon ti la mon ti vwar bokou paran ti'n ganny demande pou anmenn zot zanfan pou fer loperasyon, me ti napa landrwa pou met zot. Bann pti zanfan 4an, 5an La Digue ki'n vin fer loperasyon 10 zour pase, e ki sipoze fer *review* apre 2 semenn, pou gete si tou keksoz pe al byen apre loperasyon, pe ganny dir ki napa *ENT* pou fer *review*. Zot pe ganny dir, madanm, non ou piti i la dan liv

*aussitôt* ki i annan *ENT* dan pei, nou ava fer ou konnen. Manman problem. Paran pe call mwan pe rode ki pou fer.

Gouvernman fodre i vin pli efektiv, aköz nou vwar problem i la, problem i bokou. Dan bann rankont piblik kot pe fer, zis dan 2 distrik problem in deza bokou, e i reste 24 parey Onorab Cosgrow ti dir.

La nou pa konnen kan sa bann zanfan pou ganny zot *review*. *Orthopaedic Surgeon* apre 1 mwan ki pa'n vin La Digue, finalman la in konfirman ki le 25 May i pou vini, e la mon swete ki nou bann zabitan i a ganny sa servis pangar kestyon i a ganny leve dan *meeting* piblik.

Mr Speaker, mon swete, mon senserman swete ki sa gro lopital ki zot pe koz lo la *nonstop* i vreman rezourd zot problem. Nou pa fou oubyen fol, parey entel in deklare taler ki li i fol. Nou La Digue nou konsyan ki nou bezwen en lopital modern. Me si Lopital Sesel i dan gro problem, manman problem, mon pa konnen kote zot pou gannyan pou met La Digue! La pa zis mwan, me bokou Digwa, bokou zabitan i annan sa lensertitid.

Mr Speaker, tou pti resours i enportan dan lasante.

Si ou'n vin koman en pasyan *emergency casualty*, e ou'n ganny prete en tapi, en dra ek en zorye, ou bezwen retourn avek. Ou pa kapab gard se ou. E ler ou ganny demande aköz ou pa retourn avek ou dir aköz ou pey *tax*. Konmsi i *ok* pou ou garde. Rann sa tapi silvouple.

*(laughter)*

### **HON ROCKY URANIE**

Mr Speaker, la mon profite ankor pou swet tou bann Ners ki pe travay *smart*, annou pa zis travay dir. Nou bezwen dir travay *smart* pou sey donn nou sa bon servis, malgre tou bann defi. Vi ki nou'n feki fini selebre Lazournen Enternasyonal bann Ners. Mon swet tou bann travayer lasante osi kouraz dan zot profesyon. Mersi Mr Speaker.

***(APPLAUSE)***

### **MR SPEAKER**

Mersi. Mersi Onorab, annou pa bliy Mosyon, en. *Wording. Emergency* ek *casualty* dan Lopital Victoria. Onorab Loze, ou annan laparol.

### **HON JOHAN LOZE**

Mersi Mr Speaker. Mr Speaker, dan mon lavi adilt mon rapel en fwa ki mon'n servi sa fasilite ki

zot pe dir *casualty, emergency*. Koman zanfan, letan zanfan, manman mon ti viv laba, aköz mon'n grandi Mont Fleuri mwan. Tou sa bwa, tou sa lapay, tou sa 5 pwen zegwir, 10 pwen zegwir mon menm. Depi laz 5an mon krwar mon pe monte desann laba.

Be selman koman en adilt, *once*. E sa sete letan mon ti fer mon maladi kot mon ti ganny *ischemic attack, ischemia* dan mon 2 lazann. E i enteresan sa zour, mon parkour ti konmans Bel Ombre kot Onorab Arissol laba, kot mon ti zwenn Dokter Commettant avek son lekip. Mon krwar li osi i en zanfan Bel Ombre, kot zot ti balans mon tansyon avan fer mwan desann *casualty* laba. E en bon group travayer, bann Ners Seselwa tre konpetan. E zot in ed mon avek en kantite keksoz letan mon ti laba Bel Ombre.

Mon'n ansuit al *casualty* kot mon'n fer en seri *test... a battery of test*. Tre efikas, byen ekipe. Fantastik. Mon napa konplent. *Franchement* dir en, *not a single complaint*. Apre mon'n *admit* lo *ward* kot laba osi mon'n pas - mon kapab dir, si ou kapab dir sa lo lopital. Mon'n pas en bon sezour pandan 4 ou 5 zour. *I personally have no complaints*.

En keksoz enteresan mon le met devan zot. Si mon ankor annan mon 2 lazanm ozordi, se gras a en *Nurse casualty*. En Ners Seselwa. Apre ki mon ti'n anpaye avek sa Dokter, mon tousel la anndan dan en *bay*. Li i avek son telefonn, ek son bann rezilta lo la pe get mon, ler mon demann li en *second opinion* i dir mwan; "*First opinion, second opinion, ischemic is ischemic.*" Fini ek mwan li!

Sa Ners ki ti apros mwan, koz avek mwan, mon pa pou dir egzaktaman ki i ti fer, ki i ti dir mwan, be selman i ti donn mwan en direksyon dan lekel mon ti kapab ale, pou mwan trouv en serten solisyon. En *Nurse Seselwa* dan sa ki nou apel *casualty*. Set en *Nurse Seselwa* lo *ward* ki ti vini, i ti idantifye lefe ki letan i pe get mon *chart*, i dir mwan," Onorab be ou dokter pa'n preski *pain killers* pou ou, ou pou bezwen *morphine* aswar, ou pa pou dormi avek sa lazanm ou. "

E se sa sel Sirizyen madanm ki zot dir ki ti *on duty* la sa aswar, ki ti pran ek mon latizann, pran ka avek mwan, e komans mon bann demars pou mon al sonnyen, akoz mon ti'n komans fer tanpet, mon ti'n dir zot *discharge* mwan. Mon ti pe ale sansan. Be nou bann travayer lasante Seselwa.

Mon konnen Mr Speaker ou'n dir swiv gidans Mosyon. Be mon le *hark back to mon theme* ki mon ti pran diran mon repons lo *speech* Leta Lanasyon. *Who is going to care for our carers* zot Senyer Bondye? Lekel ki pou okip e get dan *welfare* nou bann travayer lasante Seselwa? *Front office, back-office workers* lo tou nivo. Letan ou la anler lo sa *ward*, de fwa sel sourir ki ganny mete lo ou figir, se sa bann *nurse's assistant*. Zot, zot plen ek lenerzi, zot *toujours gay*, they *bring a smile to your face*.

Ti annan en bonnonm pre o bor mwan ti fek opere. Sa bann marmay i vini dan bomaten pou vin benny li. *Au faite* zot ti sorti anler lo *ward* madanm apre zot ki zot ti'n fini, zot ti desann anba lo *ward* zonn. Vini, takin sa bonnonm, sikann li, dan son douler. I ti'n *amputate* en pous i osi. *Brought a smile to his face*.

Be lekel ki pou pran ka ek zot? Lekel ki pou pran ka ek nou bann profesyonnel lasante Seselwa? Apre sa ki zot in pas atraver avek *COVID*, zot lasante. Mon ti mansyonnen lot fwa, e *au faite* mon ti servi sa menm mo ki Onorab Loizeau in servi ozordi. Mon dir bann ki ti napa en pti mo dan son zenou



avan, ki ozordi i annan en pti mo dan son zenou.

Lasante mantal nou bann *healthcare workers*. Zot *welfare*, zot kondisyon finansyel. Kan eski *Management* Minister pou reveye e pran li en desizyon pour met an plas en striktir ki pou get dan lasante, dan *welfare*, dan kondisyon travayer lasante. Mon sa i enn mon konsern primer.

Resaman mon ti tann en profesyonnel lasante isi anndan fer en *statement* konmkwa ki dernyen fwa ki *Scheme Nurses* ti ganny revwar, ti annan en amelyorasyon, ti ler zot ti marse dan semen, zot ti al debout dan semen. Be i fo sa. I konpletman for sa. Nou asiz isi anndan dan Lasanble Nasyonal nou dir keksoz ki fo, ki *erroneous*. E dimoun deor i krwar.

Mr Speaker, le 7 Avril, 2020, nou ti annan en *revised budget* pou lannen 2020. E letan ou al dan *speech* Minis Anbasader Loustau-Lalanne *for the revised budget* lo *Clause 10.1. Nurses and Health Care Assistants Scheme. Provisions have been made for the nurses and health care assistants' schemes are revised and will take effect as from July 2020. A sum of R13.68 million is being proposed for this.*

E sa ti en *revised budget*. Mon tann enn laba pe kriy eleksyon. Ti en *revised budget* ki ti ganny fer pou *COVID*. Ti fer pou *COVID* sanmenm sa ti pran ka avek nou bann *health workers*. E sa i dernyen fwa ki zot *scheme* ti ganny revwar. Pa ler ti al marse dan semen. So, nou bezwen konmans koz en pe laverite isi anndan.

Ozordi i annan en keksoz ki mon'n konstate mwan isi anndan. Zot bezwen nou. Zot bezwen nou. Parti *LDS*, zot bezwen nou. E mon konpran zot mon. Mon konpran akoz.

Mr Speaker, *LDS* i trouv li dan en sityasyon, sirtou bann Manm isi anndan, kot zot Gouvernman pa pe ekout zot. Zot Gouvernman i konpletman inyor zot, e pa fer naryen ki zot dir. Sel rekour ki zot annan se ki ler zot al fas avek zot L'Egzekitiv, zot al fas avek zot Gouvernman, zot anmenn sa 10 bebet ki lo sa kote avek zot.

Nou, nou a fer tapaz nou. Nou, nou a lager. Nou, nou a met presyon. Nou, nou a fer an sort ki zot Gouvernman i ava ekout zot. Nou, nou a ganny servi nou, akoz zot, zot pa efektif fas avek zot prop Gouvernman. E zot bezwen servi nou. Zot bezwen servi nou koman marspye, koman pon, pou sot larivyer pou kominik

avek zot Minis! Be i zot Minis. Zot in asiz dan en sesyon avek li. Nou pa ti la. Tousala ti'n devret fini rezoud. Ti'n devret fini annan en desizyon. Mon Prezidan in vin la dan Lasanble, in plennyen, in sipliye lo sa size. Oule dir mwan ni li son Minis pa tann li? Ni Prezidan, Minis pa tande?

Mosyon ti'n ganny *craft* orizinalman pou demann Gouvernman pou sers en fason pou rearanz sa sistenm *casualty*. Apre, zot pas laba, laba trankilman apre ki Prezidan in koze, zot *recraft* Mosyon dan en fason kot zot pran tou *liability*, tou blanm, tou responsabilite, zot balans lo piblik Seselwa. E pa nenport ki piblik Seselwa... (Onorab Georges reste trankil, mon tour koze.) Pa nenport ki piblik Seselwa, be sa ki malad.

Konmsi! Nou pran blanm e responsabilite sa ki nou Gouvernman ki *fit and proper* pa kapab fer, nou balans lo *les malades* konmsi? Ki kalite depi nou ladan? E sa i bann keksoz ki Legzekitiv ti'n devret pe egzekite. I bann keksoz ki zot devret pe nobou fer avek sa *supermajority* ki zot annan. Ek sa mazorite absoli, *both* dan Legzekitiv e dan Parlman, ki zot in gannyen pou egzekite. Nou, nou'n ganny en manda pou nou

opoze, met *checks and balance*, kestyonn zot. Anmenn Minis isi anndan, *press li for action!*

Se la anndan ki nou travay nou. Fodre pa nou per, ni kanmi travay isi anndan. Nou'n ganny nou en manda pou anmenn Minis la anndan, kestyonn li pou lenformasyon e *press li for action*. Me zot, zot dir nou al deryer rido. E nou konnen sa doktrin deryer rido.

### **MR SPEAKER**

Onorab. Onorab, lo Mosyon *please*.

### **HON JOHAN LOZE**

Yes, Mr Speaker. Non, mon lo Mosyon mon Mr Speaker. Mon lo Mosyon e tousala i bann size ki'n leve, ki nou ti'n devret vin *meeting*. *Au faite* nou'n menm ganny dir pou dir nou, nou zis anmenn Minis la anndan, nou demann kestyon. Mon pe zis adres size ki'n leve dan deba lo Mosyon, Mr Speaker, avek tou respe e ou permisyon mon ti a kontan kontinyen Mr Speaker.

### **MR SPEAKER**

Ale, kontinyen. Vi ki in ganny leve, wi.

### **HON JOHAN LOZE**

Sa size bann travay deryer rido. Bann negosyasyon deryer rido. Sa i en keksoz ki ti sape dan

labous zot Sekreter Zeneral sa. So, nou konnen pou dir i en fason ki zot annan. I zot fason sa. Akoz in deza ganny dir. Piblikman lo televizyon ti ganny dir pou dir zot annan bann negosyasyon deryer rido. La zot le tir nou dan lalimyer, anba tou sa *floodlights* isi anndan, trenn nou dan en fernwar dan kek trou ara kekpar deryer rido, pou nou antre dan zot bann negosyasyon.

Zot konnen, nou anmenn Minis isi anndan. Nou kestyonn li pou lenformasyon. Nou *press* Minis *for action*. Minis i dir nou moral dan son Minister i o, tou keksoz i *ok*, tou keksoz i byen. Lekipman i annan, latizann pa manke. Minis i penn en portre idelik son Minister. Be ki i annan pou nou al diskite ankor? I annan problem sa Minister? Nou'n anmenn li la anndan, in dir nou napa naryen mal.

Be napa naryen pou nou al diskite avek li. Nou'n fini diskite, la anndan in fini donn nou sa larepons. Be zot ale, zot rediskite avek li, ek bann profesyonnel ki nou, nou'n *train* parey zot dir nou. E larepons ki sorti, e ki annan en ta problem, en ta statistik zot in al aprann. Be akoz pa ti'n aprann nou sa la anndan? Ti ann aprann nou sa la anndan

*on live television* kot tou dimoun ti ann tande, ti ann swiv?

Minis ti'n kapab pran loportinite kestyon ki'n ganny poze, vini fer en *statement*. Akoz letan zot annan *political mileage* pou gannyen zot fer *statement* la anndan?

E Mr Speaker, mon pou dir en keksoz la, mon konnen ou pou ofanse. Petet ou ava opoze, ou a menm aret mon. Mwan in annan lenstans kot mansonz in ganny koze la anndan, e mon konnen, mon sertifye, mon ateste ki ti en mansonz par Minis, akoz ti lo manm, enn manm mon fanmir.

Mon pa'n fer en *fuss* mwan. Mon pa'n fer en *fuss*. Mon ti zwenn Dokter Louange apre dan *Rosebelle* mon ti leve sa sityasyon, sa kestyon avek li i dir mon wi nou konnen Minis in...Ou konnen Minis in fer en fot, in...Mon konnen! Mon konnen la mansonz ti koze, e enn manm mon fanmir i *involve* ladan.

So, sa i fason ki zot travay. E mon konnen Speaker toultan ou krwar petet, sirtou mon, mon konnen ou krwar mon en dimoun konfrontasyonnel akoz mon toultan vwar ou sers fason pou sey siprim mwan *from* koze.

Be si ou ti konnen kantite *leeway* mon donner, kantite lese mon lese, kantite lespas

mon donn zot. E mon ankor pe donn zot. Zot ti a soke zot menm, en? (Onorab Georges, ou'n koze, trankil silvouple.)

Mr Speaker, nou trouv nou dan en sityasyon ozordi dan sa pei kot nou bann Minis i kolekte en *allowance* pou dokter prive lokalman. Zot tous en lot *allowance* pou zot al sonnyen aletranze. E lot zour en dimoun i dir mwan zot annan en *health insurance* ankor, *on top of that*.

E kestyon ki nou bezwen poze de fwa, eski sa i kontribye ver sa 2 koneksyon ki zot annan avek kwa ki pe pase, ki pe deroule dan nou sistenm Lasante? Kwa ki dekonekte zot avek sa ki nou dimoun pe santi? E kwa ki fer ki *Caucus LDS* i ekspekte nou isi lo sa kote posed menm dekoneksyon, kot nou pa pou tann leokri nou pep, nou pa pou santi zot soufrans. E nou pa pou vin la anndan pou reflekte sa ki zot deor zot pe santi.

Nou pa pou vin la anndan pou nou koz lo sa leokri ki dimoun deor pe viv zot realite, zot toulezour fas a Minister Lasante. E zot vin la avek en plaster ki zot dir nou donn zot lanmer *apply* lo sa kanser, ki pe ron z nou sistenm Lasante ozordi. E nou, nou sipoze donn

zot en koudmen pou geri kanser ek plaster? Be seryezman!

Zot in dekonekte depi 2020, zot in dekonekte all along. Tou sa letan nou'n koz lo goute avek zot. Pa'n enterese zot, ziska zour ki zot Prezidan i deside donn...Manman, la ozordi tou goute zot ki koze. La zot in konekte, zot in *plugged in* la. *Air Seychelles*.

*(Interruption)*

### **HON JOHAN LOZE**

Mr Speaker, mon pa'n *disturb* okenn sa bann dimoun laba mwan. Mon'n les tou sa zans koze mwan.

### **MR SPEAKER**

Wi, selman mon ti a apresye si ou ti koz lo Mosyon.

### **HON JOHAN LOZE**

Mr Speaker nou tou nou koz lo Mosyon dan nou fason. Sa bann dimoun osi in koz lo Mosyon dan zot fason. Mon pa konnen letan zot in koz lo Mosyon, ki ti annan pou zot blanm *United Seychelles* mwan? Selman in arive. I annan in koz lo *meeting* piblik. In arive Mr Speaker. Zis mon ki ganny sansire. Zis mwan ki zot pe nerve avek ler mon koze. Mon, mon konnen akoz! Si zot pa kontan mwan dir mon,

konm dir Onorab Arissol. Vilen figir.

*(laughter)*

**HON JOHAN LOZE**

Petet mon vilenn ki koumsa. Be selman Mr Speaker, *Air Seychelles*. Tou sa letan ki nou *press conference United Seychelles* ki zot in kennsel ti pe koz lo *Air Seychelles*, zot in trankil zot. E se sa *press conference* ki'n anpes zot ferm *Air Seychelles*. Mon dir zot fran dan zot figir ozordi.

*(laughter)*

**HON JOHAN LOZE**

E la mon dir zot...Zot riye. Taler *video* i a sorti zot a kanmi. Mr Speaker.

**MR SPEAKER**

*Order please!* Wi?

**HON JOHAN LOZE**

Nou trouv nou dan en sityasyon dan sa pei ozordi, kot nou annan nou en *supermajority* ki'n konpletman dekonekte avek sa mazorite Seselwa ki'n met zot tou dan sa bann sez. Konpletman dekonekte. E se sa le sel rezon ki zot pe *fail*. Zot dir nou dan sa bann *meeting* piblik. E sa mon'n tande taler poudir sel *issue* ki pe monte se bann

*vye issues* ki'n la depi lontan sa ki zot tande. Zot pa tann tou sa dimoun.

Mr Prezidan mon'n *call* ou mon pa'n ganny repons. Mr Prezidan, depi ler mon'n ekrir ou mon pa'n ganny en repons. Mr Prezidan mon'n zwenn ek ou, mon'n koz ek ou, ou'n dir mwan espere mon ankor pe espere ziske ozordi. Konekte ek sa.

Si zot konekte avek sa, pou *prevent* sa bann Mosyon, kalite Mosyon ki zot pe anmennen ozordi. Ozordi nou pe konmans Lasanble parey ki nou ti terminen term pase. Mon pa konnen si zot rapel mwan? Term pase nou ti fini Lasanble san okenn *Bills*, san okenn travay Lezislasyon. Nou ti fini avek en bann Mosyon flate. En bann Mosyon *flatteur*.

**MR SPEAKER**

20 minit Onorab.

**HON JOHAN LOZE**

Mersi Mr Speaker. Ozordi nou konmans Lasanble. Yer Mosyon flate, ozordi Mosyon konpletman dekonekte. E nou napa *Bill*, nou napa travay Lezislasyon. Sa pei napa Lezislasyon pou met lo *docket* Lasanble Nasyonal. E mon pa pe blanm Lasanble la mwan. Zis mon pe *point out* poudir

nou'n termin Lasanble dan sa fason, e nou konmans avek bann Mosyon flate ankor e ki mon pa konnen kot sa pei pou ale ek sa bann Mosyon flate mon?

Be zot ki o pouvwar, zot ki konnen. Zis parey ler Minis i dir dan son Minister moral i o. Travayer i *ok*, zot *happy*. Napa okenn problem. I pa mank lekipman, i napa okenn *issues*. Apre zot envit *US* pou vin partisip dan bann diskisyon avek zot lo ki fason pou aranz en litani problem ki Minis i dir nou pa egziste.

Mr Speaker, avek tou respe, mwan Johan Loze mazanbik epe, mon pa pe vot pou sa Mosyon! Mon pa pe lev mon lanmen pou sa Mosyon, akoz mon en zom fran e onnet! Minis ti ann asiz la devan ti ann etal tousala avek nou. Nou ti ava annan en baz solid pou nou baz sa i nou pe fer lo la ozordi.

E Minis in asiz la in dir mon i napa okenn problem dan son Minister li! I napa *issues* li! Ki problem zot pe koze laba. Zot *disillusion* sa bann dimoun. Zot pa konnen ki zot pe koz lo la zot.

Minis in asiz la devan in dir nou tou keksoz i *ok*, e prezan zot, zot pe dir nou *join* zot dan sa Mosyon problem. Non. Non, non, non. Mwan,

mon pou siport Minis. Mon pa pe siport sa Mosyon ki mon pa konnen kot sorti, ki zot problem sa bann dimoun. Mersi Mr Speaker.

### **MR SPEAKER**

Mersi. Mersi Onorab. Zot a permet mwan fer en komanter e en klarifikasyon lo dernyen pwen ki Onorab Loze in tous lo la, ki i ti'n tous lo la en pe pli boner. E mon pe fer sa akoz mon ti enplike ladan. E sa se akoz Minis pa'n fer en prezantasyon dan Lasanble.

Minis ti apros mwan, i ti dir mwan i anvi fer en prezantasyon lo leta zeneral, kouver plizyer size dan Lasanble, fer en prezantasyon avek bann Manm.

E letan mon ti demann li, be ki mannyer i pou pase? I ti dir mwan i annan 5 prezantasyon *slide* par 5 diferan zofisye Lasante, enkli partisipasyon lezot Manm. Mon ti dir li pa posib dan *Chamber*, pa posib.

Nou pa kapab *accommodate* sa kantite dimoun. Nou pa kapab *accommodate* plis ki 3 oubyen 4 zofisye. E dan Lasanble se li ki nou ekspekte i koze plito ki son bann zofisye ki fer diferan

prezantasyon. Se pou sa ki i ti rod en lot *venue* pou fer sa.

Mon eksplik sa zis pou fer zot konpran. Mon konpran poudir petet zot annan rezon petet dir pou dir Minis ti devret fer ladres dan Lasanble. Me selman mon eksplike pou dir akoz pour sa lokazyon i pa ti arive fer li, e mon pran mon responsabilite. Mersi.

*(Off-Mic)*

**MR SPEAKER**

*Sorry?* Wi zot ti ganny envite. Mersi. *Ok.* Onorab William, ou annan laparol.

**HON BERNARD GEORGES**

*(Off-Mic)*

**MR SPEAKER**

*Sorry?* Wi zot ti ganny evite. Mersi. Mersi.

*Ok* Onorab William ou annan laparol.

Wi *point of order* Onorab, wi.

**HON SEBASTIEN PILLAY**

Mr Speaker ou ava note ki ler ou pe eksplike okenn Manm lo sa kote latab pa'n enteronp ou pou demann ou en kestyon.

Mon demann ou ozordi apremidi pou demann Onorab Georges pou egzers respe anver ou Sez. Ou ti pe eksplike e in

napa okenn drwa pou li demann ou okenn kestyon, akoz se li an premye lye ki ti *move* Mosyon pou sispann mwan, i dapre li i ganny drwa fer sa ki i anvi dan Lasanble!

*Ok*, e la mon le *raise* en *matter of privilege* Mr Speaker.

**MR SPEAKER**

Mon'n ekout, mon'n ekout ou *point of order*.

**HON SEBASTIEN PILLAY**

Si nou pou ganny envite pou nou ganny servi koumsa, i pa byen.

**MR SPEAKER**

*Ok* mon'n ekout ou *point of order*.

**HON SEBASTIEN PILLAY**

So, dir li respe *the Chair* Mr Speaker.

**MR SPEAKER**

Onorab Georges nou pe termin la eskiz mwan. Non, Onorab Georges nou pe termin la napa. Onorab William ou annan laparol.

**HON WAVEN WILLIAM**

Mersi Mr Speaker. Bonn apre midi tou dimoun ki a lekout. Mr Speaker, Mosyon anmennen par Onorab Andy Labonte i lir *comme* swivan;

Prenan kont bokou konsern lo labi servis *casualty* kot Lopital Sesel, Lasanble pe demann Gouvernman atraver Minister Lasante, pou asire ki sa servis i ganny servi pou bann *emergency* selman e non pa koman en klinik normal.

Mr Speaker, yer swar dan *meeting* piblik i annan en msye ki mon dakor avek son pwen - ki Lasanble i bezwen diskit lo size e reste lo size e os nivo deba dan Lasanble.

Mr Speaker, si nou get sa Mosyon, sa Mosyon i kler dan li menm. E mon pa vwar li en Mosyon popilis. Me i pe fer sorti konsern, e mon rapel byen mon ti pe swiv en program lo *SBC*, kot i annan en Ners Ansarz *Casualty* ti pe koze e fer sorti bann problem ki zot ti pe rankontre lo nivo *casualty*.

E Mr Speaker mon annan osi, mon'n fer dan mon resers mon'n trouv en rapor, en rapor 2023, ki zot in fer sorti. Kot zot in fer plizyer rekomandasyon Mr Speaker.

E ladan zot pe dir ki fodre kre en pe plis landrwa pou bann ka ki *non-emergency* aswar. E ki mon dakor Mr Speaker.

Alor mon vwar poudir Onorab Andy Labonte koman en Manm Elekte ki konsernen avek Sekter Lasante pou os sa servis, i pe siport sa demann ki

Minister Lasante in met devan atraver rapor.

E an menm tan Mr Speaker mon pa kapab *dénier* pou dir i napa kritik lo sa Minister. Mwan osi mon okouran bokou dimoun i apros mwan zot fer kritik lo sa Minister.

Be nou bezwen *focus* lo size sa Mosyon Mr Speaker. E size sa Mosyon i pe koz lo labi lo servis *casualty*. E Mr Speaker, dan sa laliny mon osi anvi dir ki si nou regard nou *Standing Order* Mr Speaker - en *Standing Order* ki letan ti annan sanzman governans nou ti vin zwenn sa *Standing Order* la Mr Speaker.

E dan sa *Standing Order* Mr Speaker i fer sorti dan *part* 11 kot i koz lo Mosyon, amannman Mosyon. Mr Speaker i donn bann detay lo konteni Mosyon, *notice* pou Mosyon, *manner of debating* Mosyon, lamannman lo Mosyon, *manner of debating* amannman.

Mr Speaker ki montre poudir Onorab Andy Labonte i pa'n kas okenn Lalwa ouswa lareg Lasanble. In sivre tou prosedir e son Mosyon in ganny admet par Lasanble. E i annan en Komite ki apel *ABC* ki lopoziyon osi i ganny



reprézante lo la e zot pa'n fer okenn lobzeksyon.

E deplis Mr Speaker - e deplis si nou, be nou pe koz lo serye Lasanble, be si ti annan problemm zot ti devret anmenn en lamannman Mr Speaker ki anba nou *Standing Order* i permet zot fer li.

So Mr Speaker mon ti anvri fer sa pri lesplikasyon, ki piblik deor la pa ganny konfize poudir Onorab Labonte konmsi i pa konnen ki i pe fer.

So Mr Speaker, lo sa Mosyon mwan mon pou donn mon sipor e mon pou dir ki wi, Gouvernman i bezwen seryezman regarde kwa an plis ki nou kapab fer pou fer bann lezot sant pou kapab donn bann servis ki bann dimoun *then* pa ava al reponn kot *casualty* aswar ouswa dan lazournen pou servis lasante.

Mr Speaker, i kre lokazyon osi sa Mosyon pou bann travayer ouswa manm piblik la sirtou i tonm dan en bon moman kot Prezidan pe fer letour dan bann distrik pou li zwenn bann dimoun e la mon ava dir be Prezidan pe konekte la, i pa pe dekonekte.

E sans pe ganny kree pou dimoun fer sorti bann problemm ki annan. Akoz wi i annan en Gouvernman me mon pa pou

dir poudir i konmann tou lenformasyon.

E se nou rol koman Manm Parlman ler i annan problemm, ler i annan konsern ki ler nou zwenn nou piblik osi nou anmenn devan bann Mosyon, nou anmenn devan bann kestyon. E *Leader* Lopozisyon i annan tou drwa pou anmenn son bann *PNQ*, personn pa opoz li pou dir li be pa anmennen.

Me mon pou siport sa Mosyon akoz mon war ki Onorab Andy Labonte in anmenn en size, i pa zis in kas dan son latet me parey mon dir i annan en rapor ki'n sorti e i annan zofisye lasante ki ti mont lo *SBC* pou eksplike. E mon krwar sa konsern i *genuine*.

Mr Speaker de lot kote, mon krwar poudir i pou enportan osi ki nou donn sans piblik a diferan lenstans pou zot fer zot kontribisyon lo ki fason zot krwar poudir servis lasante i devret amelyore.

Me an menm tan prenon kont Mr Speaker, ki nou pa koz zis lo os servis, me solman pa regarde poudir, pa regard kapasite e resours. Akoz sa osi i pou enportan letan nou pe koz, nou pe demann en pli meyer servis. E an menm tan regarde bann reminerasyon parey in ganny dir.

E Mr Speaker mon pa pou war problemm. Me an terminan mon ti ava kontan Mr Speaker si ou permet mwan tous lo la size akoz wi yer mon ti anmenn en Mosyon e plizyer Manm lo lot kote lafason ki zot pe, zot in pran mon Mosyon konmsi mon pe flat Gouvernman.

Me mon ava *remind* poudir letan mon ti lot kote plizyer enstan dan plizyer Lasanble nou ti anmenn bann Mosyon pou felisit Gouvernman. Ti napa problemm sa letan? Ti napa problemm sa letan Mr Speaker.

Nou ti felisit Gouvernman parey zot menm zot Mr Speaker. Zot ti dir nou fer li. Akoz sa lepok ti bon. Be la silvouple be les nou fer li lo sa kote. Oli problemm? E nou pa espekte zot fer li pou nou Mr Speaker. E mwan koman en Manm lo kote *LDS* e lo sa kote nou vwar li poudir i enportan felisit Seselwa, felisit Gouvernman.

Akoz Gouvernman parey mon'n deza dir pa zis Prezidan Ramkalawan ek son bann Minis, i pep Seselwa osi ki enkli dan sa konotasyon Gouvernman.

So Mr Speaker pou terminen ankor enn fwa, mon anvi dir poudir mon pou sipor sa Mosyon anmennen par

Onorab Labonte e mon demande ki Gouvernman dan en fason konpreansiv atraver bann *meeting* piblik i adres bann problemm.

Me mon anvi mansyonnen osi be dan lefase dan lot kote latab, zot ti fer *musical chair* avek bann Minis. Sanze parti sanze, pou sey redres problemm. Savedir ti annan problemm Mr Speaker?

Avek sa de pti mon Mr Speaker mon pou donn mon sipor. Mersi.

**(APPLAUSE)**

### **MR SPEAKER**

Mersi Onorab. Nou ava konklir avek repons par prezantater Mosyon Onorab Labonte.

### **HON ANDY LABONTE**

Mersi Mr Speaker. Bonn apre midi tou dimoun ki a lekout espesyalman ankor zabitan La Rivyer Anglez.

Bon Mr Speaker, depi bomaten, bomaten mon'n prezant sa Mosyon, ki mon pou relir ankor enn fwa.

Prenan kont bokou konsern lo labi servis *casualty* kot Lopital Sesel, Lasanble i pe demann Gouvernman atraver Minister Lasante pou asire ki sa servis i ganny servi pou bann

*emergency* selman e non pa koman en klinik normal.

Mr Speaker, ou konnen mon'n ekout tou lede kote anefef entervenir lo sa Mosyon. Pou mon rezon mon'n anmenn sa Mosyon, ler mon ekout ki'n koz avan mwan la Onorab William, ou konnen in koz avek bokou lasazes si ou le.

*In more or less summarize* sa ki mon ti vreman anvi dir dan mon lentervansyon. Akoz ler mon'n ekout bann Manm Onorab lo lot kote koze, mon'n apresye zot kontribisyon, me selman mon annan bokou dezapwentman.

Dezapwentman akoz senpleman ki zot in donn lenpresyon travayer lasante, ensi byen ki zabitan Sesel ki servi sa servis. En move lenpresyon.

Zot pa'n siport ni en kote, ni lot kote. In montre pirman ki zot problem i avek gouvannans pei. Petet akoz zot in perdi dan dernyen eleksyon, ki mon konpran, mon konpran.

Akoz ler mon'n tann Onorab Herminie pran laparol atraver ou Mr Speaker, mon pou bezwen note ki ler i ti antre dan Lasanble, mon ti dir li pou dir mon'n anvoy mon lanmen pou mon, pou nou travay ansanm. E li i ti dir mwan i espekte ki mon senser. E tou

dilon depi ler ki i in antre mon montre li poudir mon annan senserite.

Menm yer nou'n annan en dyalog ankor enn fwa deryer rido parey zot dir. Me solman mon fer li konpran poudir nou annan en *meeting* piblik eski ou pe vini? I ti dir ek mwan i ava gete, i ava gete. Me malerezman kantmenm son prezans pa ti la, nou, nou moto ti 'Sesel pou ou son zanfan'.

Me zabitan La Rivyer Anglez i kler. Akoz mon'n ganny bokou mesaz ler ki sirtou li i pe koze ki zabitan in fer mon konpran, mon ti kapab lir sa bann mesaz, me solman mon pa pou al ladan. Ou konnen akoz Mr Speaker? Akoz mon respekte bokou mon zabitan.

E yer dan *meeting* piblik enn mon zabitan, enn ansyen Manm Lasanble, ki sa letan i ti en siporter lo lot kote kot zot, me yer in fer sorti ki i war poudir nou Lasanble i pe, si ou le bann diskisyon i merit lo en pli o nivo.

E mon pou swiv sa konsey akoz ler mon ti ganny elekte dan sa Lasanble, se sa ki mon bi e mon lanvi. E souvandfwa mon'n santi mon dan sa sirkonstans ki nou war poudir bann Manm sirtou lo lot kote zot pa pe vreman pran bann diskisyon alaoter. Zot

plizoumwèn anvi trenn nou dan rigol. Be mwan toultan mon pou seye pou mon pa tonm ladan akòz mon en travay pou mon fer.

E mon reste konekte avek zabitan mon distrik. E byensir mwan mon en Manm ki'n ganny elekte e mon pou kontinyen anmenn Mosyon ki mon krwar i enportan - i dan lentere pep Seselwa e mon distrik an zeneral.

So Mr Speaker, mon'n osi ganny mesaz atraver bann travayer Lasante ki'n felisit mwan annefe pou sa Mosyon. I annan plizyer ki ti napa mon limero in al rode. Menm mon bezwen dir Onorab Uranie ki zabitan menm La Digue pe anvoy mon mesaz ki zot satisfè avek sa Mosyon.

Pou la senp rezon, akòz travayer Lasante i santi, mon pou zis lir en pti ekstrenn sa bann mesaz i en travayer Lasante. In ekrir an Angle mon pou sey tradwir li vitman an Kreol.

I dir koumsa poudir "travayer Lasante i osi en imen, *ok* zot ganny peye pou rann en servis. Me solman pasyan avek bann kliyan ki vin dan klinik, zot parey bann Lerwa ek bann Larenn e zot merit ganny servi avek dinyite."

Ki montre ou pirman i pa'n ni kraz ni en kote ni lot kote. Me plizoumwèn ki i pe fer konpran se ki tou lede kote sa ki pe resevwar sa servis e ensi byen, sa ki pe donn sa servis i merit annan respe pou kanmarad.

Me ler mon'n tann Onorab Algae koze atraver ou Mr Speaker, mon'n war poudir in pli ou mwen donn lenpresyon ki i normal pou en zabitan al kot *casualty* si zot pa satisfè avek serten keksoz oubyen mannyer pe deroule, zot kapab maltret sa bann Ners e sa i normal.

Be annefe sa i pa bann latitud ki akseptab. I bann latitud ki i pa normal, i pa normal. E nou merit denons, detas nou lekor avek sa.

Mr Speaker, parey mon pe dir, bokou, bokou in ganny dir. Annefe lo lot kote zot tou zot in donn zot kontribisyon e mon'n ekoute. Me selman pou mwan apre ki mon'n ekout konsern piblik, konsern piblik ki'n vin devan, in annan bokou ki'n konplent servis *casualty*. In annan bokou ki'n an faver, travayer menm.

Menm mon pas plizyer fwa ki mon al laba pandan *recess* bomaten, lizour. Menm koman aswar pandan lannwit i annan *time* mon'n ale. Mon'n koz avek

sa bann travayer. E zot in met zot konsern.

I vre poudir i annan bokou travay pou fer lo kote zot *Scheme of Service* ki en travay *ongoing*. Me i annan keksoz ki pe ganny fer. E la mon anvi felisit Mrs Linda Dine ki *Nurse Manager, acting Nurse Manager* pou sa servis, enkli *Dr Gabriel* ki ansarz *medical officer* kot sa servis. E tou lezot *staff*.

Ler mon pe dir tou lezot *staff* i pa zis Ners, Dokter. I annan asistan Ners, i annan menm bann dimoun ki netwaye. I annan sekirite, i annan *porter*, i annan, ou konnen i en lekip an zeneral.

E mon lespri deryer sa Mosyon i pozitiv, pozitivite pou anmenn tou dimoun ansanm pou nou war solisyon. E dan nou *meeting*, bann *meeting* piblik ki nou pe fer dan bann distrik ankor enn fwa i pe ed nou pou nou reste konekte pou nou war bann difikilte oubyen bann konsern oubyen bann kontribisyon ki zabitan zot menm zot, zot ti ava kontan war. E i ed nou pou nou kapab kontinyen anmenn bann tel Mosyon parey.

So Mr Speaker parey mon pe dir mon pa pou long aköz bokou in ganny dir. Me sel keksoz ki mon ti ava kontan dir sirtou avek bann Manm Onorab

lo lot kote, sirtou Onorab, Onorab Loze ki li in dir byen for i pa pou siport sa Mosyon, ki mon bezwen respekte son lopinyon.

Me selman petet annou konsidere, annou mazin pep Seselwa ki servi sa servis, ki ti ava kontan war en amelyorasyon dan sa servis. Annou mazin travayer Lasante ki zot osi zot ti ava kontan war en amelyorasyon petet dan zot kondisyon travay. Alor an zeneral nou pe get tousala.

E la mon anvi osi vi ki mon annan en Sant Lasante dan mon distrik La Rivyer Anglez, i annan Ners Ansarz Ms Marie-Helene Niole ki pe fer en travay ekstraordiner dan nou distrik malgre bann kondisyon ki pa vremen favorab par ler. Malgre lekspektasyon piblik an zeneral ki a la oter ki nou bezwen dil avek.

E mon pou dir li nou la, nou la pou siport li. E nou pou kontinyen. E la mon pou bezwen mon santi mon oblize petet Mr Speaker ankor enn fwa zis al lo en masaz ki enn mon zabitan, enn mon zabitan e in dir mwan poudir i enportan ki mon fer sorti sa not aköz in toultan siport sa parti ki ti la oparavan e sirtou in sorti dan mon distrik i pa'n zanmen war okenn Onorab atraver ou Mr

Speaker, Onorab Herminie ki'n koze.

I pa'n zanmen ni montre en lentere pou li vizit sa *Health Centre* pou donn son sipor sa bann dimoun e...

*(Interruption)*

**MR SPEAKER**

Yes, Onorab eskiz mwan. Mon krwar bann Manm i en pe fristre akoz ou sipoze pe *wrap-up* ou Mosyon, pa al lo lezot size.

**HON ANDY LABONTE**

Mon pa ava al lo la Mr Speaker petet mon pe ofans li. Akoz pangar i ava eksite laba lot kote Mr Speaker.

**MR SPEAKER**

Evit, Onorab mon pe dir ou ankor enn fwa, evit, ki mannyer mon pou dir? Evit *challenge*, sikann bann lezot Manm dan lot kote.

**HON ANDY LABONTE**

Non-non mon pa pe sikannen, mon pe zis dir Mr Speaker.

**MR SPEAKER**

Konklir, konklir lo ou Mosyon silvouple. Konklir lo ou Mosyon, *focus* lo ou Mosyon.

**HON ANDY LABONTE**

Ok. So pou konklir Mr Speaker mon pou dir, mon ti ava kontan ki mon ganny sipor sa Lasanble, pou ki nou kapab revwar servis ki *casualty* pe ganny donner avek bi redwir labi lo sa servis.

Avek sa de mo Mr Speaker mon pou met mon Mosyon devan Lasanble pou nou kapab vot lo la. Mersi Mr Speaker.

**MR SPEAKER**

Mersi.

***(APPLAUSE)***

**MR SPEAKER**

Mersi Onorab. Bon prezan mon ava apel bann Manm pou vot lo Mosyon.

**HON WILBERT HERMINIE**

Mon annan en *matter arising* la Mr Speaker.

**MR SPEAKER**

Non, Onorab mon konpran in mansyonn son non, mon'n *rule* ki i *out of order*.

**WILBERT HERMINIE**

Mr Speaker i dir koumsa mon pa'n zanmen vizit klinik.

**MR SPEAKER**

Mon'n *rule* ki i *out of order* e sa i *settle* li.

**HON WILBERT HERMINIE**

Be mon bezwen klarifye.

Mosyon in aprouve par Lasanble. Mersi.

**MR SPEAKER**

Mersi. Mersi. Non Onorab.

**(APPLAUSE)**

**HON WILBERT HERMINIE**

Mon bezwen klarifye akòz i ti dur koumsa in anvoy en lanmen li. Mon'n koz lo Mosyon, mon pa'n atak li personnel. Ozordi nou war laverite sorti.

**MR SPEAKER**

Bon nou bezwen termin nou travay pou ozordi la. Definitivman i pa ti pou annan letan pran okenn lot *item* e nou napa lot *item* lo *Order Paper*. So, mon ava remersye bann Manm pou zot partisipasyon e nou fini la pou lasemenn. Lasanble i a rebran Mardi prosen 9er. *Adjourn.*

**MR SPEAKER**

Mersi.

**HON WILBERT HERMINIE**

Nou'n war laverite.

**(ADJOURNMENT)**

**MR SPEAKER**

Mersi. Onorab non ou napa laparol. Onorab Labonte laprosenn fwa mazine ler ou fer ou lentervansyon pa bezwen kritik sa ki en Manm in fer dan lepase, oubyen sa ki in dir dan lepase. Mersi.

Mon ava apel bann Manm pou vot lo Mosyon. Manm ki an faver lev lanmen silvouple.

Mersi. Manm ki kont? Mersi.

Lo Mosyon soumet par Onorab Labonte ki in lir zis avan an komansman son lentervansyon, 17 Manm in vot pour, 7 Manm in vot kont, e 0 Manm in *abstain* alors sa